

**NATIONAL ASSEMBLY OF  
SEYCHELLES**

*Wednesday 10th July 2024*

*The Assembly met at 9 am*

*National Anthem*

*Moment of Reflection*

*Mr Deputy Speaker in the Chair*

**MR DEPUTY SPEAKER**

Bonzour tou Manm Onorab, tou *staff* sekretarya Lasanble e piblik ki pe swiv travay Lasanble pou sa Merkredi le 10 Zilyet; byenveni. Nou travay ozordi pou dominan avek kontinyasyon travay lo *Bill* ki nou'n diskrit merit zeneral yer e sa i *Seychelles Fisheries Authority Bill, 2024*. E apre nou annan Mosyon lo papye ki i annan de Mosyon ki lo *Order paper*.

Donk nou ava demann *Hansard reporter* pou apel delegasyon ki pe zwenn nou. Nou ava dir bonzour e swet la byenveni delegasyon ki fek zwenn nou pou nou kontinyasyon nou travay lo *Seychelles Fisheries Authority Bill, 2024*. E sa delegasyon i dirize par Minis pour Lapes Mr Jean-Francois Ferrari i

akonpanyen par Mr Yannick Roucou ki *Legal Advisor* kot *Seychelles Fisheries Authority*, Mrs Irene Sirame ki *Legal Advisor* sorti kot Minister Lapes e Lekonomi Ble e osi Mr Victor Hill ki *Assistant Principal Legal Draftsperson*, pou nou travay.

Nou ava demann Serzan pou nou al dan *Committee Stage*.

Mersi. E nou ava konmans nou travay e se *Chairman Bills Scrutiny of Bills Committee*, Onorab Clifford Andre pou diriz nou dan nou travay bomaten. *Please proceed*.

**HON CLIFFORD ANDRE**

Mersi Mr Chair. Mr Chair, parey nou ti'n tonm dakor dan *Bills Committee* e osi nou'n sirkil *tracked version* so tou Manm i annan en kopi. Mon pou al lo la par seksyon, me mon pa pou tous sa "s" oubyen sa "r" ki bezwen ganny amande oubyen bezwen ganny azoute.

Dan *long title* nou annan en koreksyon ki nou'n fer, ki *panel* ansanm avek nou ti'n tonm dakor. Dan *interpretation clause 2 "fisheries"* nou'n fer lamannman. nou bouz lo *clause 4 (f)* nou'n fer en adisyon. Mon vwar Onorab Georges - LGB.

**MR DEPUTY SPEAKER**

Onorab Georges?

**HON BERNARD GEORGES**

Mersi Mr Chair. Bonzour Mr Chair. Bonzour Minis avek ou delegasyon. Bonzour tou bann Manm Lasanble e tou dimoun ki pe ekout nou.

Ant (e) avek (f) Mr Speaker, mon vwar zot in koste, ti fodre met en lesplas. Mersi.

**MR DEPUTY SPEAKER**

Mon vwar sa i annord wi.

**HON CLIFFORD ANDRE**

Korek? Dan *clause (5)* i annan en adisyon.

**MR DEPUTY SPEAKER**

Konmsi ou'n mank (h).

**HON CLIFFORD ANDRE**

Sorry?

**MR DEPUTY SPEAKER**

4 (h).

**HON CLIFFORD ANDRE**

4 (h) wi 4 (h) i annan en *deletion*. *Clause 5* anler dan son *chapeau* i annan en *addition*. Dan *clause 5(d)* i annan en *addition*. Dan *clause 5(j)* i annan 3 amannman ki nou'n fer.

Dan *clause 7* ki lo paz 7, i annan *removal* ki nou'n fer. So par lefe ki nou'n fer sa *removal* - sa *deletion* nou re number

savedir 3 i pou vin 2. E i annan osi lamannman dan sa nouvo 2 ki ti 3 avan. Osi annan lamannman dan *new 2 (b)* dan premye laliny ek trwazyenm laliny, i annan *deletion* ki nou'n fer. Savedir sa *clause 4* i ganny retire i ganny *deleted*.

Dan *clause 8(1)* i annan lamannman ki nou'n fer. Dan *clause 8(1)(a)* dan dezyenm laliny i annan en *deletion* ki nou'n fer. Dan *clause 8(1) (b)* dan dezyenm laliny i annan en *deletion* ki nou'n fer. Dan *clause 8(1) (c)* i annan en sanzman ki nou'n fer sorti maziskil pou li vin miniskil.

Lo paz 9 dan *clause 8(2)* dezyenm laliny i annan en *deletion* ki nou'n fer.

**MR DEPUTY SPEAKER**

Hold on. Onorab Georges.

**HON BERNARD GEORGES**

Mersi Mr Chair. Mr Chair, mon lo sanmenm sa *clause 8(2)* dan son trwazyenm laliny.

"*The member who's office has become vacant*" – "*who's*" i devret en pe diferaman i devret *w.h.o.s.e* and not "*who's*". " Mersi.

**MR DEPUTY SPEAKER**

Mersi Onorab.

**HON CLIFFORD ANDRE**

*Ok, panel mon krwar i ok avek sa. Dan sa menm sa clause 8(2) nou annan en adisyon, ki nou'n fer dan trwazyenm laliny e nou'n delete osi dan trwazyenm laliny.*

Mr Chair, mon pou al lo paz 9 menm, dan *clause 9* dan son *chapeau*, i annan en *deletion* en *replacement* ki nou'n fer - miniskil pou maziskil - *I mean* maziskil pou miniskil.

Dan *clause 9(b)* dezyenm laliny nou'n *delete*, nou'n ranplas li avek parey nou ti'n dakor "*authority*."

Lo menm paz Mr Chair. *Clause 10* premye laliny nou'n tir maziskil nou'n met miniskil. Menm zafer dan *clause 10(2)* ki lo paz 10 nou'n tir maziskil nou'n met miniskil dan premye laliny e nou annan en adisyon ki nou'n fer lo trwazyenm laliny avan *pecuniary*.

Lo katriyenm laliny nou'n sanz maziskil pou met li miniskil. Menm zafer i aparet lo *clause 10(3)* dezyenm laliny kot nou'n tir maziskil nou'n met miniskil.

Menm zafer i aparet lo *clause 10(4)*, premye *sorry* Onorab Gill.

### **MR DEPUTY SPEAKER**

Onorab Gill *please, proceed*.

### **HON CHURCHILL GILL**

I al lo sa menm *clause* ki Onorab pe pran, sa *clause 4*, mannyer son *wording* i ete avan ti napa *Commission* ki ti apwent Lotorite kot *PEMC*. La prezan I pou annan en *Commission* ki sipoze apwent sa bann dimoun sa menm *members*.

Me selman la i dir ki *upon appointment* sa bann *members* pou *submit* en *statement to the authority*.

Me selman zot menm zot ki ti sipoze sa *authority*. So *basically* zot pe *submit* ek zot lekor.

Mon ti a voudre ganny en klarifikasyon si sa i korek oubyen si petet en mankman ki petet i devret ganny revwar? Mersi.

### **MR DEPUTY SPEAKER**

*Ok, mon krwar sa enn komanter i permi sib pou klarifye lentansyon sa clause, it's not questioning the policy behind it.*

*So we will allow this one. Panel i oule klarifye sa?*

### **ASSISTANT PRINCIPAL LEGAL DRAFTSPERSON VICTOR HILL**

Yes Mr Speaker. Mr Speaker, sa i en deklarasyon ki bann *Board Members* bezwen fer *in accordance with PE Act*. So

ler zot fer zot deklarasyon zot pe fer li to *The Fisheries Authority*.

*Yes, the Chairman and the Board is already there, yes. Ou konpran?*

**HON CHURCHILL GILL**

*(Off-Mic)*

**MR DEPUTY SPEAKER**

Fodre ou koz dan *mic* pou ou vin lo *verbatim*.

**HON CHURCHILL GILL**

*Who will be the authority of Fisheries? The Board?*

**MR DEPUTY SPEAKER**

Oule *Chairman Bills Committee* entervenir lo menm pwen?

**HON CLIFFORD ANDRE**

Mon krwar mon kapab sey asiste, akoz letan nou pe gete "*authority*" "*definition of authority means the Seychelles Fisheries Authority*" established under section 3.

Aprè letan nou pe gete "*Commissioner*" – "*Commissioner means*" en "*Commissioner appointed under section 9 of the Public Enterprise Act.*"

So mon mazine - letan mwan mon pe gete, i pou annan en Lotorite, so sa Lotorite i *authority*.

I pa dir ki mannyer *Board mans Board of the authority established under section 6*.

So i pou annan en *Board* li. Aprè i pou annan *Commissioners* ki separe avek *Board Members*. So, *they are not Board Members, per se* baze lo sa ki la devan nou en? Sa lenterpretasyon ki mon pe gete akoz *Commissioner means e Commissioner appointed under section 9 of the Public Enterprise Act*.

So i pou annan en *Board* aprè i pou annan *Commissioners*. So *the Commissioners* ki mannyer mwan mon pe gete - *the Commissioners* zot pou soumet en deklarasyon avek Lotorite. Koriz mwan si mon pe mal ganny li *panel*. Mersi.

**MR DEPUTY SPEAKER**

Mr Hill.

**ASSISTANT LEGAL DRAFTSPERSON**

**VICTOR HILL**

Thank you Mr Speaker. Mr Speaker, napa *Commissioners* anba Lalwa. *Commissioners* i anba *PE Act*. Me kekfwa ki sa konfizyon, Mr Gill pe rode lekel ki *authority*, akoz li i pe dir *the Board is the authority*.

But ler ou pe gete *the authority is everyone-*

*everything. I annan son, i annan tou son bann staff, tou son bann members. I annan son CEO. So we are saying zot, zot fer sa deklarasyon to the authority which is established under section 3.*

**MR DEPUTY SPEAKER**

Savedir ou pe dir i soumet dan biro CEO par egzanp?

**ASSISTANT PRINCIPAL  
LEGAL DRAFTSPERSON  
VICTOR HILL**

Yes.

**MR DEPUTY SPEAKER**

*Ok hold on. Parske lefe li ki ti'n demann klarifikasyon, nou ava donn li laparol avan. Onorab Gill?*

**HON CHURCHILL GILL**

Wi, mon pwen ki mon pe fer sorti se mwan mon ganny apwente *as part of the Authority*, selman mon pe submit ek sa menm *Authority* ki mwan osi mon form par ladan.

Mon pe zis eklersi si i korek sa fason fer? Mersi.

**MR DEPUTY SPEAKER**

*Ok. Onorab Cosgrow, lo menm pwen avan ki mon donn Minister?*

**HON WALLACE COSGROW**

Mersi Mr Chair. Mr Chair, lo menm pwen ki Onorab Gill pe dir, vi ki apwentman *Board* i ganny refer avek sa Komite or *Commission* anba *PE Act*, eski i pa ti pou normal ki sa *statement in writing* i ganny fer to the *Committee or Commission* ki apwent *Board* rather than to the *Authority* akoz se zot ki pe apwent *Board*, pa the *Authority* ki pe apwent *Board*, se sa Komite – *President in consultation with that Committee.*

So sa Komite ki bezwen konnen si sa dimoun i annan *any interest in the organization or in the field* avan i fer lapwentman.

*So basically* nou pe met sa *statement in writing* apre ki sa dimoun I ganny apwente par Prezidan, an konsiltasyon avek sa Komite. Si zot konpran mwan byen ki mon pe ...

**MR DEPUTY SPEAKER**

Mon'n sezi le pwen. Lo kote parti mazoriter i annan de Manm ki ti'n endike, fodre i lo sa pwen ki nou pe koz lo la, la. Onorab Andre avan, apre Onorab Georges. Apre laparol nou ava donn *Minister or panel.*

**HON CLIFFORD ANDRE**

Non, mon *subscribe to* - mon konpran ki Onorab Gill pe dir e *yes* napa *Commissioners* ladan.

So nou bezwen vwar en metod e mon tant pou mwan avek konsiltasyon *panel*, ki kekfwa si zot pe ganny apwente lo Lotorite sa deklarasyon i bezwen ganny fer avek *the appointing Authority but not the Authority itself*.

Me selman sa annou diskite nou ava gete ki mannyer *panel* pou akomod sa. Mersi.

### **MR DEPUTY SPEAKER**

*Ok, very well.* Onorab Georges.

### **HON BERNARD GEORGES**

Mersi Mr Chair. Mr Chair, i en *clause standard* sa. *In fact* dan tou *Board* ki mwan mon *sit* lo la i annan sa provizyon pou fer. Sa i zis en deklarasyon lentere.

E ou'n fer li avek ou *Board*, ou dir avek ou *Board* ler ou ganny apwente mon annan en konfli lentere dan sa zafer. Alors swa ou ava pran en mezir, swa mon ava *step aside* ler en desizyon i ganny pran.

E *it's perfectly normal*. Mon konpran ki kekfwa konfizyon i vin avek sa mo "*Authority*". Lekel avek sa *Authority* ki ou adres ou lentansyon, ou plito ou konfli lentere.

Kekfwa - anfen mwan mon ti ava propoze ki *it's to the Board* ki ou fer li. Akoz *that's the norm*, akoz se *Board* ki enterese pou konnen ki i annan enn son Manm ki annan en konfli lentere. E non pa neserman *the Authority as it is*.

Alor kekfwa si i annan sa konfizyon, nou kapab kekfwa adres sa konfizyon *by saying "address to the Board the statement in writing."*

Pandan ki mon annan laparol pou mon pa demann laparol pli tar *a very minor point*, ant *sub clause 2* ek *3* lo sa menm paz i merit annan en lespas. Mersi.

### **MR DEPUTY SPEAKER**

*Space* anler. *Ok*. Nou reste lo sa pwen. Mon vwar i annan *3* lanmen; *panel* mon pou donn zot apre. Zis *note* bann *issues*. Konsern la i lo sa size mo "*Authority*," so nou pou reste lo la. I annan Onorab Loze, Onorab Andre apre mon pou retourn kot Onorab Cosgrow. Onorab Loze.

### **HON JOHAN LOZE**

Mr Speaker, zis pou mwan pran kot Onorab Georges in kite. Onorab Georges in dekrir en norm ki *encompass* bann *Board* ki i pe *serve* lo la.

*These are the existing Boards. Mon pe serve lo en existing Board, mon annan en deklarasyon konfli lentere e mon deklar avek Board.*

*Be la nou pe kree en Board la. Nou tou nou pa lo Board. Nou tou nou bezwen fer en deklarasyon or other.*

*Me kestyon ki Onorab Gill pe demande, en Board pe ganny kree eski sa Board ki pe ganny kree ki pa ankor basically egziste, i fer sa deklarasyon antre zot sa non-existent Board ouswa zot fer li avek the appointing Authority ki deza egziste li.*

*E Mr Speaker, konman mon annan laparol pou mwan pa demann laparol ankor, mon tann ou'n koz lo diskisyon lo Polisi dan Committee Stage. Zis pou gid the Chair se the Chair menm avek Minis Ferrari dan Sizyenm Lasanble, ki'n set presedans ki dan Committee Stage nou diskite Polisi e lentansyon Bill. Se zot ki'n kree sa presedans. Mersi Mr Chair.*

#### **MR DEPUTY SPEAKER**

*Mersi Onorab pou ou komanter. Mon krwar i ti ava i ti responsabilite the Chair sa letan pou diriz nou lo ki Order 73 nou Standing Orders i dir.*

*Now I'm doing that exactly, that was the responsibility of the Former Chair. Onorab Andre?*

#### **HON CLIFFORD ANDRE**

*Wi, mon konpran en pti pe lozik ki LGB pe dir. Be selman ki mon ti ava kontan ganny gide, letan nou pe get sa mo i dir "at the time of his or her appointment."*

*So it is at that time ki i bezwen disclose. Eski i disclose avek sa Authority avek sa Board, oubyen i disclose avek the appointing authority. Because i at the time. So anything that comes within, letan Board pe diskite definitivman i pou deklar en konfli lentere si i annan sa i normal i pou bezwen dir avek sa Board i pou sorti dan sa meeting.*

*So kekfwa sa nou bezwen get sa en pti pe. Mersi.*

#### **MR DEPUTY SPEAKER**

*Mersi. Onorab Cosgrow?*

#### **HON WALLACE COSGROW**

*Yes, mersi Mr Chair. Mr Chair, mon krwar nou bezwen asize konmsi troun en pti pe deryer mazin bann diskisyon Bills Committee, an relasyon avek bann nouvo Lalwa SOEs ki pe vini, ki ganny ankadre anba PE Act.*

Ti annan en Lalwa ki ti vini ti annan en *clause*, ki ti ganny dir ki poudir i annan en Komite ki pou *advise* Prezidan lo lapwentman bann Manm *Board*.

So i fer sans pou *at the point of appointment*, akoz napa *Board* parey Onorab Loze in dir - *at the point of appointment*, sa Komite ki anba *PE Act* i *privy of any interest* ki mwan dizon mwan, mon annan dan domenn lapes, *or dan SFA or whatever*, avan i fer son apwentman.

Akoz i pou al apwent sa *Board* li. E mon pa kapab fer mon deklarasyon avek en *Board* ki pa ankor ganny apwente, mon bezwen fer mon deklarasyon avek sa Komite ki pe al apwent mwan, pou Prezidan kapab ganny en bon apersi lo ki mannyer i apwent sa *Board*.

So nou bezwen standartiz li avek tou sa bann Lalwa *SOEs* ki pe vini, ki pe pran kont *PE Act* sa Komite anba *PE Act*. Sa mon *submission*.

### **MR DEPUTY SPEAKER**

Mersi Onorab. Mon donn dernyen laparol lo *Floor* Onorab Georges avan ki mon donn *panel*.

**HON BERNARD GEORGES**

Mersi Mr Chair. Mr Chair, annefe mon rebran pwen Onorab Loze e i annan parfetman rezon, mon ti pe koz lo en deklarasyon konfli lenterere *while the Board is sitting*.

Me annefe napa okenn napa okenn diferans ant sa ki mon ti dir e lentansyon *subclause 4*. Akoz fodre nou lir *clause 10* an antye.

E nou vwar dan *clause 10* an antye 1, 2, 3, 4 se 4 lenstans kot i annan en konfli lenterere e dan tou le 4 lenstans ou fer sa deklarasyon avek sa Lotorite. *So there is no difference*. Se pou sa rezon ki ou fer li avek Lotorite.

E avan ki *Board* i ganny apwente, ou fer li avek *SFA*. Ler *Board* in ganny apwente, ou *still* fer li avek *SFA*, me atraver *the Board*. Se pou sa rezon ki sa mo "*Authority*" – "*shall declare to the Authority*" i dan 1,2,3 avek.

Alor i fer sans ki se menm Lotorite ki ou fer ou deklarasyon konfli lenterere avek nenport ki moman. Mersi.

### **MR DEPUTY SPEAKER**

Mersi Onorab. *Panel* aprezan Mr Hill.

**ASSISTANT PRINCIPAL  
LEGAL DRAFTSPERSON  
VICTOR HILL**



*Thank you. Mr Speaker, ou pou anmenn en pe plis leklersisman seksyon 63 PE Public Enterprise Act li menm li i dir ou ki sa deklarasyon i ganny fer "to the Authority of that of the concerned Authority and not to the Authority as being the PE Authority."*

**MR DEPUTY SPEAKER**

*Which clause is that?*

**ASSISTANT PRINCIPAL  
LEGAL DRAFTSPERSON  
VICTOR HILL**

Seksyon 63. So sa i eklersi sa bout. So prezan sa kestryon lo si *Board* pe ganny *constitute* oubyen non, i pa vini en *issue* akoz lemoman sa *Board* i *constitute*, se la ki i bezwen fer sa deklarasyon.

So si napa en *Board* ki ganny *constitute*, napa deklarasyon ki ganny fer.

So ler *Board* i ganny *appointed* then they make that *declaration to the Chairman of the Board. Ok.*

**MR DEPUTY SPEAKER**

*Ok. So savedir unless there's an amendment to change Authority ki napa la devan Lasanble, so will proceed with how it is baze lo clause 63 of PEMC Act ki Mr Victor in dir anlany avek.*

*So Chairperson Bills Committee ou ava kontinyen.*

**HON CLIFFORD ANDRE**

Mersi Mr Chair. *Clause* 12 dezyenm laliny nou annan lamannman ki nou'n fer, osi ki dan laliny nimerò 3.

Paz 11 *clause* 13(2) dezyenm laliny nou'n tir maziskil nou'n met miniskil. Ankor i aparet dan *clause* 13 *clause* 13(4)(b) premye laliny e trwazyenm laliny. Dan *clause* 5 i annan lamannman *clause* 13(5) eskiz mon *clause* 13(6) premye laliny annan lamannman. Mon ava al lo paz nimerò 12, dan *clause* 15(1) trwazyenm laliny. Dan *clause* 15(2) premye laliny e trwazyenm laliny i annan lamannman ki nou'n fer.

**MR DEPUTY SPEAKER**

*Hold on. Onorab Cosgrow mon vwar ou lanmen anler.*

**HON WALLACE COSGROW**

Yes mersi Mr Chair. Mr Chair 15 (1) an alan ek presedans ki'n deza etabli dan sa Lasanble e la mon pe fer referans direkteman avek Minis li menm konman en ansyen Manm Lasanble, in toultan obzekte kot Minis, Prezidan i annan *say* dan tro bokou *say* dan lapwentman bann Egzekitiv e i ti en *practice*

ki krwar ki Minis ti annan tro bokou pouvwar.

So eski napa en lot fason ki nou apwent *Chief Executive Officer* e *Deputy Chief Executive Officer of the Authority* san ki nou met sa *sole responsibility* lo Prezidan avek Minis, si napa en Komite ki nou kapab fer li pas *through* Mr Speaker. Mersi.

### **MR DEPUTY SPEAKER**

Mersi Onorab. Onorab pe kestyonn *the policy behind it unless* ou ti'n *move* dan ou deba merit zeneral ou ti'n kestyonn sa, ouswa ti annan en lamannman, *I am not* parey mon'n dir pou pran leksplikasyon lo bann *policies behind each clause*. Nou pa pou fer sa. Onorab...

### **HON CLIFFORD ANDRE**

Mr Chair, zis pou mwan gid Onorab al get dan *PEMC Act 75* i koz egzakteman sa. Akoz mwan osi mon ti'n lev sa *query*, me selman letan onn fer mon resers mon'n vwar li.

So i kouver egzakteman parey i mete ladan. So mon pe zis gid li pou nou pa dir demen ki ou pa'n ganny sa leksplikasyon. Mon ava kontinyen Mr Chair.

So mon ti'n ariv lo 15 - 75 of *PEMC "appointment of Chief*

*Executive Officer"* i egzakteman parey.

So 15 *clause* 15(3) nou annan lamannman dan laliny nmero 2 e osi laliny nmero 3. 15(4) dan laliny nmero 2. E nou pou bouz lo paz nmero 13 ki vin 15(7) dan laliny nmero 2. Epi nou annan 16(4) dan laliny nmero 2. Mon al lo paz nmero 14 Mr Chair. Dan 19(1)(a) dan premye laliny. Dan 19(1)(c) dan dezyenm laliny. Dan 19(1)(d) dan dezyenm laliny.

Lo paz nmero 15 i anmenn mwan lo 19(3)(b) lo son premye laliny 1 (3)(d) lo premye laliny.

Mon al lo paz nmero 16. Mr Chair *clause* 21(1) dezyenm laliny. Dan *clause* 21(1)(a) i annan lamannman maziskil. Dan *clause* 21 (1)(b) i annan en *deletion*. Dan *clause* 21 nmero 2.

### **MR DEPUTY SPEAKER**

I dwatet i annan en lespas la ant (c).

### **HON CLIFFORD ANDRE**

Ant (c) avek nmero 2 wi, i vin en lespas. Apre nou annan *clause* 21(2) osi lo dezyenm laliny i annan koreksyon e osi lo trwazyenm laliny.

Mon pou bouz lo *clause* 22 trwazyenm laliny, i annan

koreksyon ki nou'n agree. Dan *clause 23* lo dezyenm laliny.

Lo paz 17 *clause 24* lo dezyenm laliny. *Clause 25* lo paz 17 ankor, premye laliny i annan koreksyon. Dezyenm laliny i osi annan koreksyon sanzman mo sorti "*Authority*" pou vin "*Board*."

Epi nou'n *delete clause 25(2)* numero 2. Nou pou bouze Mr Chair lo paz numero 18, ki pou konmans dan *clause 27(c)* dan senkyenm laliny i annan en adisyon ki nou'n mete. Dan setyenm laliny osi i annan adisyon ki nou'n mete.

Dan *clause 27(a)* ek (o) dan katriyenm laliny i annan koreksyon ki zot in fer. Mr Chair, sa i konklir bann koreksyon ki *Bills Committee* avek *panel* ti'n agree dan nou *meeting Bills Committee* ki nou ti fer Mardi pase. Mersi.

### **MR DEPUTY SPEAKER**

Mersi Onorab. So sa i anmenn nou konklizyon nou Staz Komite lo *Seychelles Fisheries Authority Bill*. E nou ava demann Serzan pou *reconvene Assembly*.

So nou bezwen en Mosyon aprezan *from not LGB*, me selman *Chief Whip* ki ti *move initially for Third Reading of the Bill* silvouple *as amended*.

### **HON SANDY ARISSOL**

Bonzour Mr Speaker. Bonzour Minis avek ou lekip. Bonzour tou bann Manm Lasanble Nasyonal e tou dimoun ki pe swiv nou.

Mr Speaker, parey nou *Standing Orders* i fer provizyon mon oule *move* ki anba *order 76(1)* mon *move* ki *Bill Seychelles Fisheries Authority Bill, 2024 Bill No.10 of 2024* i ganny lir en Trwazyenm Fwa *this time round as amended*. Mersi bokou.

### **MR DEPUTY SPEAKER**

Mersi Onorab Arissol. E Onorab Esparon pou segonde.

### **HON REGINA ESPARON**

Mersi Mr Speaker. Bonzour tou dimoun a lekout. Mr Speaker, mon segonn Mosyon ki *The Seychelles Fisheries Authority Bill, 2024 as amended* i ganny lir en Trwazyenm Fwa. Mersi.

### **MR DEPUTY SPEAKER**

Mersi Onorab Esparon. Aprezan in ler pou nou pran en vot lo *Motion for Third Reading of the Bill as amended*.

Mon ava demann tou bann Manm ki an faver silvouple? Mersi bokou. Okenn Manm ki kont? Mersi.

Mersi Deputy Clerk. *Third Reading of The Seychelles*

*Fisheries Authority Bill, 2024 as amended* i annan 29 Manm ki'n vot an faver. Personn pa'n *abstain* e okenn Manm pa'n vot kont. Baze lo lakantite Manm prezan dan Lasanble Nasyonal ozordi bomaten, sa *Bill* in pase par inimanite. Mersi. Minister.

**DESIGNATED MINISTER**  
**JEAN-FRANCOIS FERRARI**

Mersi Mr Speaker. Bonzour tou dimoun. Bonzour tou bann Manm. Mon bezwen pran sa lokazyon pou mwan remersye Lasanble Nasyonal pou sa sipor inanim. I vreman fer mwan plezir pou vwar ki apre bokou bann tansyon, finalman i annan bann size ki nou kapab tonm dakor lo la. E sa i bon mesaz ki nou pe anvoye kot piblik ki fodre pa tou keksoz nou lager lo la. Zot in mon remersye bann Manm lo tou lede kote latap, ki'n rekonnet travay ki *SFA* pe fer, ki'n rekonnet travay bann travayer.

E laba bann manm *Board* e sa pou mwan i en vreman bon keksoz. I en - kekfwa i en fason ki anonse ki lavenir i ava en pe pli kolaboratif, mon pa konnen si sa mil Roupri ki Speaker ki ti tire ki'n aranz tou keksoz.

*(comments off-mic)*

**MR DEPUTY SPEAKER**

*Hold on.*

**DESIGNATED MINISTER**  
**JEAN-FRANCOIS FERRARI**

Non, be sa en pti fars.

*(comments off-mic)*

**DESIGNATED MINISTER**  
**JEAN-FRANCOIS FERRARI**

En pti fars, en pti fars mon pe fer. En pti *joke*.

**MR DEPUTY SPEAKER**

*Ok* Minis nou'n ganny ou mesaz, in *ok*. Mersi pou rekonnet travay ki Lasanble in *fer*. Mon pou bezwen demann Clerk aprezan pou *proceed* avek *Third Reading of the Bills* silvouple.

**DESIGNATED MINISTER**  
**JEAN-FRANCOIS FERRARI**

Mersi.

**MADAM DEPUTY CLERK**

Mersi Mr Speaker. *This act may be cited as The Seychelles Fisheries Authority Act, 2024.* Mersi.

**MR DEPUTY SPEAKER**

Mersi *Deputy*. Donk, sa in konklir nou travay lo *Seychelles Fisheries Authority Bill* e i reste mwan pou mwan remersi *panel* ki'n avek nou depi yer. *Panel* ki

ti dirize par Minis pour Lapes Mr Jean-Francois Ferrari e i ti akonpanyen par Mr Yannick Roucou ki *Legal Advisor* kot *Seychelles Fisheries Authority*, Mrs Irene Sirame ki *Legal Advisor* ki sorti dan Minister Lapes avek Lekonomi Ble e osi Mr Victor Hill *Assistant Principal Legal Draftsperson*. Mersi pou zwenn nou e mon ava swet zot bonn kontinyasyon lazournen ziska laprosenn fwa ki nou vwar zot dan Lasanble Nasyonal. Bonn zournen. I ok zot kapab fer zot depar.

Mon tann ou Onorab Lopozisyon dir oule en *point of order* mon oule ou dir mon egzaktaman anba ki *order* ou pe lev en pwen silvouple.

**HON SEBASTIEN PILLAY**

*Order* 8 (70), (71), (72), (73).

**MR DEPUTY SPEAKER**

Wi.

**HON SEBASTIEN PILLAY**

*Ok*, mon ti ava kontan konnen anba *Order* 8 an sa ki konsern *Order* (70), (71), (72), (73) ou'n deside pou ou sanz prosedir Lasanble lo ou menm.

En prosedir etabli par Lasanble e agree par *ruling* Speaker Roger Mancienne. E ou'n deside pran ou prop

lenterpretasyon *Standing Order* ozordi e met li an pratik.

Sa i montre nou poudir alors pou annan de kalite lenterpretasyon *Standing Order* dan Lasanble - enn ler Speaker Mancienne i dan *Chair*, enn ler ou dan *Chair*.

E Lasanble i mars lo presedans travay ki'n ganny etabli. E ou menm ou ler ou ti en Manm Lasanble ou'n toultan kestyonn *policy* lo bann *Bill*.

Dezyenmman anba *Order* 8 ankor enn fwa, ou donn en Minis apre ki Lasanble in fini fer son konsiderasyon lo en *Bill*, pou li vin fer en *statement* dan Lasanble ki mon krwar ou ti konnen i pe vin fer, zis pou li vin ensilte bann Manm dan Lopozisyon.

Sa bann kalite keksoz i bezwen arete dan sa Lasanble. *Either* ou swiv *Standing Order* parey tou dimoun *or* nou bezwen ganny en diskisyon serye kote nou pe ale avek Lasanble si lenplimantasyon *Standing Order* ler ou dan *Chair* ou pas dapre sa ki ou, ou anvi.

E mon pa krwar malerezman mon bezwen dir sa - mon pa krwar ou pe akt konman Deputy Speaker me ou pe akt konman Sekreter Zeneral *LDS* ler ou anpes Lopozisyon koze e donn Minis

sans fer sa bann komanter koumsa.

Mon bezwen met sa lo rikord Lasanble. E mon krwar sa i en size ki bezwen ganny *taken up* dan *ABC*, akoz *from now on* i enposib pou ou anpes Lopozisyon travay dan Lasanble ler ou dan *chair*. Mersi bokou.

### **MR DEPUTY SPEAKER**

Mersi pou ou komanter. In note e en *point of order* mon pa bezwen dir ou nanryen. Mersi.

Nou prosen *item* lo *Order Paper* se Mosyon. E premye Mosyon ki aparet lo *Order Paper* i dan non Manm Elekte pour distrik Ile Perseverance Onorab Desheila Bastienne. Mon ava envit ou pou prezant ou Mosyon ki i ava ganny segonde avan ki nou retourn lo ou lentervansyon. *Proceed* Onorab

### **HON DESHEILA BASTIENNE**

Mersi Mr Speaker. Bonzour Mr Speaker. Bonzour tou Manm Onorab. Bonzour tou dimoun a lekout.

Mr Speaker, mersi pou akord mwan sa privez pou mwan met sa Mosyon devan Lasanble ozordi, vi ki pou lemoman i en topik vreman, vreman so dan lo medya, preski toulezour nou pe tann sanmenm dan Nouvel.

Mon Mosyon Mr Speaker, i al koumsa ;

Etandonnen lenportans en lanvironnman zoli prop e sen dan lekonomi e byennet nou pei e nou nasyon, Lasanble i fer en lapel avek tou Seselwa, pou vin pli responsab e aret zet salte dan landrwa ki pa apropiye, e demann Gouvernman pou ranforsi Lalwa kont zet salte an bonnavini dan lanvironnman. Mersi Mr Speaker.

### **MR DEPUTY SPEAKER**

Mersi Onorab. E Mosyon i bezwen ganny segonde. Onorab Michel Roucou?

### **HON MICHEL ROUCOU**

Bonzour Mr Speaker. Bonzour a tous, bonzour tou dimoun ki dan lakour - tou bann koleg Onorab.

Mr Speaker mon annan plezir pou mon segonn Mosyon anmennen par *MNA* pour Perseverance Mrs Desheila Bastienne. Mersi.

### **MR DEPUTY SPEAKER**

Mersi Onorab. E aprezan in ariv ler pou mon donn Onorab letan pou li kapab zistifye son Mosyon devan Lasanble Nasyonal. *Proceed*.

### **HON DESHEILA BASTIENNE**

Mersi Mr Speaker. Mr Speaker, nou pti pei Sesel ozordi i ankor pe ganny apele Paradi dan *L'Ocean Indien*.

Bokou nasyonalite i menm dir ki Sesel i pli zoli pei dan *L'Ocean Indien*. Bokou etranze ki nou apel zot bann touris i reve pou vwar sa zour kot nou pou vin vizit Sesel, sa zoli pti pei.

Nou menm nou konman sitwayen nou prop pei, nou admet ki Sesel i en zoli pei e osi nou santi nou fyer letan etranze i dir nou ki nou pei i vreman zoli.

Me i annan en keksoz ki serten nou konman Seselwa sitwayen nou pei, nou pa pe vwar son lenportans.

Mr Speaker, en zoli pei i pa zis son lanmer, son laverdir, son bann zoli ros, son montanny bann zoli lans e osi son bann zoli batiman, me i enportan ki nou realize ki i annan en lot keksoz ki pli enportan ankor, ki atase avek sa *package*. E sa se lapropte nou pei an antye.

Mr Speaker, i bon note ki dan menm letan ki mon ti pe decide anmenn sa Mosyon devan Lasanble, ti annan ankor lezot dimoun ki ti pe fer plan lo menm size. E sa deza i montre nou ki annan sitwayen responsab, ki pe vwar danze ki

nou bann aksyon iresponsab pe anmennen pou nou pti pei.

Mr Speaker, pou mwan en tel Mosyon i pa fer vreman plezir pou koz lo la isi dan Lasanble. Akoz i pa gou pou asize e pe koz lo ki fason nou sipoze gard lapropte dan nou pei.

Me vi ki i annan partisipan ki ti dan Dyalog an Direk ki i ti fer sorti, ki Lalwa i pas isi dan sa Lasanble Mr Speaker, permet mon nonm son non, en partisipan Mr Laport dan Dyalog an Direk i ti menm demande ouvertman ki *DA* pe fer, ki *MNA* pe fer.

Mr Speaker, sa i en kestyon enportan. Me an menm tan nou tou nou konnen ki mannyer sa i marse. Lekel ki ekout *DA* ozordi? Lekel ki ekout *MNA*? Si en endividi i napa lord avek son prop lekor e i pa pran responsabilite pou son move aksyon, eski i pou ekout *DA*, i pou ekout *MNA*?

Aprè tou eski i responsabilite *MNA* ek *DA* dan tou distrik pou kontinyelman netway distrik e anmas salte ki serten endividi iresponsab i kontinyen zete partou kote?

Mr Speaker, mon vreman kontan ki avan mon Mosyon in vin dan sa Lasanble, i annan bokou in annan bokou koze lo lapropte nou lanvironnman, ki

form par nou pei an antye. E osi bann netwayaz ki'n ganny fer e ankor pe fer dan diferan distrik lo Mahe e osi lo nou bann zil.

Mr Speaker, lapropte nou pei i devret a tou pri priyorite e No.1. I enportan ki nou realize ki lekonomi nou pei, i depan bokou lo touris enkli nou dipen toulezour i vin atraver sa bann touris ki vin Sesel aköz son zoli lanvironnman e ki osi annan pou fer avek son lapropte.

Nou konman *MNA* ki annan responsabilite en distrik, nou vwar li vreman enportan e nesese pou vin avek en tel Mosyon, avek bi pou ede sansibiliz zabitan, ede etabli lord e vwar nesese pou annan respe dan nou lanvironnman.

Si i pa konmans par nou menm pou vin konsyan e gard nou pei prop, lekel ki pou vin fer pou nou?

Mr Speaker, salte dan piblik i konmans par en senp pti keksoz; en bouson limonnad, ou pe bwar ou labyer, ou bouson sopin labyer en papye draze, en *straw*, en lapo fri, ou bwat sigaret vid ouswa ou plastik ki ou'n fini manz ou sanmoussa, kot ou zis anvoy par lafnet ou transpor e ou tanpi konnen kote sa i tonbe e ki son reperkisyon

Sa bann tel keksoz parey eski nou pa ti kapab met li dan en sak e zet li dan bin letan nou'n ariv kot nou destinasyon? Eski i zistifye ki nou zis anvoy li par lafnet nou transpor lo semen?

Mr Speaker, i vreman sagrinan letan mon get bann adilt pe anvoy zot salte lo semen piblik par lafnet zot transpor. Zot madanm ek zot zanfan i la dan sa transpor e pe vwar tou sa bann aksyon, alor ki legzanp ou pe donner? Ki ou pou dir avek ou zanfan demen letan i fer parey? Letan zot in fini bwar zot limonnad ouswa zot labyer, zis ou vwar en sopin ki pase. E ki arive si ou tap en dimoun ouswa ou manke e ou andomaz sa enn transpor ki pe vini par deryer ou?

Mr Speaker, dezyenmman, annou pran nou prop lans, kot viziter i kontan pas zot sezour ki nou pe vwar? Malgre i annan bin tou salte i ganny kit lanmenm lo lans apre lafet. E si ou pa fer atansyon ou pe al mars dan malpropte osi.

Laprev in donner lo medya nasyonal *SBC 3* zour konsekitiv kot topik ti lo salte partou dan pei enkli nou bann lans. Ti vreman deplorab Mr Speaker. En msye ti dir dan Topik Konversasyon, *ban* piknik lo bann lans. Be si nou



Seselwa konman en pep nou pa rezouir e apresye nou labote nou bann lans, nou zanfan napa drwa al fer en piknik lo lans avek son bann zanmi, kote Lepep Seselwa pou al defoule?

Eski *ban* piknik lo lans i en sel opsyon pou gard lans prop? Oli nou responsabilite? Ouswa oli nou savwar viv? Oli nou lanmour prop?

Sa ki nou fer se nou eski nou anmenn partou kot nou ale?

Mr Speaker, *ban* aktivite dan en pei pa solisyon pou aret zet salte partou. Nou tou nou konnen ki pou arive si menm, si zanmen nou konmans koz lo *ban* aktivite lo lans ou menm dan pei. Kot ozordi ki nou pe vwar? *Housing estate* kot bann blok flat pe ganny konstri, dimoun pe reste dan flat, pe reste an kominote, i kont Lalwa pou fer tapaz pou *disturb* ou vwazen e byensir fanmir, ler in ariv en Dimans, zot ti a kontan al pas en letan lo lans e al detann zot.

Alor annou osi mazine ki pou arive ler nou napa bann tel aktivite. Pou annan en lot problem la ki pou ganny deklare.

Sa ki enportan se fodre nou, nou vin konsyan e nou aret zet salte partou. E sa i ava donn nou, nou plis privez pou

nou rezouir nou lanvironnman, rezouir nou lans.

Mr Speaker, a mon lavi en fason anmenn lord lo bann lans, nou pou enplor Minister konsernen, Minister pour Lanvironnman an kolaborasyon avek *LWMA*, pou sa posibilite re entrodwir en *task force* fors ki pase lo bann lans idantifye lekel sa endividi ki inisye en tel rankont ki zot pe fer lo bann lans spesifik, ou koz avek zot ou donn zot en pti pe ledikasyon ki zot sipoze pe fer apre zot parti.

Ou pran zot non sa dimoun ki ansarz ek son kontak e si letan pou repase pli tar landrwa i sal, byensir la penalti i pou bezwen ganny aplike. E fer li en penalti ki person pa pou le repet sa lofans ankor e osi aplik en pli kourt dele letan pou zot vin pey zot penalti.

Mr Speaker, sa legzersis ti mars tre byen a en letan sa legzersis kot en zofisye ti al lo bann lans, pou fer bann *spot check* pou gete lekel ki pe fer bann aktivite, ti mars tre byen. Zofisye ti al fer en pti letour lo bann lans, e sa ti fer ki lans ti reste prop.

Mr Speaker, en pti *incentive* osi pou sa bann dimoun ki ganny *assign* pou fer sa bann *spot check*, konman en pti *allowance* pou ankouraz zot

fer sa travay san ezitasyon. E i enportan ki nou bezwen konmans en pou nou gard lapropte dan nou pei.

Letan nou koz lo malpropte, i neser ki provizyon osi i ganny fer pou enstal twalet piblik pre ek bann lans ki tre popiler e ki ganny bokou frekante.

Mr Speaker, dan mon Mosyon osi pe demann Gouvernman pou ranforsi Lalwa ek *spot fines*, pou fer ki Seselwa i ava pran plis son responsabilite e vin pli konsyan dan ki fason zot merit pe depoz zot salte.

La mon pou refer sorti ki wi *fine* i la dan Lalwa deza, me nou santi ki i pa pe morde. I pa pe ganny aplike konman fodre, sankwa nou pa ti pou'n ariv sa zistans kot salte in vin en topik nasyonal ozordi. E i pe vreman vin en nwizans kot preski tou le swar dan Nouvel ou pe vwar en topik lo salte, en problem lo bann *bin site* ki pe ganny mal servi ozordi.

Eski nou konman sitwayen nou pei eski fodre ki nou ganny *fine*, pou nou konsyan ki fodre nou aret zet salte partou kote. Mr Speaker Seselwa i kapab fer pli byen ki sa.

Me dimoun la deor ki vreman konsernen avek labote

son pei se zot ki pe ensiste ki Lalwa i ranforsi, i vin pli sever lo sa bann problem zet salte partou dan nou lanvironnman. E mon pou dakor avek bann sitwayen responsab ki wi, Lalwa fodre ganny ranforsi e pli morde.

Mr Speaker, ki fer mwan vin pli determinen pou anmenn en tel Mosyon se sa gro problem zet salte ki pe arive dan mon distrik Perseverance li menm.

Ozordi Ile Perseverance in vin en dezyenm *landfill*, kot tou sa ki annan son salte i vin lo en *landfill* ki dapre zot i pli pre avek i pli fasil pou antre e i *free*. Zot pa bezwen peye pou zot vin zet zot salte.

Lontan zot ti fer li aswar pou pa remarke lekel ki fer sa e konmela zot tanpi konnen, zot vin zet zot salte nenport ler. I malere pou dir ki kontrakter i zet zot larestan debri konstriksyon kot bin, ouswa dan nenport landrwa kot zot vwar en pti brousay.

Zot fini meble zot bann apartman, zot zet tou zot bann bwat kartron vid lanmenm dan en kwen. Zot espekte LWMA ki pou vin anmase pou zot.

Sanmenm sa ki apel iresponsab tanpi konnen ki son lefe pli tar. Ki i pou ede soutir vermin tou sord kalite pes e

apre letan zabitan i ganny afekte lera, zot mont lo rezo sosyal *either* bann group i akiz Lotorite Distrik pou pa pran aksyon.

Eski se Lotorite Distrik ki zet salte partou dan Perseverance? Konbyen fwa zabitan in vwar *pickup* pase avek salte, ou menm ou vwar *pickup* pe zet salte dan distrik e zot in reste trankil?

Mr Speaker, mon mesaz ozordi I se ki nou tou nou vin responsab. Nou reste vizilan nou sofgard nou distrik ek nou pei. Nou montre sa bann dimoun iresponsab ki nou serye e nou *care* pou nou distrik.

Letan en *pickup* pe zet salte, nou demande ki zot tir son portre, pran limero sa transpor donn swa Lapolis ou kot Lotorite Distrik se sa se sel fason pou nou met en *stop* avek sa bann tel aksyon.

Fodre sakenn de nou nou donn lanmen lager pou gard lapropte dan nou distrik. Nou pa kapab toultan fye lo en dimoun pou fer pou nou. Mr Speaker, ozordi mon pou osi profite pou remersye en zabitan Perseverance ki pran son responsabilite e in raport transpor ki pe zet salte dan Perseverance; in raport de transpor e tou lede in ganny

*deal* avek e zot in ganny osi penalize.

Mersi pou sa zofisye Lapolis ki ti pran sa ka tre serye. I ti azir vitman e i ti montre sa bann dimoun ki zot sipoze annan respe pou sa distrik.

Mr Speaker, zefor kolektif nou tou kot nou tou nou pran nou responsabilite an konmansman depi kot nou prop lakour i dekouk dan nou distrik menm, fason azir lo semen piblik, e nou konnen ki nou fer avek nou salte ozordi ki nou pti pei reste pli prop pli ver avek en lanvironnman pli sen e zoli.

Mr Speaker, ankor si nou tou nou ti fer keksoz ki byen ler nou vwar en zanfan pe zet son papye *choco bar* ouswa gato, lo semen piblik nou ti fer li ranmase, ti a konmans ek en zanfan e i ti pou al fini avek en adilt ki pe azir iresponsab.

Ozordi nou ti pou napa en program salte dan paradi. I ti pou napa konpany anmas salte preski tou le 6 a 3 mwan tou le 3 a 6 mwan. E nou pa ti pou vwar en bato krwazyer parey *Peace Boat* pe ranmas salte lo nou lans.

Sa i vreman mal Mr Speaker. Parry Mr Jude Louange ti pe fer en program, i ti dir atraver en program lo

Radyo Sesel en Dimans bomaten, eski nou pa kanmi? Nou pa anbarase letan nou vwar etranze pe ranmas salte ki nou, nou'n zete lo nou prop lans dan nou lanvironnman? Mr Jude Louange ti annan rezon pou demann en tel keston.

Mr Speaker, me sa ki enteresan tou Seselwa letan zot *travel* zot al aletranze zot vin tre responsab. Zot konnen kote bin salte i ete, zot konnen ki si zot zet salte nenport landrwa ki son konsekans.

E parey zot konnen ki manner i servi *zebra crossing*, ki vites ou travers en *zebra crossing*. Me malerezman isi dan nou prop pei Sesel nou tanpi konnen. Nou fer sa ki nou oule e apre nou oule Gouvernman ki pey dimoun pou netway nou bann aksyon irresponsab, ki nou'n kit deryer.

Mr Speaker, avan mon terminen, mon pou pas lo enn de sif lo lakantite salte ki'n ganny ranmase par diferan group enkli *Peace Boat* dan nou pei Sesel dan lespas zis 2 mwan.

E la mon pou koz lo Me ek mwan Zen 2024. Me 2024 partisipan lo *Peace Boat* akonpanyen par serten manm NGO ti ranmas 115 pwen 50 kilo salte lo lans ek 40 kilo zis plastik.

Vandredi le 7 Zen, zanfan lekol Plaisance ti ranmas salte tou letour lekol Plaisance primer ek segonder ki zot ti ganny akonpanyen par zot bann ansenyan, MNA Richard Labrosse e osi MNA Audrey Vidot.

Sanmdi le 15 Zen travayer kot *IOT* ti ranmas salte lo bann lakot e al fini lo bann lans Perseverance ti tonm e lans Perseverance osi ti tonm ladan.

*Weekend 22 23 Zen LWMA* ti ranmas 141 tonn salte dan bann landrwa lo Mahe, Praslin e La Digue. *LWMA* pe kontinyen avek sa program ranmas salte partou lo Mahe e lo zil. E la salte ek bann debri konstriksyon in ganny tire kot 18 bin dan zis Ile Perseverance.

Mr Speaker, i enportan ki Lepep Seselwa i kontinyen konnen ki R53 milyon i ganny depanse zis pou tir salte dan en lannen. Si nou pti pei ti reste prop, Gouvernman pa ti ou bezwen depans tou sa larzan pou anmas salte. Me ti ava plito servi pli pti porsyon pou tir salte kot bann bin e gard larestan pou fer lezot depans ki pli nesese ankor.

Eski pou nou konman en pep nou vwar sa i normal? I gou e eski nou, eski pou nou sa i en sityasyon vreman zoli vizavi sa term ki nou kontan servi

Sesel paradi dan *L'Ocean Indien?*

Mr Speaker, ozordi mon pou osi salye e felisit *Management LWMA, Management Lekol Plaisance, Management* ek group travayer *IOT*, e osi bann lezot group ki pe mazin lo bann aktivite pozitiv, pou ede tir otan salte dan nou pei an antye.

Mr Speaker, mon pou demann mon bann koleg *en terminant* mon pou demann mon bann koleg Onorab pou siport sa Mosyon, pou ki nou ava fer lesansyel atraver plis sansibilizasyon dan nou pep, fer zot vin pli konsyan e pli responsab ver lapropte dan nou pei. Mersi.

### **MR DEPUTY SPEAKER**

Mersi Onorab Bastienne. E aprezan deba i ouver pou Manm azout zot lopinyon lo sa Mosyon ki devan nou. Onorab Roucou mon fek vwar ou lanmen, ou ti segonde ou le koz la ouswa? *Please proceed.*

### **HON MICHEL ROUCOU**

Mersi Mr Speaker. Bonzour ankor enn fwa. Mr Speaker, sa Mosyon anmennen par Onorab Bastienne i en Mosyon ki vremen enportan. En Mosyon ki pe lans en lapel avek nou tou la anndan e tou dimoun deor

dan nou pei, ki'n ariv en moman letan pou nou pran en moman pou nou realize ki zistans nou oule ale.

Akoz mon dir sa Mr Speaker. Ozordi ler ou fer en pti letour dan nou pei an antye, kot ou pase i pou bezwen annan en landrwa kot ou vwar poudir salte in akimile.

E nou rekonnet poudir se ki i annan bokou travay ki pe ganny fer pou kapab *deal* avek sa sityasyon salte.

Parey Onorab Bastienne in dir avan mwan, se ki in annan bokou program ledikasyon li menm li, bokou dyalog lo kote sa *issue* salte, ki pe konmans vin en gro problem dan bann kominote dan lavil li menm li, dan semen partou kot ou pase.

Mr Speaker, ozordi i annan bokou dimoun nou asize nou koz bokou lo ledikasyon. E ki nou vwar, i annan bokou ledikasyon, be malgre ki nou vwar i annan tre pe nou ki pare pou form par sa ledikasyon. Dan ki fason?

Ozordi ou pase dan semen i annan bokou dimoun ki ou vwar zot zis bonnavini pe zet salte. Responsabilite ki manner pou plas zot salte dan bin. Responsabilite ki manner bann biznes zot pou deplase pou zot al zet zot salte lo

*landfill*. Responsabilite nou bann zanfan dan lakour lekol, dan semen, ki montre ki fason nou pou servi en bin.

Mr Speaker, parey mon kestyon ki mon ti anmennen, semenn pase kot mon ti demann avek Minis pour Lanvironnman *regarding* bann *bin site* ki pe ganny demande pou ganny tire, swa lo bann propriyete kot obor bann lakour prive, ouswa lo bann propriyete prive.

E ozordi ki nou vwar Mr Speaker, zis en konparezon, zis dan mon distrik i annan apepre 3 *request* ki'n ganny demande pou tir *bin site*. Enn mon kapab ganny en konpran, en madanm i pe al fer son devlopman lakour e lot zis aköz nou vwar lafason ki *bin site* pe ganny servi.

E salte Mr Speaker, salte i pa ariv li menm li obor bin li. I se nou imen ki bezwen al depoz nou salte dan bin. E lafason ki nou fer li aprezan i afekte bann ki reste en pti pe pli pros. Eski pa ti ava byen si demen tou dimoun i vini pe plas zot salte byen dan bin e kit sa landrwa otour bin prop?

Kot sa ti ava evite kot nou annan bokou rekomandasyon ozordi pou tir *bin site* obor bann lakour. E osi dan lefase nou ti vwar poudir ti annan bann dimoun ki annan zot zannimo

Mr Speaker; lontan zannimo ler i mor, dimoun ti antere. E konmela nou vwar poudir dimoun pe pran zannimo pe zet dan *bin site*.

E tousala i zwe en rol lo nivo lizyenn. E osi Mr Speaker ler sa i arive, nou bezwen realize poudir enn nou frer ki demen i vini i pase pou tir sa salte.

Ozordi Mr Speaker, lazans ki zer salte i annan bokou pti kontrakter ki fer netwayaz distrik dan semen partou.

E nou vwar poudir sa lazans tanzantan pe antreprann i menm mon ti pe regard zot paz, lo la i annan bokou ledikasyon an term ki mannyer dimoun pou ranmas salte, ki mannyer pou zwer bann *bin site*.

Nou annan kontrakter osi ki okip bann *bin site* Mr Speaker. Be ki nou vwar nou Manm piblik ki rol nou zwen ladan? E sa ki mon'n ganny dir poudir se ki nou annan i par an i kout 153 milyon Mr Speaker.

Zis mazine nou kapab servi sa larzan pou investir li dan en lot keksoz. E sa ti pou ede Mr Speaker, dan plas nou pran bokou larzan i vre ki nou bezwen met larzan pou nou kapab kit nou zoli pei prop. Be selman *still* nou vwar poudir i mank responsabilite an term

swa granmoun li menm li swa an term lo kote zanfan.

E mwan mon krwar poudir an term dan bann lekol, nou bezwen anmenn plis sa ledikasyon poudir ek zanfan ki manner pou zet salte.

Mr Speaker, zis mon ava dir ou i vre ozordi poudir nou'n annan bann kontrakter ki ganny kontra ki manner pou netway bann lekol pou kit bann lekol prop. Me selman pa akoz sa ki kapab anpese pou nou kapab fer manrmay aprann ki manner pou ranmas salte.

Zis en pe letan pase Mr Speaker, mon'n vizit en laklas, akoz nou ti annan en aktivite *sport* nou'n demann avek lekol pou prêt nou pou ed nou avek kouran, ki nou'n bezwen fer li atraver en laklas Mr Speaker, mon ti antre dan en laklas en *weekend* sa, bwat manze in ganny kite la, manze i ankor ladan.

E zanfan i bezwen ganny endike pli byen. E mon krwar poudir dan sak laklas Mr Speaker mon pa konnen si i annan i bezwen annan en bin la ki zanfan i kapab depoz zot salte byen ladan.

E osi Mr Speaker, ozordi atraver lazans bann *bin site* i ganny mete otour bann distrik. Nou bann *bin site* pe ganny abize.

I annan bokou dimoun ki swa zot ganny bann Kontra prive pou zot tir bann salte, ouswa i annan bann salte ki pe sorti swa kot bann landrwa prive swa biznes, swa lakour kot dan plas ganny anmennen lo *landfill* zot ganny mete obor bin.

Zis pa bokou letan pase Mr Speaker, kot lakour Mrs Romain anler Foret Noire, obor *Ex Mont Royale*, de fwa in bezwen vini i vwar li pe tir salte akoz son larantre in ganny bloke avek vye tol, vye bout dibwa, bann vye keksoz materyo Mr Speaker.

E mon mazine poudir dan bann sironstans koumsa, nou bezwen nou pep Seselwa bann dimoun dan kominote, pou nou met en lizye pou gete lekel sa bann dimoun ki aksyon i kapab ganny pran avek zot. Akoz nou pa pou kapab kontinyen koumsa.

Menm dan bann letan Mr Speaker kot i annan *Clean Up The World, landfill* i pou nanryen, nou demann avek bann ki annan transpor pou zot kapab monte pou zot al *dispose* zot salte lo *landfill*.

E lakantite salte ek lannen ki vini lannen ki'n pase Mr Speaker, salte pe pli ale pe vin plis. Ozordi annou fer en pti letour dan lavil Mr Speaker,

dan Lavil li menm li - i vre i en landrwa ki bizi dan lasemenn, bokou landrwa ki nou pase i annan bann salte ki ganny kite, bwat *take away* li menm li, plastik partou.

E la mon oule tir mon sapo avek mon vwar dan bomaten Mr Speaker, nou vwar bann madanm i annan de madanm aze ou kapab dir mon vwar zot tou le bomaten zot pe balye, pe fer sir poudir nou lavil i prop. I annan enn ki mon byen avek li Marie-Andre Jupiter en zabitan Perseverance kot loter Mosyon.

Mon tir sapo avek li aköz toultan in la, mon'n konn li depi lontan pe kontinyelman fer sa louvraz.

Mr Speaker, me selman mon lot pwen ki mon anvi tous lo la se *enforcement*. Mon krwar poudir Sesel nou enn parmi bann pei kot nou annan bokou Lalwa ki'n ganny met an plas. Be selman nou bezwen dir avek bann ki annan sa responsabilite, pou pran aksyon avek bann ki pe kas Lalwa pou zot vin pli serye.

Vin pli serye kot la petet ler Lalwa in ganny pran, bann dimoun ki pe komet sa bann lofans, zot ava kapab la e osi fodre mont lo televizyon dir poudir tel dimoun swa tel transpor nimero transpor in ganny vwar, oubyen apre

*investigation* ki'n fer *illegal dumping* ouswa tel dimoun ki pa'n *dispose* son salte byen, ki aksyon i ganny pran ek li.

Be ziska ozordi eski nou annan okenn dimoun ki nou'n ganny tande poudir aksyon in ganny pran kont zot? Zis Kan Tobrourk dan mon distrik Mr Speaker, ti annan en letan aköz i annan en landrwa kot i izole, tanzantan ler ou pase mwan mon kontan al fer en pti marse laba, i annan dimoun ti pe fer *illegal dumping*. Nou pa pou kapab kontinyen koumsa.

E sansan nou, nou en pei ki depan bokou lo touris Mr Speaker. E konmela partou dan bann kominote avek bokou dimoun ki pe antre dan biznes touris, nou vwar poudir konmela touris i pa zis obor lans, touris i partou dan Kominote, touris i marse, i frekant zabitan, ler zot vwar bann keksoz koumsa i pou dekouraz zot.

E ozordi ek teknolozi Mr Speaker, i kapab tir en portre met en vilen zimaz lo nou.

E mwan mon panse poudir se ki sa zafer salte i pa zis devwar Gouvernman, i devwar tou Seselwa la deor, pou nou kapab pran sa responsabilite.

E mwan mon panse poudir lazans i annan ki annan



sa responsabilite pou zer salte, i devret met plis zefor lo bann biznes, akoz souvandfwa zot menm zot ki ranpli plis nou bann *bin site* dan kominote, dan plas annan en kontra avek en dimoun ki annan sa responsabilite tir salte, bokou zot zot pe pran zot salte zot bann kes kartron vid, bann keksoz ki sorti swa lo zot biznes, menm bann dimoun konstriksyon zot osi zot zwe en rol ladan, zot vini zot vin ranpli nou bann bin, ki aprezan bann ki bezwen vin met salte napa plas e bezwen met salte lanmenm la ater.

E mwan monpanse lo kote sa bout *enforcement* Mr Speaker, i bezwen annan en keksoz ki ganny fer. I bezwen annan kek dimoun ki demen, Lalwa i pou bezwen ganny pran kont zot kot demen i ava anmenn en lesou pou bann ki deza pe fer li, pou ede ki nou kominote nou pei li menm li, i reste sa landrwa kot touris i kontinyen vizite. I en landrwa ki gou, kot nou menm nou, nou kontan reste.

E osi Mr Speaker, ozordi i annan bokou bann dimoun ki zot koup zot bann vizitasyon kot zot Mr Speaker, vizitasyon ozordi nou pe koz konpos. Be ler nou koup nou bann vizitasyon nou kapab met li en

landrwa kot demen nou kapab servi li ler in pouri.

E ler nou pran nou pe met obor bin, e lazans *LWMA* li i annan son letan ki tir kalite salte li, pa toultan ki i vini i tir bann vye bout tol *washing machine* - war?

E ler i reste la nou menm nou ki konplent. Nou menm nou ki vini ki met lo *Facebook* ki kraze ki dir la la salte pa'n tire. Akoz ? Akoz nou menm nou, i annan nou ki nou pa pe pran nou responsabilite.

E ler nou koup nou bann vizitasyon kot nou, nou kapab poz li en ptigin akote, ouswa nou al zet li direkteman lo *landfill*, annou pa vini pou ranpli bann *bin site*.

E mwan mon'n deza *witness* Mr Speaker, kot en dimoun dan bis mon pa konnen in bwar son *juice* i pran i anvoy par lafnet.

E mwan monpanse poudir se ki i responsabilite nou tou, kot *once* kot nou vwar en dimoun fer sa, nou bezwen dir li. Nou bezwen apros li. En zanfan lekol ki annan son *take away*, en paran ki anvoy son zanfan al zet salte, nou bezwen eksplik li byen pou kapab konnen ki mannyer pou met salte byen dan bin. Dan plas met ater ki lisyen i vini.

E osi Mr Speaker, ozordi, nou annan bann dimoun ki pe anmas *pet* ki fouy dan bin. Vre zot pe ede lo en kote, zot ede pou anmas bann boutey *pet* parla. Be ler zot vin tir bann *pet* dan bin, zot osi zot bezwen anmas bann salte ki zot in tire. Akoz souvandfwa nou vwar zot vini zot tir salte dan bin, zot pran zot bann *pet* boutey apre zot kit sa bann salte lanmenm.

E sa bann dimoun si an ka i annan zot pe fer sa, sa osi i bezwen pran aksyon kont zot Mr Speaker.

Mr Speaker, mwan mon pou donn mon sipor sa Mosyon anmennen par Onorab Bastienne, akoz mon vwar poudir i vreman enportan dan sa letan ki nou pe viv konman en pei ki depan bokou lo touris, e osi pou nou menm nou lo nivo salte, kantite salte nou bezwen fer sir ki nou pe kit nou lanvironnman prop, menm tanzantan ou tann Minister Lasante pe anvoy mesaz fer sir poudir ou fer letour lakour, napa okenn keksoz ki pe gard delo ki ou kapab dir i annan bokou moustik kot lakaz Mr Speaker.

E mwan mon krwar si sakenn de nou, nou zwe en rol kot nou pran nou responsabilite, nou donn lanmen Gouvernman dan sa

travay ki pe ganny fer, mon krwar poudir nou pou vin en pei pli prop ki i ete la e en pei pli an bonn sante li menm li, kot nou kapab anmenn plis sa ledikasyon parmi nou bann zenn li menm li, zer byen nou bann bin dan kominote akoz i vreman enportan pou nou si napa Mr Speaker. Bokou landrwa kot *bin site* i ganny tire, ou vwar dimoun i kontinyelman met salte lanmenm.

E pli ale ek letan Mr Speaker, bann dimoun pou bezwen tou dimoun pou demande pou tir bin salte obor zot lakour. E si napa sa travay ki ganny fer par nou tou, Mr Speaker nou pou dan problemm avek salte. E nou bezwen ankouraz bann, akoz sansan plis ek letan nou pou vwar Minister Lanvironnman avek Finans pe met plis larzan pou fer plis netwayaz, pou tir plis salte.

E bann ki reste obor larivyer osi tou, zot bezwen annan sa responsabilite pou fer sir zot ki reste obor larivyer ki salte ki sorti kot lakour i ganny mete dan bin, i pa ganny zet obor larivyer, ki apre i al *end up* dan delo sale ouswa i al *end up* pli ba ki al afekte bann dimoun pli ba.

Mr Speaker, mon pou donn mon sipor lo sa Mosyon

akoz mon krwar poudir i en Mosyon vreman, vreman, vreman enportan e mon krwar parey bann ki annan sa responsabilite pou zot kapab *enforcement* lo bann ki pe kas Lalwa an term lo kote salte, nou bezwen met plis zefor ankor, pou kot i annan plis *investigation*, kot ler i annan bann salte bann *illegal dumping* nou pa zis vini monte tire, nou bezwen fer *investigation* rode lekel sa dimoun ki'n pran sa bann salte ki'n met la kot aksyon i kapab ganny pran kont zot Mr Speaker. Mersi.

### **MR DEPUTY SPEAKER**

Mersi Onorab Roucou. Prosenman lo mon lalis Onorab Labonte 15 minit pou *ok* pou ou ki nou ava kapab *adjourn* 10 er edmi? *Ok very good. Please proceed.*

### **HON ANDY LABONTE**

Mersi Mr Speaker. Mr Speaker, tou mon koleg Onorab, Sekretarya, *staff* Lasanble Nasyonal, zabitan Lariviere Anglaise Lepep Seselwa bonzour.

Mr Speaker, nou bezwen kontinyen dir mersi Bondye papa ki'n kree sa liniver. E nou konman sa pep Seselwa nou'n ganny beni avek enn bann pli zoli pei dan lemond. Konman

en pep beni, nou sanse ki ziska konmela nou pa ankor konnen ki savedir lager Mr Speaker.

Nou fek fini selebre lafet nou endepandan le 29 Zen e pli boner le 18 Zen nou ti selebre laniverser nou Konstitisyon.

E Mr Speaker, kouler nou paviyon ki ble, zonn, rouz, blan e ver i reprezant nou lanatir nou lanvironnman natirel.

E nou Konstitisyon dan son preanbil, i dir dan premye paragaf, "Nou pep Sesel nou rekonesan anver Bondye nou Tou Pwisan ki nou reste dan en n bann pli zoli pti pei dan lemond."

E dan dernyen paragaf, dan "deklarasyon solanelman nou lobligasyon ferm dan nou trwazyenm repiblik pou ede prezerv en lanvironnman sen e sof e fonksyonnel pou nou menm ek nou prosperite."

Alors Mr Speaker, mon konmans koumsa akoz si zis nou met anvaler nou paviyon e nou Konstitisyon ki gid nou konman en Nasyon, nou pa pou zanmen zet salte partou kote.

Alor sa Mosyon anmennen par Onorab Bastienne i annan bokou sans e bokou valer. E nou konman en pep Mr Speaker, konman sa Nasyon ki'n ganny beni avek enn bann pli zoli pei dan lemond, nou bezwen kontinyen gard nou pei

prop pou ki bann touris, bann viziter ki vin dan nou pei parey in ganny dir, zot kontinyen apresye e vwar labote ki nou pei in anmennen.

Mr Speaker, Onorab Bastienne ler in prezant son Mosyon in fer sorti plizyer pwen. E mon koleg Onorab Roucou i osi in fer sorti bokou lezot pwen e mon pa pou vreman long, me selman mon pou azout enn de pti keksoz lo sa bann pwen ki'n ganny sorti.

An konsernen ledikasyon Mr Speaker, ledikasyon nou pandan mon letan Mr Speaker, mon mazin tre byen ki ler nou ti lekol, se nou bann etidyan li ti netway nou laklas apre en zournen ki nou'n pase. Ti annan bann diferan group. Ozordi i mon group, demen i mon group oubyen 3 nou 4 nou, nou ti fer li par nou trou.

Me konmela ki nou vwar, i pli zou mwen se ki nou annan bann adilt ki la konman bann *cleaners* se zot ki netway laklas pou nou zanfane. E mon krwar sa i en pratik ki nou kapab revwar.

Mon pou osi rekonnet ki menm isi kot Lasanble ler nou vini, se ki nou vwar sa bann madanm ki pe netway landrwa. E zot ede pe kit lapropte avek nou. Sa i bann ledikasyon ki nou bezwen kontinyen ekilke

dan nou konman en nasyon pou nou vwar nesese pou nou gard nou lanvironnman prop sen e sof.

Mr Speaker, nou'n vwar anba program *SeyCCAT* ti annan 3 zenn ki Mervin Cedras, Marcus Quatre avek en lot garson, zot ti antreprann en proze *Clean Up Project* ki zot ti netway losean. E sa bann salte ki mannyer in fer pou ariv dan losean dan diferan fason.

Parey in ganny dir oparavan i annan par atraver bann piknik ki nou fer e menm bann bato osi ki lo lanmer ki osi zot ede polye nou losean.

Alor Mr Speaker, i montre nou poudir nou viv dan en lemond global, me nou konman en nasyon nou bezwen pran nou responsabilite pou nou endik nou zanfane lo ki valer pou nou gard nou pei prop, ki koumsa nou kapab anpes bann vermin.

E an di-z-an sa Mr Speaker, mon pou pran sa lokasyon pou mwan felisit bann kontrakter, bann pti kontrakter dan mon distrik English River, la mon mazin partikilyerman i annan en zenn ki'n fek rantre ladan, i apel Dylan, i pe fer li en travay vreman ekstraordiner, ki i pe ede netway kominote kit li prop. I annan menm Mrs Wilna Mathiot avek son fiy ki i pe fer

en travay; i annan Keddy avek Una Savy ki pe fer en travay. I annan Marie-Ange Joubert, i annan Mifa Moira se bann dimoun ki pe ede pou kit nou pei prop. E mon pou felisit zot e tou bann lezot kontrakter.

Mon pou osi pran sa lokazyon pou felisit LWMA pou sa travay ki zot pe fer. Me par kont Mr Speaker, ki nou vwar se ki ler sa bann dimoun pe fer sa travay i annan serten endividi ki zot odasye, zot odasye e ki malgre zot vwar poudir i annan serten endividi pe ede pou netway landrwa, me zot, zot pase dan zot transpor, zot kontinyelman pe zet salte an deor zot transpor.

Ki mon krwar ankor enn fwa ledikasyon ki nou bezwen mazine se ki nou kapab kit nou salte dan en plastik avek nou dan nou transpor e ler nou ariv obor en bin nou pran sa bann salte nou depoz li dan en bis dan son fason ki apropiye.

Mr Speaker, i osi annan bann kontrakter - bann kontrakter ki apard netway semen, i annan bann kontrakter ki tir bin.

E ankor enn fwa ki nou pe vwar Mr Speaker, nou pe vwar ki nou zenn pa pe oule pran sa bann travay. Nou vwar pli zou mwenn *Indien* oubyen

*Bangladeshi*. Akoz nou krwar poudir sa travay i enferyer.

Me Mr Speaker, i ankor enn fwa ledikasyon pou nou fer vwar poudir tou travay i annan son valer. E alor nou bezwen ankouraz nou bann zenn, pou zot osi kapab pran bann travay parey, akoz i ede pou kit nou pei prop e annord.

Mr Speaker, nou bezwen osi onnet; nou bezwen onnet pou nou aksepte ki sa problem salte i pa en problem ki, i konsern zis Gouvernman ou Biro Distrik, *MNA*, *DA* parey in ganny dir oparavan.

Me i en travay ki nou tou nou bezwen vwar lesansyel pou nou gard nou pei prop. E parfwa Mr Speaker, ki mon pou bezwen dir, mwan ler mon war bann zabitan ou endividi i konport zot dan bann fason kot zot depoz zot salte partou kote, mon zis demande, me eski devan nou laport i parey? Eski se sa ki nou fer se nou?

So nou bezwen realize, poudir si nou kot nou lakaz nou kit prop, me larout piblik nou pa kapab kit prop alor nou annan en problem *somewhere*.

E la i fer mon mazin serten endividi, ki ler nou nou'n netway se nou, nou pran tou salte ki kot nou swa nou depoz li lo propriyete nou kanmarad,

oubyen nou depoz nou salte lo propriyete Gouvernman, kot apre nou espekte pey dimoun ankor pou al fer sa bann tel netwayaz akoz mwan kot mon i prop, me selman sa ki an deor mon baro pa konsern mon. E ankor enn fwa i vin lo ledikasyon.

Mon mazin mon letan zenn, letan mon ti ankor zenn Mr Speaker, dan Sanmdi dan letan vakans *at least* enn par semenn tou le Sanmdi, mon manman, mon tantin nou tou ki la bann zanfan nou netway nou semen. Akoz nou konnen se nou ki pe pas dan sa bann semen. Me konmela pa sa ki nou vwar, tou netwayaz se ki Gouvernman ki bezwen fer. E ankor enn fwa i ledikasyon.

Mr Speaker, se sa ki mon vwar ki sa Mosyon i en Mosyon ekstrememan enportan e i annan nesesite pou nou revwar Lalwa lafason ki i *deal* ek bann dimoun ki pa konport zot dan en fason apropiye.

Akoz si nou ranforsi Lalwa avek en zabitan ler ki i pa met dizon - en drayver par egzanp ki pa met son *seat belt*, me akoz ki ler en drayver i zet son salte deor ki Lalwa pa kapab pran ka avek sa. Me ankor enn fwa i depan dan ki fason nou pou aforsi Lalwa ki nou pou bezwen

rod lafason pou nou kapab fer li.

So Mr Speaker, dan sa lespri ki mwan mon pou dir ki lanvironnman i en keksoz ki enportan. E si nou lanvironnman i sal, i annan en lenpak lo nou lasante, lo nou lasante konman en imen, lo nou lasante konman en pep. E nou tou ki la anndan enkli plizyer Seselwa nou'n vizit plizyer lezot landrwa. Me en konsey ki ankor enn fwa mon paran in toultan in donn mwan se ki ler nou al dan en landrwa toultan pran bann bon pratik.

E mon krwar ler nou al vizit bann landrwa, nou vwar bann landrwa ki mannyer i prop, i annord sirtou bann park ler nou ale aletranze i ed nou pou nou reflexir ki mannyer nou, nou ti ava swete gard nou pei prop.

E en senp pti legzanp Mr Speaker, ozordi English River nou vwar poudir Stad Lanmizik in ganny mete kot English River, e nou deza sibir parler bann problemn son, ki en polisyon e zabitan i sey viv avek i sey aksepte.

Me nou ganny en lot problemn. Apre en sware ki'n annan en *show* anvil, ou vwar salte in ganny zete partou kote. E ankor enn fwa i vin lo ledikasyon.

Alor ler nou pe anmize nou oubliye poudir nou bezwen anmiz dan lape e dan lord, me *at the same time* nou bezwen gard nou lanvironnman prop. So lanmen bomaten ki ou vwar, ou vwar ankò.

E mwan mon al lanmes tou le Dimans bomaten si sa *show* in fer Sanmdi bomaten, parler ler ou pe pase Dimans granmaten be Mr Speaker salte i ranpli dan Victoria, *or* ou vwar bann dimoun ankò ki pe ganny peye pou netway salte ki nou ki'n anmize yer swa nou'n zete.

E parfwa ler nou distrik nou pran linisyativ pou nou netway serten kanton serten landrwa kot nou vwar i sal, ki nou vwar Mr Speaker? Sa menm zabitan li i pe asize anba son lavarang, i get nou e nou, nou pe tir salte obor son lakaz dan son zalantour. Dan plas vin donn ou en koudmen, ankò enn fwa i vin ledikasyon.

Alor Mr Speaker, mwan dan sa lespri ki mon krwar poudir nou konman en Nasyon nou bezwen mazin byennet nou pei e lapropte i en keksoz ki ekstrememan enportan konman en nasyon e pou Lasante nou pep.

Alor Mr Speaker, avek sa de mo 10 er 30 in arive ki nou pe al *break*, mon pou dir ki mon pou donn mon sipor sa Mosyon

Mr Speaker e konmansman par nou isi dan Lasanble, ki nou pran nou responsabilite nou osi e nou anmenn sa dan nou kominote.

E nou endik nou zanfan e bann ansenyan osi i fer parey ki nou kapab gard pei prop e annord ki bann touris, bann etranze bann viziter ler i vin Sesel, zot ava vreman apresye vwar ki mannyer nou konman en nasyon, nou pa zis nou pei ki zoli nou lans i zoli parey nou Konstitisyon i dir, parey i ganny dir parey nou paviyon ki *portray* sa me i ava en keksoz ki nou pe viv li dan nou lavi toulezour.

Alor Mr Speaker, avek sa de mo, mon pou termin la e mon pou dir Onorab Bastienne ki mon pou donn *full* mon sipor sa e mon anvi ki pep Seselwa an antye i vin *onboard* pou nou ede gard nou pei prop. Mersi Mr Speaker.

### **MR DEPUTY SPEAKER**

Mersi Onorab Labonte. Mersi pou gard ou parol pou donn mikro 10 er edmi. Donk nou pou *adjourn* la e nou ava rezwenn 11 er pou kontinyasyon deba lo Mosyon table par Onorab Bastienne.

***(BREAK)***

### **MR DEPUTY SPEAKER**

*Welcome back* tou dimoun e bonzour bann ki fek zwenn nou pou travay Lasanble Nasyonal ozordi Merkrede. Nou pe diskite en Mosyon an se moman - en Mosyon table par Manm Elekte pour Ile Perseverance Onorab Desheila Bastienne ki lir koumsa,

“Etandonnen lenportans en lanvironnman zoli prop e sen dan lekonomi e byennet nou pei nou nasyon, Lasanble i fer en lapel avek tou Seselwa pou vin pli responsab e aret zet salte dan landrwa ki pa apropiye, e demann Gouvernman pou ranforsi Lalwa kont zet salte an bonnavini dan lanvironnman.”

Prosen Manm ki'n eksprim lentansyon pou entervenir lo sa Mosyon se Onorab Phillip Arissol.

### **HON PHILLIP ARISSOL**

Mersi Mr Speaker. Bonzour Mr Speaker, tou koleg Onorab e tou dimoun ki pe swiv nou.

Mersi Mr Speaker, pou donn mon loportinite pou adres sa Lasanble lo en size ki i annan gran lenportans, lapropte, nou zoli pei Sesel.

Pandan ki nou Lasanble isi antoure par en peizaz e zoli lans ki definir nou Nasyon i enportan pou nou reflexir lo lenportans pou prezerv e protez

nou lanvironnman pou nou zenerasyon ki pe vini.

Sesel avek son labonte natirel, e son byen biodiversite ris i en vre pti perl *L'Ocean Indien*.

Nou delo tirkwaz, lans ek disab blan e lavi maren, vibran, i fer Sesel enn parmi bann destinasyon pli reserse pou touris ki sorti dan diferan kwen lemond.

Sepandan, zimaz ideal nou zil i anmase par fleo salte, popilasyon e pratik zesyon salte ki pa apropiye.

Mr Speaker, letan lapropte Sesel i prezant en defi irzan ki demann nou latansyon imedya. Malgre tou bann bon zefor, nou touzour zwenn salte ki'n anvair lans, ki ankonbre nou semen e nou bann zil elwanye e ki pe polye nou ekosistenm maren.

Dese plastik an partikilye i aparet konman en danze environnmental ki afekte non selman nou lespes maren sovaz, me osi lasante e byennet nou kominote.

Mr Speaker, responsabilite sak endividi i enportan dan sa misyon pou en Sesel ki pli prop.

Wi, mon dir sak endividi. Sakenn ant nou i merit zwe nou rol konman gardyen nou lanvironnman e pran mezir



proaktif pou gard lapropte dan nou lavi sak zour.

Ler nou adopte en pratik dirab, ler nou redwir nou lendepandans lo itilizasyon plastik e partisip dan linisyativ netwayaz kominote, nou kapab kolektivman fer en diferans sibstansyel dan prezerv labote natirel nou bann zil.

Gouvernman Sesel in enplimant plizyer linisyativ e program, ki vize pou adres sa problem lapropte. Tel ki en *ban* total lo plastik, *Clean Up The World campaign* an Septanm, kot tou dimoun dan zot distrik respektif, i ganny ankouraze pou retir zot salte e depoz lo *landfill*. Sa zour *landfill* i *free* ouswa sa semenn sa *weekend landfill* i *free*.

Mr Speaker, nou bezwen kontinyen reste vizilan avek inovasyon dan nou lapros. Nou bezwen evalye efikasite stratezi ki egziste deza; idantifye domenn pou amelyore e kontinyen avek en plan konplet pou ankouraz en kiltir apropiye pou zer nou lanvironnman atraver nou Nasyon.

Mr Speaker, kolaborasyon e partenarya, i esansyel dan nou zefor pou reisi konbat fleo salte ek polisyon.

Ler nou travay lanmen dan lanmen ek lazans

Gouvernman, lorganizasyon non governmantal e biznes, nou kapab ogmant lekspertiz kolektiv ek resours pou anmenn sanzman ki fer sans. Langazman kominote dan kanpany netwayaz, kanpany resiklaz e latelye dan devlopman dirab pou ogmant nou lenpak e enspir en sans responsabilite partaze pou nou lanvironnman.

Mr Speaker, ledikasyon ek konsyantizasyon i zwe en rol esansyel dan form latitid e konportman an ver lapropte.

Ler nou entegre ledikasyon anvironnmental dan program lekol, ler nou lans kanpany sansibilizasyon piblik e nou profit pouwar platform *digital* pou difiz lenformasyon, nou kapab *empower* sak endividi pou fer en swa enformen e defann pratik dirab dan nou lavi sak zour.

Ranforsman regilasyon i en eleman enportan dan stratezi pou mentenir standar lapropte. Ranforsi Lalwa ki egziste deza, met an aplikasyon mekaniz sirveyans solid e enpoz penalti lo endividi ouswa group ki pa respekte regleman.

Sa a servi konman prezantif dan konportman iresponsab e ranforsi

lenportans konformite avek respe norm lapropte.

Pandan ki nou pe antre dan sa voyaz kolektiv dan direksyon pou en Sesel ki pli prop, annou retir lenspirasyon dan linisyativ lapropte ki'n en sikse swa dan en pei aletranze ki nou'n vizite, ouswa menm en zil ouswa non en distrik ki nou'n vwar.

Annou felisit selebre sa bann endividi enkonni dan nou kominote ki deza ki dedye tou zot letan e zefor pou prezerv nou lanvironnman e gard nou pei prop. Defann sanzman pozitiv.

Pou fini, mon lans en lapel avek sakenn parmi nou pou nou anbras sa lapel pou en Sesel pli prop, annou debout ansanm dan sa langazman. Annou raport nou sipor pou Mosyon Onorab Bastienne. Mersi Mr Speaker.

### **MR DEPUTY SPEAKER**

Mersi Onorab Arissol. Mon pou donn laparol Onorab Romain.

### **HON GEORGES ROMAIN**

Mersi Mr Speaker. Bonzour tou koleg Onorab e tou dimoun ki a lekout.

Mr Speaker, mon pou donn mon sipor pou sa Mosyon ki devan nou anmennen par

Onorab Desheila Bastienne, akoz i enn ki afekte nou tou dan en fason ou en lot.

Akoz nou osi rekonnèt ki lenpak ki en lanvironnman sen, zoli e prop, i annan prosperite nou lekonomi e byennet nou pei Sesel.

Labonte natirel nou pei i en keksoz enportan pou lentegrite nou lekonomi e i devret en sours lafyerte pou nou tou konman Seselwa.

Mr Speaker, nou konnen ki Sesel i en destinasyon touristik e ki bokou viziter i sorti dan plizyer parti lemonn pou vin pas zot vakans Sesel. Zot vin vizit nou zil pou nou lans, nou lanmer, nou ekosistenm e lanvironnman.

E ozordi sa lanvironnman i osi sa lespas ki siport pa zis touris e osi lezot sekter tel ki lapes e lagrikiltir parmi lezot.

Me malgre sa, nou lanvironnman i fer fas ek bokou menas atraver bann salte ki ganny zete dan nou lanvironnman. San realize ki sa salte i pa zis sali nou lanvironnman me osi i ede pou polye nou lanmer afekte bann divers lespes marin polye nou bann larivyer polye nou semen e osi nou lavil ki donn en move limaz Sesel.

Mr Speaker, konbyen fwa ki nou'n tann Seselwa ki'n

vwayaze, ki dekrir serten lavil ki zot in vizite konman sal e pa zoli ditou.

E mon asire sa pa'n anmenn okenn lafyerte pou zabitan sa bann tel pei. Akoz en touris menm si ou annan ou lans ek disab blan e ou lanmer ble, si ou landrwa i sal i pa pou atir li Mr Speaker. I pa pou ed li pou li retourn Sesel. E i pou osi dekouraz lezot pou vin kot nou.

Mr Speaker, me par kont pou bokou Seselwa ki'n ganny sans pou al vizit *Singapore* i pou dakor ek mon ki sa pei i en legzanp pou lemonn lo fason ki zot mentenir lapropte. E pou bann ki pa respekte Lalwa zot ganny *fines* severman.

E sa Mr Speaker, in zwe en rol enportan pou sansibiliz zot popilasyon pou gard lapropte zot pei.

En lot legzanp en pei ki trouve dan *L'Afrique se Rwanda* kot tou zot zabitan i ganny demande pou vin ansanm enn fwa par mwan, pou netway zot kominote ek bann landrwa piblik. E sa langazman i aplik pou tou zabitan aze a 18 an a 65 an ki kapab.

Mr Speaker, sa mezir ki sa pei in pran in ede pou ozordi fer sa pei ganny klasifye konman pei pli prop o *monde*.

Mr Speaker, kwa ki anpes nou ariv sa zistans ki *Rwanda* in arive ozordi? Konman Seselwa nou devret kolektivman pran nou responsabilite an ver nou lanvironnman. Nou bezwen vwar lenportans pou gard nou lanvironnman prop e asire ki nou reste konman sa paradi dan Losean Endyen.

E pou mwan Mr Speaker, ledikasyon i lakle pou asire ki nou gard nou pei prop. Pou lamazorite Seselwa, nou fyer pou gard nou lakoup prop, pou gard nou lantouraz zoli.

Me konbyen nou ki annan sa pli konbyen nou ki anmenn sa pli lwen, ler nou al fer piknik lo lans, ler nou al fer *hike* lo montanny, oubyen menm ler nou al lo lanmer?

I annan plizyer legzanp kot manm piblik in tir porte bann salte ki dimoun in kit al piknik in kit deryer.

Mon menm Mr Speaker, mon'n vwar lenstans kot pasaze dan transpor, i zet boutey plastik ou menm pake *juice* vid lo semen ler zot in fini avek. Sa Mr Speaker, i deplorab. Akoz mon asire pa sa ki nou fer dan lakour.

Lekel sa dimoun ki pou kontan pou en lot dimoun vin zet salte devan son laport? Mon garanti ou ki sa pa ti pou

akseptab ditou. E sa met propriyete ti pou annan gran risk lev en bagar akoz sa. E kot menm pou bezwen mele.

Kestyon i se ki akoz ki i annan serten endividi ki i vwar li normal pou zet salte partou e espekte son kanmarad pou vin ranmase pou li?

E alor pou mwan Mr Speaker, nou merit pouvwar benefis e labote e lanvironnman prop dan nou bann program ledikasyon byen boner atraver nou bann zenn.

Nou devret aktivman rod fason pou angaz nou popilasyon atraver bann kanpanya Nasyonal e osi nou bann zenn atraver zot *curriculum* dan lekol, pou vin pli atantiv e responsab an ver nou lanvironnman.

Nou vreman ankouraze pou vwar bann volonter enkli zanfan lekol atraver bann klib dan bann distrik ki donn zot letan pou netway zot zalantour ek kominote.

E menm resaman, nou'n vwar bann travayer lo en bato ki'n vizit nou Por, ki ti fer travay volonter pou netway nou bann lans pou donn nou en koudmen. Menm si nou apresye sa zes ki zot in fer, eske nou konman en Seselwa nou vwar sa i normal pou etranze vin tir salte kot nou? Ler Sesel i ganny

gete konman en sanpyon dan lanvironnman?

Mr Speaker, sa i montre nou ki nou bezwen kontinyelman travay pou edik nou pep. I enportan pou tou dimoun enkli nou bann zanfan ki pe grandi, pou konpran ki pa zis dan lakour ki nou bezwen fer zefor pou gard lapropete.

Sa i devret enkli nou kominote. Nou bann semen, nou larivyer, nou lafore, nou lans e nou lanmer ki merit touzour ganny prezerve e non pa ganny polye ek salte.

E ki ler nou prezerv labote sa bann landrwa, nou pe osi kontribye dan nou lekonomi atraver bann viziter ki pou pli byen apresye nou pei e osi nou menm.

E sa Mr Speaker, i devret en lafyerte poutou Seselwa. E la Mr Speaker, mon lans lapel ek Gouvernman pou ranforsi bann Lalwa ki enpoz bann *fines* pou bann dimoun ki polye nou lanvironnman par ekspre.

E ki napa okenn regar pou nou lanvironnman. Lalwa i merit aplike dan sa bann lenstans akoz sa i ava dekouraz lezot pou komet sa bann aksyon.

I a osi anvoy en mesaz kler ki polye nou lanvironnman e zet salte an bonnavini dan landrwa piblik i pa akseptab.

Annou osi regarde pou esey met plis bin dan bann landrwa piblik, koumsa manm piblik ava ganny landrwa pou depoz zot salte.

E la mon oule dir, ki dan distrik nou pe touzour rod fason pou donn plis bin pou vin pli pre ek bann lakour.

Me malerezman parler Lotorite i rankontre serten difikilte pou plizyer rezon. Ki enkli dimoun pa le met bin obor son lakour, e i annan lenstans kot Gouvernman i bezwen negosye avek propriyeter prive pou kapab met sa fasilite e sa pa toultan fasil.

Mon osi kapab konpran Mr Speaker, akoz sa bann dimoun pa oule met bin pre kot zot lakour. Akoz nou tou nou konnen ki i annan bann lisyen ki vini aswar ki tir sa bann salte e ki al met devan lakour a bann zabitan.

Pou terminen Mr Speaker, mon krwar sa i en Mosyon ki nou devret defann a tou pri. Akoz i en komitman an ver prezervasyon nou lanvironnman, nou leritaz natirel pou byennet tou Seselwa.

Nou tou nou bezwen zwe en zefor, pou asire ki i en lanvironnman prop i pa zis en privez, me i en drwa tou sitwayen dan nou pei. E annou

alor travay ansanm pou asire ki Sesel i ganny gete konman en legzanp kot nou lanvironnman i ganny sa lenportans dan nou devlopman.

Akoz en pei ki i annan lapropte e ki mentenir son lapropte i en pei ki osi reste an bonn sante. Mersi Mr Speaker.

### **MR DEPUTY SPEAKER**

Mersi Onorab Romain. Prosenman lo lalis se Onorab Doyace Porice.

### **HON DOYACE PORICE**

Mersi Mr Speaker. Mr Speaker, e tou bann mon bann koleg MNAs, bonzour.

Mr Speaker, mon pe anmenn mon sipor pou sa Mosyon anmennen par Onorab Bastienne akoz mon santi ki nou pei Sesel i en zoli pei e lapropte pou nou viv avek. Parey nou konnen ki nou pei i depan lo touris ki vin vakans e nou bezwen donn zot en bon servis dan lapropte ki anndan e deor lotel, lo semen e dan lanvironnman.

E partou kot zot vizite dan nou pti pei Sesel. E parey nou konnen ki lekonomi e byennet nou pei e nou Nasyon i depan lo la.

Nou annan bann tour dan bann *trails*, bann tour lo lanmer *snogging* e plizyer aktivite kot

touris i partisip ladan kot zot kontan.

Mr Speaker, tousala nou annan lo nou zil Praslin. E nou osi annan bann larivyè, lanmar, rigol, lans e osi bann *bin site* partou. Alor mon santi ki tousala i devret respe prop e zoli.

Lo nou zil Praslin dapre mon resers avek *LWMA*, i annan 102 *bin site* - 55 Baie Saint Anne e 47 Grand Anse. Nou annan 14 travayer *LWMA* e 9 travayer lanvironnman, kot zot ede pou siperviz nou bann kontrakter e osi lanvironnman nou distrik.

Nou osi annan bann nouvo fason fer *bin site* avek en kouvertir ki pe kontinyen fer dan distrik, kot pou ede ankor kit lapropte kot bin.

Kantmenm sa Mr Speaker, nou annan serten zabitan ki vreman pa servi sa bann bin byen e zot donn zanfan sak salte pou al zete. Me zanfan i met sak salte ater obor bin ouswa kot zot zet dan lapay. La kot i kree dezord kot sa *bin site*. Sirtou kot i konsern bann *housing estate* ki souvandfwa monn al vizite. E menm fer konplent avek *LWMA* e Lanvironnman e osi *PMC*, pou wwar bann bin in deborde e in fann partou ater.

Kot lisyen e lezot vermin I zwe ladan e anmenn partou dan semen. Bann leres vermin parey lera, ki zot, zot anmenn en maladi dan imen e menm koz lanmor atraver leptospiroz.

Pa zis sa, i annan zabitan ki menm zet salte an deor zot flat ouswa zot lakaz, ki fer ler i mouye i kree bokou moustik. Alor nou pou bezwen annan en dyalog avek bann zabitan atraver lezot lazans e Minister konsernen.

Mon osi vizit bann lanmar, rigol e osi larivyè. Laba zabitan i zet salte swa ladan, ou obor la kot lapli i tonbe nou rankontre bokou difikilte. Bann lazans i ganny plis travay pou fer an deor zot manda.

Mr Speaker, nou bezwen edik e fer piblik konnen ki Gouvernman i depans bokou kot I konsern lanbelisman nou lanvironnman. Kan nou ti kapab ganny en pe sa larzan pou fer lot keksoz dan pei. Alor pou evit annan *fines* e deza ki deza dan Lalwa Lanvironnman pei pou plis depans par Gouvernman, annou aret zet salte partou. Annou annan en respe pou semen piblik, larivyè, lanmar, lans e osi rigol pou nou aret ganny rigol bouse e linondasyon dan nou distrik e osi pei an zeneral.

Nou konnen parler parey lo Praslin, ki serten kontrakter i tarde vin tir bin, kot i fer bokou lefe dan bann sou distrik e osi distrik an zeneral. E manm piblik i konplent bokou. Kot mon menm deza *call LWMA* pou koz avek sa kontrakter konsernen e la mon pou demann Minister konsernen pou revwar kontrakter ki pe fer sa travay.

Mr Speaker, mon dir sa akoz Praslin zot pran kontrakter Grand Anse pou tir salte Baie Sainte Anne. E kontrakter Baie Sainte Anne i tir salte Grand Anse. E petet sa ki met retar dan tir bin.

Apard tir bin nou osi annan pti kontrakter ki netway semen. I annan ki fer tre byen, me i annan ki zot osi zot netwaye me zot pran salte e pous dan rigol ouswa lanmar. Kot i vreman pa byen e kree plis dezord.

Mon osi anvi fer resorti ki tou biznesmenn ki annan lotel, oubyen ki pe konstri enn sa ki annan laboutik e serten lezot gro biznes, zot sipoze annan zot prop *bin site* atase avek en kontrakter prive ki tir zot bin.

Alor si nou vwar sa tel lakonpanyen ki pe met salte dan bin piblik nou raporte ek dimoun konsernen.

Mr Speaker, nou annan en lot group zabitan ki al lo lans, swa piknike ouswa zis al pran en pti ler. I malere ki ler zot fini ek zot salte zot zet lanmenm dan bann lapay kot personn pa netwaye. E Praslin nou annan bokou landrwa obor lans ki annan bokou zarbis, bokou pye dibwa danzere e dimoun i profite pou zet salte ladan, dan plas al met dan en bin.

Prezan ler i vante, tou salte i tonm lo lans e i annan i al dan lanmer, kot i pa zoli e osi pa bon pou nou zoli lanmer e pou pwason ki form par enn nou repar toulezour.

Mon salye Ms Ravinia ki fer byen son travay, son bout lans kot i netwaye i anmas salte son kanmarad e i fer sir i met dan son goni e al zet dan bin.

La kot mon ti a kontan ki zofisy Lanvironnman, i pran sa o serye. Rode ki fason nou kapab rezourd sa bann tel problem. E ede ankouraz bann kontrakter ki netway lans.

E Praslin zot konn tre byen ki mon konsernen avek sa bann tel aksyon. E mon souvan an kontak avek lofis konsernen.

E mon osi pare pou donn sipor kot i konsern lapropte lo nou zil. Nou Pralinwaz, nou bezwen pran nou responsabilite, aret zet salte,

annou ed sansibiliz nou zanfan e annou montre sa respe anver bann lekipman ki ganny mete lo nou zil. Sirtou kot i konsern lanvironnman.

Akoz parey Mosyon i demande, Gouvernman pou ranforsi Lalwa kont zet salte an bonnavini dan lanvironnman. Alor si nou konsyan e pa anvi ganny atrape e ganny kondannen, annou aret fer li. O kontrer ede gard nou lanvironnman dan en fason annord e annou koz ek nou vwazen, nou zanfan e lezot letan nou vwar pe zet salte partou.

E petet raport sa ki pa oule ekoute. Nou lanvironnman i enportan pou nou tou. E annou kit li prop e zoli, met salte kot i fodre pou nou aret vwar salte partou.

E mon pou demann avek Minister konsernen, pou kontinyen met plis bin sirtou kot nou annan zabitan ki frekant bokou e osi lo bor lans. E annan kontrakter pou tire.

E osi plis travayer Lanvironnman e *LWMA* osi *PMC*. Siport nou bann travayer Lanvironnman e *LWMA* pou kontinyen fer sa *monitoring*. E mon remerci bann ki pe fer byen e ankouraz zot pou kontinyen ede kit nou

lanvironnman lo en bon standar eleve.

Avan mon terminen, mon pou felisit travayer *LWMA* e Lanvironnman lo Praslin, pou sa bon travay ki zot pe fer e nou dir zot en gro mersi.

E mon pou osi felisit Onorab Bastienne pou sa Mosyon enportan pou nou lanvironnman nou pei.

Avek sa de mo mon pou donn tou mon sipor sa Mosyon. Mersi.

### **MR DEPUTY SPEAKER**

Mersi Onorab Porice. Prosen Manm ki lo lalis se Onorab Loizeau.

### **HON NORBERT LOIZEAU**

Mersi Mr Speaker. Bonzour tou Manm. Bonzour tou dimoun a lekout. Bonzour spesyal pou zabitan Bel Air ki sirtou bann ki pe kit nou lanvironnman prop, ki pe konsyan ki lapropte i en keksoz primordyal pou ot fanmir se pou sa rezon ki ou trouve ler ou mont Bel Air nou semen i prop, savedir i montre ki kalite dimoun ki reste dan sa distrik ki apel Bel Air.

Bann dimoun ki konsyan ki nou lanvironnman i bezwen reste prop e zot lakour. Me par kont Mr Speaker, i annan serten lesefer osi ki pa pe fer



parey sa bann zabitan ki mon pe koz lo la ozordi dan Bel Air.

Mr Speaker, Mosyon anmennen par Onorab Bastienne i en Mosyon ki enteresan. Mr Speaker, ozordi Sesel i en pei ki i en pei touristik, ozordi touris i vin Sesel pou admir nou labote, nou peizaz, nou lans e osi nou dimoun apresye s lakey ki zot gannyen ek nou dimoun.

Me ler zot pe apresye nou labote, eski salte dan nou lanvironnman i form parti sa labote ki zot ti sipoze pe apresye? Mr Speaker, mwan mon krwar non.

Ozordi Mr Speaker mon reste etonnen ozordi nou 2024, Onorab Bastienne in vwar li neser pou vin ek en Mosyon, pou koz lo salte lo lanvironnman, pou koz lo sansibilizasyon bann dimoun pou kit nou lanvironnman prop.

Ozordi nou 2024 Mr Speaker. Kot nou'n al mal? Mwan sa kekyon ki mon demande mon. Kot nou'n al mal? Ki ozordi 2024 nou sipoze en pei prop pli prop dan lemonn, nou pe koz lo salte dan lanvironnman.

Mr Speaker, mon rapel anviron 30 an pase, mon ti travay SBC e dan nou travay SBC mon rapel ti annan en

moman ki bann program sansibilizasyon lo kote salte dan lanvironnman sa ti enn primordyal ki ti ganny fer lo SBC.

Nou'n fer bokou program Mr Speaker. Mon pe koz ou 30 an pase ozordi nou 2024. Dernyen fwa lo lopinyon sa msye ti dir, i annan plis ki 25 an nou pe koz lo la kot nou'n al mal ki ozordi nou ankor pe koz dan salte lo lanvironnman.

I en keksoz ki remarkab Mr Speaker, ki pe arive mon rapel ti annan en fwa, nou ti pe fer en reportaz lo sa bann zafer zet salte dan lanvironnman. Mon rapel Ms Suzanne Simon ki ti zournalis ek nou, nou ti ganny enformen par zofisye Lanvironnman, konmkwa ki i annan salte pe ganny zete dan sed. Pa ti ankor devlope laba kot in fer *Intelvison* partou laba.

E nou, nou ti ale nou ti al filme akoz ti annan en program lo salte. E ler nou ti ariv laba se en biznesmenn, en gran boutikye en gran komersan ki ti pe enport keksoz pou vann, bann *commodities* pou vann, se li ki ti pe zet son bann salte laba. Mr Speaker, mazine ou 30 an pase sa mon pe koz ou en?

Ozordi sa bann menm keksoz pe arive. I annan kontrakter ki al zet zot bann

debri partou. La Sans Souci zot vini zot devide Mr Speaker. E lanvironnman i bezwen netwaye. Lotrozour mon monte minwi diswar en boug pe monte, Mr Speaker avek en vye karkas loto ki napa nanryen lo la minwi diswar pe monte an montan Sans Souci kot ou pe al mete Mr Speaker?

Ozordi tou sa bann keksoz 30 an pase, ki ler nou ti pe fer sa bann program sansibilizasyon lo *SBC* ki mwan mon ti ankor travay laba ozordi plis ki 30 an pase sa bann keksoz i ankor pe arive. Savedir nou annan en problem. E nou bezwen gete ki problem.

I annan dimoun i dir ou lamizer. Mr Speaker, eski mizer eski si ou mizer ou mwen fortinen, i vedir ki ou bezwen kosonnyen, malprop, fer kosonnyen partou akoz ou mizer ou napa nanryen? Non Mr Speaker mizer pa vedir ou bezwen malprop.

Mwan mon rapel lontan e osi pa zis mizer, i annan dimoun ki eze akoz zot eze zot santi ki zot kapab fer nenport ki zet tou zot keksoz dan lanvironnman.

Mr Speaker, sa i fer mon rapel lontan, lontan nou ti nap *landfill*. Nou ti napa *landfill* kot nou ti zet nou salte? Eski i ti

sal partou? Malgre ti annan bann dimoun ki nou ti apel bann kontannyen ki ti netway semen partou.

Me selman zot pa ti ler zot ti netway semen zot pa ti tir sa bann kalite salte nou pe vwar ozordi. Ti netway semen balye fey netway rigol fer sir ki tou keksoz i deroul annord. Ti napa *landfill*. Ki nou ti fer ek nou salte kot lakour?

Nou ti fouy en trou deryer lakaz e nou ti met nou salte ladan o firanmezir ki ti konmans plen nou ti kouver. Nou pa ti pase zete al anvoy dan lapay partou Mr Speaker.

Pourtan sa letan Mr Speaker, popilasyon ti ptipti e nou bann vye paran zot pa ti telman edike sa pwa parey nou zenerasyon ozordi. Me pourtan lapropte ti en keksoz ki zot ti met devan tou kou, devan nou fanmir, devan bann zanfan ki pe grandi. Fer sir ki ou prop; fer sir ki ler ou sorti lekol ou salte ou met dan ou sak ou vin zet dan lakour. Ti napa bin partou.

Ozordi ki annan bin alatrenn; ozordi avek en pep edike Mr Speaker, bin, bin manke i plis ki dimoun. La Minis Lanvironnman Flavien Joubert in dir i annan ankor bin pe vini. Konbyen? Apepre 3 mil ankor pou met salte ladan. Selman nou konman en pep

edike, ozordi nou ankor *still* pe zet salte partou dan lapay, dan kominote, dan rigol partou.

Ozordi nou annan *housing estate* Mr Speaker, i annan bin dan bann *housing estate*. Ozordi i annan en eleman I arive, ler nou reste dan bann *housing estate*, i bezwen annan serten mannyer viv ki nou bezwen sanze.

Par egzanzp lontan kot mwan nou ti grat pwason deor, me selman ki nou ti fer avek nou trip pwason letan nou grate ek nou bann lekay nou ti fouy en trou nou ti met li ladan, i ti dekonpoze kot nou met nou salte an menm tan nou ti kapab servi li konman konpos.

Ozordi i annan landrwa ki ou kapab fer grat ou pwason ki ler ou reste dan flat ou vini ou monte. Me ozordi non, dimoun i grat zot pwason apre ki i arive tou sa trip pwason nou pran nou zet dan bin.

E la Onorab Bastienne i dir mwan i annan i *flush* dan *toilet*. Be mon kapab konpran aköz *PMC* i bezwen vin ponp sa bann *safety tank* kot bann flat, depans sepa ki kantite larzan pou fer sa ozordi ki Onorab Bastienne pe fer mon reflesir lo la bann keksoz ki pe arive.

Mr Speaker, Onorab Bastienne in koz lo *fine*; eski *fine* pou anpes dimoun

malprop? *Fine* pou anpes dimoun kosonnyen, lesefer fer tou son bann kalite keksoz? *Fine* pou anpes sa etidyan ki pe desann dan bis apre lekol ki pe anmenn ki bis pe anmenn li se li, zet son salte dan semen?

Mr Speaker, mon desann de semenn pase, mon pa pou koz lo lezot distrik, mon pou koz lo mon distrik, en bis manrmay lekol 2 er edmi i desann, selman sa bann manrmay posib zot pa reste Bel Air zot, zot pran bis aköz lekol Bel Eau - i annan manrmay ki sorti plizyer landrwa, zot pe desann pou ale zot zet zot salte deor.

Dan sa bis obor kot *Vines* i debark en madanm *warden*. Mwan mon vini deryer mon dir ek sa madanm, mon dir sa manrmay in zet salte ater, pourtan lekol i koz lo lapolites, lo lapropte, me selman *still* manrmay i fer sa.

Mr Speaker, nou pou konnen aköz. Sa ki ou fer kot lakour ou anmenn li partou. Mon desann deryer en zenn garson apenn 20 an, mon desann mon vin par deryer li kot Gran Krwa anler Bel Air, i manz son sanmoussa i zet son plastik, mon tap en orn ek li mon fer koumsa ek li Mr Speaker, bougla i montre mwan son ledwa milye.

(laughter)

**HON NORBERT LOIZEAU**

I tir son ledwa an deor vit i montre mon son ledwa milye - son lendeks Mr Speaker. Be kot nou pe ale. Pa en vye dimoun ki'n fer sa ek mon Mr Speaker, en zenn manrmay apenn 20 an.

Mon pe sey dir li frer ou pe zet salte dan lanvironnman, zwer i *finger* mwan *men* Mr Speaker. Mon ti en pe ankoler. Me selman les li. Selman mwan mon zis demande ki zistans kot nou pe arive?

Mr Speaker, mwan mon distrik i baliz avek anvil, *hmm*. Kot *Care* anba *Freedom Square*, ti annan en zoli pti peron ou kapab vini asize ennler *cool*; kot *Care* zot in bezwen *fence* sa landrwa. Ou konnen akoz zot in *fence* sa landrwa? Zot vini bomaten *toilet paper* lanmenm, *condom* lanmenm, bwat manze lanmenm, *wipes* lanmenm. Kot *weightlifting* zot in bezwen bare.

Mr Speaker, pa vye dimoun ki vin la en. Kot *weightlifting* zot bezwen bare ek fil, akoz menm problem nou pe ganyen. Lekel ki frekant la? Pourtan bann pep edike, bann manrmay ki en pti pe pli edike ozordi, pa bann vye

dimoun. Ozordi nou ankor *still* pe vwar bann zafer.

Lo lans, Mr Speaker, ozordi ou al lo lans si ou annan zanfan, gete kot ou zanfan pe al fouye pou al zwe avek disab fer *castle* se pa ki zafer. Ou ava mont lo en min la !

Mr Speaker, zot riye i gou. Ou vin lo lans ou bezwen sonde gete kot ou zanfan pou zwe, pangar dan pe soz i ava pas lanmen dan en malpropte? Dimoun i sorti piknik i anter zot salte dan disab. Aswar sa ki pase zot annan zot lanvi ler *nature* i *call* zot vin lanmenm?

E ou ler ou vin lo lans ou pa konnen, ou zanfan pe vin zwe ou rankontre sa. E sa ki pli vilenn Mr Speaker, se bann etranze nou bann touris ki vin vizit nou zil, i anmenn ki sa diber lo nou dipen ki nou dir la, se zot ki vwar sa bann keksoz koumsa. Sanmenm sa rezon Mr Speaker, mon demande kot nou'n al mal.

Mr Speaker, mwan mon annan en keksoz mon anvi adrese. Avan sa, nou'n plito laplipar ditan pran bann aksyon ki popilis zis pou fer dimoun pa ankoler. Me sa pa byen Mr Speaker. I pa'n bon.

E nou e mon kontan nou ozordi Gouvernman, mon pa pe akiz personn zis selman lafason

keksoz ti ete, Mr Speaker sa in fer dimoun lesefer.

Ozordi dimoun zot fer sa ki zot anvi. Zot pa enterese Gouvernman akòz? Gouvernman i pey dimoun pou netwaye. Mwan en boug in deza dir mwan. Mon dir en pa bezwen zet sa la. I dir mwan koumsa, “be pa i annan dimoun ki netwaye?”

Mr Speaker, mazine ou dan Sesel nou’n ariv en staz koumsa. Kot en boug i dir ou mon’n zete wi akòz i annan dimoun ki netwaye, “taler bann boug ki anmas *pet* pou anmase!”

Mr Speaker, sanmenm sa ki demann mon kestyon kot nou’n al mal? Apre 30 an, 30 an ki’n fer bann sansibilizasyon lo lanvironnman lo salte. Mr Speaker, loto parey monn dir 30an apre 30 an ki mon’n kit *SBC* fer sa bann program. Ozordi sa bann menm keksoz pe arive savedir nou annan en problem.

Mr Speaker, an terminan mon anvi dir lapropte i konmans kot lakour. Tou sa ki ou fer an deor kot ou lakour, ki ou fer dan semen, i vedir ou pe fer li kot ou lakour.

Savedir si ou pe zet salte, i annan en bin ou pa pe zet salte dan bin, savedir kot ou osi kot ou lakour ou pe fer parey. Alors

i enportan parey Onorab Roucou in fer sorti ki ledikasyon i enportan. E ledikasyon i bezwen konmans kot lakour, kot bann fanmir ; pa kot lekol bann *teachers* zot pe fer zot mye kot lekol zot.

Me ou ki vin avek sa vilen manni sorti kot ou lakour pou anmenn dan lekol e ou anmenn partou. E la Mr Speaker se sa rezon ki sa pwen ledikasyon i enportan.

An terminan Mr Speaker, mon anvi dir pou annan ouswa pou kit en lanvironnman ki prop, en Sesel ki prop i responsabilite tou Seselwa. Akòz sa Sesel i pa zis pou mwan, i pa zis pou ou i pou nou tou, enkli sa enn ki pe zet salte partou ki i pa pe pran son responsabilite.

Mr Speaker, mersi pou sa de pti letan ki ou’n donn mwan. Mon a dir ou mersi mon a kit sa konversasyon pou en lot zour, zour i ava vin devan Lasanble. Mersi.

### **MR DEPUTY SPEAKER**

Mersi Onorab Loizeau. Onorab Audrey Vidot i prosen entervenans lo lalis.

### **HON AUDREY VIDOT**

Mersi Mr Speaker. Bonzour Mr Speaker, tou Manm Onorab,

zabitan Roche Caiman e tou manm piblik ki a lekout.

Mr Speaker, mon pou konmans mon lentervansyon koumsa.

Konstitisyon Larepiblik Sesel sapit 42 lartik 38(1) i site ki, "Leta i rekonnet drwa tou dimoun pou viv e zourir en lanvironnman prop, sen e ekolojikman balanse e avek bi asir realizasyon efektif sa drwa.

E Leta i antreprann pou pran mezir promouvwar, proteksyon, prezervasyon ek amelyorasyon nou lanvironnman.

Asir en devlopman sosyoekonomik soutenab pou Sesel par en lizaz zesyon konvenab bann resours Sesel.

Promouvwar lentere piblik lo nesosite pou protez prezerv e amelyor nou lanvironnman." Fen sitasyon sa lartik 38(1).

Nou a note ki nou Konstitisyon pe egalman fer nou konpran ki nou drwa anba lartik 38(1)pe edik nou ki i osi nou responsabilite konman sitwayen Sesel, pou annan respe pou bann mezir ki i ganny mete dan Lalwa e met an pratik sa ki leta i rekonnet. Konman nou drwa dan nou Konstitisyon pei.

E ladministrasyon presedan Parti Lepep *United Seychelles*, atraver bann Polisi, ti met bokou lanfaz lo devwar

sak Seselwa pou ede prezerv en lanvironnman sen an bonn sante e ki i fonksyonn byen pou tou Seselwa. Sa in akoz nou'n en parti politik ki'n toultan rekonnet ki nou atou natirel i resours pli presye i nou lanvironnman.

Mr Speaker, permet mon sit detrwa legzanp kot *United Seychelles* in onor son langazman kot nou lanvironnman i konsernen. Ler nou'n dan Gouvernman;

Proteksyon nou lanvironnman e promouvwar devlopman soutenab ti ganny prioritize par annan revizyon e promosyon dan Polisi, devlopman ki soutenab e ki pou an kont lanatir.

Dan *curriculum* lekol, ledikasyon lanvironnman ti pli aparan pou vin en parti entegral laprantisaz pou nou bann zenn.

E la mon bezwen rekonnet Lekol Plaisance Segonder ki i dan mon distrik, kot in fer bokou sikse pou ranport pri dan plizyer konpetisyon e zot in menm inisyal bann proze dan lakour lekol pou montre valer ek respe ki zot in annan pou lanvironnman.

Malgre defi ki'n vin avek sanzman klima, ti annan bokou zefor pou ganny fon pou inisyal

bann proze ki target bann proteksyon nou lanmer e lakot.

Mr Speaker, mwan osi rapel anba ladministrasyon Parti Lepep Departman Lanvironnman Lazans responsab pou Lanbelisman e Zesyon salte, an partenarya avek Gouvernman Lokal ek sekte prive, bokou zefor ti ganny mete, dan anmenn zabitan dan kominote ansanm, pou angaz zot dan program lanbelisman pou en lanvironnman zoli, prop e sen.

Pou benefis kominote, sa bann program ti ankouraz zabitan pou annan en zoli zarden ranpli avek varyete plant, montre ki mannyer i gou pou plant fri avek legim kot lakour. Ganny nou bann dimoun dan kominote pou volonterman partisip dan bann program ledikasyon, bann lavertisman osi ki nou pe dir kit nou lanvironnman prop e zoli dan kominote.

Loportinite lanplwa e devlopman imen in parmi bann vizyon *United Seychelles*. Kot nou ti vwar kreasyon pti biznes pou permet Seselwa leve debourye e pran sarz lanbelisman e netwayaz dan nou kominote.

Epanouisman bokou nou bann Seselwa in vin atraver bann tel pti biznes. Me i

regretab ozordi anba ladministrasyon *LDS*, serten pti kontrakter in bezwen frenm zot biznes.

Pou bann ki ankor la, i annan ki ankor i annan ki'n bezwen fer arete travayer. Sa i akoz kondisyon ek nouvo Lagreman anba nouvo ladministrasyon *LDS* pa ankouraz an e rantab.

E mon pa pou sirprann pou tande si sa bann semen letan pou ganny *retender* i annan ki swa pa pou partisipe, pa pou kontinyen dan sa travay.

Mr Speaker, en lot antite Gouvernman, ki'n ganny neglize, me ki dan lepase zot prezans ek Lotorite ti byen ganny rekonnet e se Lotorite e sa se Lotorite Lasante Piblik.

Avek nivo devlopman, Lotorite Lasante Piblik i bezwen plis resours pou fasilite e konpliment zot travay. Zot parmi bann premye group dimoun ki'n kontribye pou protez nou lasante dan letan *COVID-19*.

Zot osi parmi Lotorite ki la pou edik piblik e ranforsi Lalwa lo nivo lapropte ki pa ganny respekte. Mon'n tann loter Mosyon koz lo rekonpans pou bann ki pe fer sa bon travay, pou ki nou lanvironnman i reste prop.

Lo sa pwen mon pou siport li lo la. Me mon bezwen fer osi resorti ki olye rekonpans sa bann travayer ki zwe en rol tre enportan pou gard nou lanvironnman prop e zoli. Sa ladministrasyon ozordi, ki nou tou nou konnen i en konpetan e inefikas, in ogmant lakantite semen netwayaz pou kontrakter, me larzan in ganny redwir.

*Long service*

*allowance* bann travay Lasante Piblik e lezot travayer dan servis piblik in ganny koupe. Zot pa pe ganny ankor. Ki mannyer nou espekte ganny pli bon rezilta gard nou lanvironnman prop e zoli akoz ki anba sa ladministrasyon travayer Seselwa i kontinyen ganny demande epou oblize fer sakrifis, selman pou serten zot kontinyen ganny bann bon benefis swa gro *allowance* pou monte aletranze.

Sa Gouvernman pa konn son priyorite pei. Aparid kontinite dan ogmantasyon bin parey mon'n tann serten entervenans avan mwan koze, plis landrwa pou fer *bin site* kwa ankor an plis ki sa ladministrasyon i vin avek pou montre e pou fer kwa ki zot pou kapab kontribye pou ki nou adres sa problem salte?

Mr Speaker, sa Mosyon i fer mon mazin bann diferan groupman osi, ki ti zwe en rol enportan dan sa size deba ki devan nou Lasanble ozordi.

Tel parey bann klib lanvironnman, ek bann lorganizasyon sosyete sivil, bann groupman ki ti vreman vizilan e tre proaktiv lo proteksyon e promosyon nou lanvironnman.

Nou rekonnnet travay ki serten group ek fondasyon ki ankor aktiv e pe servi tou resours medya pou montre ki zot ankor la e zot pe fer zot par. Par kont i annan nou pe demande ki'n arive avek zot.

Bann ki ti prominan dan lekol ek dan distrik dan nou bann kominote pou donn sipor bann klib, par ede annan bann program ledikasyon ek sansibilizasyon amikal, pou montre lenportans annan en lanvironnman sen an bonn sante e ki fonksyon byen pou nou tou.

Kestyon ki nou pe demande, se akoz ki nou pa tann serten sa bann groupman parey zot ti aktiv avan. Eski zot ankor pe ganny serten resours finansyel, oubyen zot vwar zot pe ganny bokou difikilte pou zot kapab fer sa travay ki zot ti pe fer avan?



Eski zot pe ganny loportinite pou angaze dan bann konsiltasyon pou donn zot pwennvi zot lopinyon dan proteksyon ek prezervasyon nou lanvironnman Sesel ozordi?

Mr Speaker, in ganny dir pli boner par en Manm avan mon, ki lapropte i konmans dan lakour, e sa mon pou dakor avek li.

Nou tou nou annan en rol konman sitwayen pou nou zwe, e i pa akseptab ki ou dan kominote espesyalman dan en ranze blok flat, ki dan ou lakour ou kit prop me an deor dan koridor ou zet ou salte.

I pa akseptab ki si ler ou dan ou lakour ou pou grat ou salte e ou pou zet deor aköz pa ou ki netwaye, sa osi i pa pou akseptab.

Dan mon repons lo Leta nou Nasyon sa lannen, mon ti fer resorti ki zabitan Roche Caiman i konsernen dan fason ki serten dimoun i depoz salte kot bin.

Mon ti menm fer resorti sizesyon ki zabitan mon distrik in avanse swivan vizit ki mon'n fer kot zot lakour.

Zabitan in sizere ki Lazans ki zer salte ansanm an partenarya avek distrik, i bezwen rod fason pou travay avek bann zabitan e edik zot lo

lafason pou pli byen depoz zot salte kot bin.

Dan en fason sa ki reste pli pre avek bin pa ganny afekte. E ki Lazans i fer tou mye posibil pou fer retir salte toulezour.

I annan demann pou ki tou ki zot tou bann *bin site* i annan mesaz ek *hotline* ki permet manm piblik kapab raport bann ki mal servi bann *bin site*.

Akoz menm si limero *hotline* i ganny mete lo bin, avek en serten letan i pali e i pa sorti byen pou bann dimoun rekonnnet.

Mr Speaker, mon pa pou kapab termin mon lentervansyon lo sa Mosyon san dir mersi e felisit tou bann endividi kontrakter e travayer servis piblik, ki pe fer tou son mye posibil pou asire ki nou, nou zourir en lanvironnman prop e sen.

Me mon osi lans en lapel avek sa ladministrasyon ki pe diriz pei ozordi. Zot bezwen osi donn bon legzanp. Ler nou pe ankouraz piblik pou gard son lanvironnman prop, zoli e sen i osi zot responsabilite pou mentenir bann plantasyon, tel parey bann pye dibwa ki lo later Leta. Si nou pe demann prive pou koup pou li nou osi nou bezwen pran responsabilite me

pa non kominik ek zot parti kominik ek zot pou zot adrese.

Bann lenfrastriktir ki demann tous lapentir, ki demann en pe lapropte, ki demann en pti *maintenance* parey nou pe demann ek sa Seselwa ki kot son lakour pou li mentenir, i responsabilite sa Lotorite pou li osi fer son par.

Sa bann pwen ki mon'n fer resorti, i enportan ki nou donn legzanp, si nou anvi tou nou bann dimoun osi i swiv parey.

Alors ler nou pe donn ledikasyon standar, nivo lizyenn ek sekirite, nou bann antite piblik osi i bezwen elev nou bann standar.

Mr Speaker, dan mon letan *break* en dimoun in anvoy mwan en mesaz, i dir avek mon Onorab i annan en kantite travay ki nou ti fer oparavan ki ti mars tre byen.

Tre byen e i ti anmenn en kantite dimoun ansanm pou nou fer sir ki keksoz i marse. I dir ek mon pas sa pti mesaz avek ou bann koleg lo lot kote latab. E mon pou fer li ozordi Mr Speaker.

Si zot santi zot pa kapab konn zot priyorite kwa ki zot kapab adrese pou sa pei, rann nou, e nou, nou ava montre zot ki mannyer pou fer marse. Mersi Mr Speaker.

*(comments off-mic)*

### **MR DEPUTY SPEAKER**

Mersi Onorab. *Order* silvouple! Mersi Onorab Vidot. I midi la nou pou *adjourn* nou pou rebran travay 2 er apre midi.

***(BREAK)***

### **MR DEPUTY SPEAKER**

Bonn apre midi e *welcome back* tou dimoun. Nou pe kontiny deba lo Mosyon table par Manm Elekte pou Ile Perseverance Onorab Desheila Bastienne ki nou'n konmanse depi bomaten, Mosyon ki lir koumsa;

“Etandonnen lenportans en lanvironnman zoli prop e sen dan lekonomi e byennet nou pei e nou nasyon, Lasanble i fer en lapel avek tou Seselwa pou vin pli responsab e aret zet salte dan landrwa ki pa apropiye, e demann Gouvernman pou ranforsi Lalwa kont zet salte an bonnavini dan lanvironnman.”

Prosen entervenans ki lo lalis i Onorab Sandy Arissol.

### **HON SANDY ARISSOL**

Mersi Mr Speaker. Bonn apre midi tou bann Manm Onorab. Bonn apre midi tou bann dimoun ki pe ekout nou spesyalman bann zoli dimoun dan mon distrik Bel Ombre.

Mr Speaker, mon ti a kontan mon osi dir en parol lo Mosyon Onorab Desheila Bastienne. Ou konnen mon anvi donn 2 legzanp ; premye ki mon anvi donner, se letan mwan mon ti ankor zanfan, mon ti ankor en zanfan pe grandi dan lakour mon paran, mon papa ek mon manman Nancy avek Jean-Baptiste Arissol ki ankor la, toultan zot ti monte nou savwar fer avek savwar viv. Mon papa ti en senp mason, mon manman ti en *waitress Seychelles Hotel* sa letan.

Nou pa ti ganny gran larzan. Me zot ti okip zot 6 zanfan tre byen. Se la kot nou ti aprann parey Onorab Loizeau in dir, nou ti konmans dan lakour. E dan lakour kot mon paran mon rapel ti napa louvraz fiy sa letan, oubyen louvraz garson.

Me ler nou ti dan lakour, nou ti atrap tou sa ki nou ti kapab fer pou donn nou paran en koudmen, parske nou papa ek nou manman ti travay, alor nou ti sey nou mye pou nou gard nou lakour prop e annord. E nou manman ti fer sir poudir sak fwa nou sorti dan lakour pou nou al dan semen, swa nou pou al lanmes sa letan, swa nou pe al lekol, nou liniform nou lenz lo nou ti prop.

E mon rapel sa bann letan Mr Speaker, nou ti annan sa savat, nou ti met savat mary dan pous e ti annan bann savat ver avek ble ki son rebor ti ver e son rebor ti ble ki nou ti aste sa letan, dan nenport ki magazen ki ou ti zwenn, e nou ti bezwen pran sa savat al lo basen oubyen lo ros frot son bor, fer sir ki toultan nou vwar sa kouler ver olye ou vwar labou oubyen friyapen mir avek. Nou ti bezwen fer sir sa savat i an prop e annord.

Mon rapel nou liniform konman en garson, mon manman ti montre mwan ki mannyer pou met mon liniform sa semiz blan sa letan Belonie. Letan nou ti'n sorti dan sa liniform mous zonn fes gri sa letan ki ti zonn, apre nou ti bouz lo poplin blan.

La Rivière Anglaise zot ti met liniform latwal matla. Nou Belonie apre nou ti sanze nou ti vin sa poplin blan avek logo lo pos. Mon manman Nancy Arissol ti montre nou ki mannyer mon met mon semiz sofe dan soley.

Apre en pe letan, letan soley in byen tape, ti annan en pti delo savon ki ti ganny aranze kot mon ti ale mon ti aroz mon semiz, les li manz byen sa delo savon, 3 er mon pran li mon frote anba lebra, dan kwen

likou partou pour ki mon semiz, mon liniform ki mon met lo mwan konman Sandy Arissol, ti prop e annord.

Menm mon paran pa ti ganny gran larzan, i ti fer sir ki nou son zanfan nou ti prop e annord.

E mon paran pa ti ganny *service allowance* sa letan li, *long service allowance* pou sa li. Me mon paran ti anvilke dan mon lapropte e lapropte konmans dan lakour parey Onorab Loizeau in dir.

Dezyenman, tou le vakans mon ti kontan al kot mon granmanman Mont Buxton. Mon granmanman ti appel Elena Uzice, zot ti apel li manmzel Anne. Kot nou ti reste laba Mont Buxton ti annan en gran laplenn devan ki nou ti apel loter kot bis ti vire e ozordi zot in fer en kort *basketball volleyball* - bis ti vir la.

E mon ti kontan al kot mon granmanman sa letan, parske tou nou bann kouzen kouzin nou ti zwenn dan vakans laba, kot nou ti kapab al fer nou rikannman lo laplenn. E apre ti annan en vwazen en msye ki nou ti dir li Titi son madanm bann Bouchereau zot ti fer gato, zot ti fer dipen. E nou ti al kot nou granmanman senpleman pou nou *enjoy* sa

lafarin ki ti napa Belonie kot mon paran ti reste.

Nou ti al laba Mr Speaker, nou ti zwe lo sa ter ki mon pe dir ek ou. Nou ti menm deroule dan prindefrans ziska Majoie lot kote kot mon tonton Marcel Denousse ti reste apre nou ti monte.

Be ou konn en keksoz enteresan ki ti arive, tou le 6 er mon granmanman i debout anler kot son lafnet i get nou loter e nou, nou ti konpran la 6 er in sonnen tou zanfan i bezwen rantre kot li. Ler zwe i fini.

Tousala ti bann savwar fer, savwar viv avek disiplin ki nou ti annan sa letan. E mon granmanman mon rapel toultan i ti dir ek nou,” ou kapab mizer ou, me selman fodre toultan ou lakour i annord. Letan en dimoun i vin kot ou i pou kapab bwar en ver delo kot ou san ganny repinyans. I pou kapab servi ou fasilite twalet san ki i ganny repinyans. Fodre toultan ou lakour ou konman sa dimoun kantmenm ou mizer ou prop e ou annord.”

Dezyenm legzanp ki mon ti ava kontan donner Mr Speaker, lo sa Mosyon an relasyon ek sa Mosyon apre mon ava eksplik mon lekor.

Mon fek sorti *Londres* kot mon'n al obzerv eleksyon.

Dan stasyon vote eleksyon *Londres* kot mon'n ale *Northumberland* ler nou antre dan stasyon vote, stasyon vote i ouver 7 er bomaten I frenm 10 er diswar konpare avek Sesel, Sesel i konmans 7 er i ferm 7 er; *Londres* stasyon vote i konmans 7 er bomaten i ferm 10 er diswar *L'Angleterre*.

Dan stasyon vote ou annan zis bann *polling agent*. Napa en reprezantasyon ; mon'n kouver 14 stasyon. Napa en reprezantasyon parti politik parey i annan dan nou stasyon, napa en zofisye lapolis ki pe *standby* deor obor baro, ni obor laport ni anndan. Nou'n vwar zis bann *polling agent*.

E dan bann stasyon parfwa nou'n vwar zis de *polling agent* ki pe fer tou keksoz. Mon dir sa Mr Speaker, parske mon anvi montre de legzanp ;

I annan premye legzanp kot savwar fer savwar viv i konmans ek ou konman endividi. Dezyenm legzanp pou montre en sistenm kot dimoun i *trust* sistenm. Kot sistenm i met an plas bann servis ki i donn nou e i pa pou bezwen *babysit* ou li, i pa pou bezwen mars deryer ou li. I ekspekte ou konman en imen ki'n al lekol, ki ou annan savwar fer, savwar viv

ou pe viv dan en *monde* modern, ou servi bann fasilite ki ganny mete a ou dispozisyon byen. E se sa Mosyon Onorab Desheila Bastienne pe demann nou ozordi.

Dan nou pei i annan en kantite fasilite ki i annan ki konsern salte. Nou'n ganny mansyonnen dan bann distrik ki annan bin. *Bin site* i annan dan distrik e dan tou distrik i annan *bin site* ozordi. Alor Mosyon pe demann ou ki nou servi bann fasilite byen dan nou distrik.

Konman sa dimoun ozordi parey Onorab Loizeau in dir nou'n ariv 2024. 2024 ozordi Sesel nou pe servi *internet*, nou pe servi *WhatsApp* nou pe anvoy *emails*, nou pe konekte ek kanmarad lo *Facebook*. Savedir nou'n bouz lo en lot letap.

Be si nou'n kapab bouz lo sa lot letap, akoz ki nou konman bann sitwayen ozordi ki'n vwayaze ki'n vwar pei, ki edike, ki konn lir, ki konn ekrir, be selman nou viv parey bann dimoun ki napa ledikasyon? Nou pa kapab.

Ozordi nou pei i ptipti, nou, nou bezwen kapab responsab pou asire ki letan mon sorti ek mon sak salte dan lakour kot mwan, mon pa kapab zet li kot enn mon

vwazen. Mon pa kapab zet li dan larivyer. Mon pa kapab zet li dan laplenn lekol kot mon zanfan i lekol. Me mon bezwen kapab pran li met li dan en bin ki Lotorite, Gouvernman, Lazans in met a nou dispozisyon pou nou kapab servi. Se sa ki Mosyon pe demande Mr Speaker.

Bann kontrakter dan distrik. Letan nou koz lapropte souvandfwa nou retourn lo bann kontrakter. Bel Ombre letan mon'n vini an 2020 tou bann kontrakter ki mon'n vin zwenn Bel Ombre zot ankor la. Napa personn ki'n pous son lekor. Napa personn ki'n ganny pouse, par Lotorite Distrik ki la Bel Ombre. E napa okenn kontrakter ki'n dir ek mwan poudir son travayer pa'n kapab travay aköz son kontra pa permet li pey son travayer. Non.

Si son travayer in kite, son travayer in kite lo son prop *will*, swa i pa satisfè avek sa travay ki i pe fer, swa son kondisyon pa bon. Alor in kite lo son *own* Mr Speaker. E tou bann kontrakter ki nou, nou zwenn zot tou-le-z-an Lotorite Distrik, zanmen zot koz ek nou lo zot ti pe donn zot travayer *long service award*. Zot pa koz ek nou lo gratwite, pansyon, tan servis avek zot travayer zot. Zot pa koz ek nou lo la.

E tou bann dimoun ki pe fer sa travay, ki ankor la, zot pe fer sa travay aköz zot kontan. Zot pe fer sa travay aköz zot krwar dan lapropte zot pei, e zot osi zot pe donn en koudmen. Nou pa kapab annan en latitud kot fodre tou keksoz larzan pou en dimoun fer sa fodre larzan. Pou li pran son salte sorti kot li pou zet dan bin fodre nou pey li. Non, nou pa kapab. Sa nou pe montre responsabilite.

Mosyon Desheila Bastienne pe anvè ki tou Seselwa i pran nou responsabilite. Se tou ki Mosyon pe demande. Mosyon pa pe dir ek nou, pey sa enn pou zet son salte, pey sa lot pou fer sa, non pa sa ki Mosyon pe demande.

Fodre pa toultan nou enkilke nou dimoun, pou fer krwar zis larzan ki zwe rol dan nou pei. I annan sa bout responsabilite.

Bann kontrakter Mr Speaker. Ozordi Bel Ombre nou annan nou seri kontrakter ki zot kontinyen fer zot travay. La avek nouvo keksoz ki'n devlope, bann kontrakter ki ava la zot ava deside swa si zot anvè reste, si zot anvè al dan en lot distrik, si zot santi poudir zot *scope* ki zot ladan i pli pti zot anvè *expand* parey pe permet zot fer, zot ava *expand*.

Si zot santi poudir zot *scope* i bokou gran, zot anvi redwir li fer li vin pli pti, akoz zot napa mwayen lekipman, ase zonn pou travay, sa i pou zot swa pou zot fer.

Personn Bel Ombre pa pou bat okenn kontrakter pou li sanz son *scope* pou li dir li rod 50 travayer, fodre i annan en masin koup zerb. Non, sa i ava depan lo li konman bann endividi, si in kontan pou pran sa travay, pou li asire pou dir la la ki pe demann mwan, fodre mon annan mon lekipman, fodre mon annan ase zonn, parske sa i grander ki mon'n ganyen pou netwaye.

Akoz si mon pa delivre zot pou aras mon sa kontra pou donn en lot dimoun ki kapab fer sa travay avek tou lekipman neser pou li fer sa travay. Se tou ki mon'n aprann in ganny dir dan sa *meeting* e letan nou'n zwenn bann kontrakter zot in eksplik nou.

E nou dan rezyon nor, nou'n zwenn *LWMA* avek tou son *management*, bann Manm nor i la, pou nou zisteman ganny sa leksplikasyon lo bann kontrakter.

E prezan sa kontrakter, parey Sesel ozordi i en pei lib, kot dimoun i lib pou fer son swa, i ava deside si i dakor ek sa, oubyen si i pa dakor i *move*

*on* avek son lavi. E nou, nou ankouraz tou bann kontrakter pou zot kontinyen fer en bon travay.

Par egzamp dan nor kot nou, nou bann kontrakter ki la zot kontinyen fer zot mye, zot sey tou pou zot kapab rann nou distrik byen. Bann ki nou santi nou annan problem, nou apel zot personelman Mr Speaker, kot Lotorite Distrik, nou eksplik zot bann defi, nou eksplik zot bann konplent ki annan pou ki zot kapab zot menm fer sa travay byen.

E ziska prezan nou'n annan en bon lantant avek tou nou bann kontrakter ki pe fer sa servis dan nou distrik.

Mr Speaker, ki bann problem k nou, nou annan lo nivo Bel Ombre? Ozordi sa ki nou'n remarke avek dezans ki ti arive le 7 Desann lannen pase, Bel Ombre nou annan nou en kantite larivyer nou, en kantite larivyer, ki sorti anler, ki desann anba ziska bor lanmer.

I annan dimoun sa ki nou'n obzerve, pandan lemwan ou konnen ki i fer, i met tou son salte i kal la obor larivyer, i fer miray avek i annan i kouver ek en lasenn i met la. Zour gro lapli i tonbe, i ouver son lasenn i profite i pran tou son salte i zet dan larivyer e i ale ziska bor

lanmer oubyen al blok lezot landrwa.

I annan bann dimoun ki reste dan bann pti *zone*, li ki fer li osi akoz i annan rigol pre kot i reste, i pran tou son salte i pran i met obor rigol i met la, zour gro lapli i tonbe i profite i pran i zet dan rigol.

Be nou'n ariv 2024 Mr Speaker. Ozordi i annan posibilite kot ou avek permisyon ou kapab bril en pti gin ou salte, i annan dimoun ki antere, i annan dimoun ki pran i al met kot *dustbin*. Oubyen i annan dimoun ki fer en fwa letan dan lannen i pran en *pickup* i pey en pti larzan, i pran i al met lo *landfill*. E sa bann keksoz ki ankouraze Bel Ombre Mr Speaker.

Me par kont i annan en lot keksoz ki nou pe rankontre dan distrik Bel Ombre an relasyon avek salte, i annan plen dimoun i get en pti menn obor semen pou fer netway kot li, pti menn i vini i netwaye, i koup zerb i anmas tou salte.

Li i pa enterese konnen kote sa pti menn i al zet tou son salte li. Li lenportans se devan son laport i prop. Sa pti menn par egzanp Beau Belle kot pe koze Beau Belle, i annan en landrwa spesifik kot zot pran tou zot salte kot zot al tire kot madanm entel, msye entel koup

pye bannann, pye papay zot al zet dan en landrwa. Parske sa vwazen li i enterese ki son lakour i prop. Me i pa enterese kote sa pti menn ki'n peye i al zet son salte.

Sa osi i en problem ki nou bezwen fer fas avek pou nou asire ki lanvironnman pei i mars byen. Parske sa pti menn ki fer sa travay li i pa ganny *long service award* li, i pa ganny en trezyenm mwan li. Be i pe fer en travay pou sa dimoun li osi li Mr Speaker i ganny peye larzan li.

Me selman nou anvi ki letan i ganny peye sa larzan i pe fer sa travay kot en vwazen, i fer son travay byen. I pa al zet sa salte dan landrwa ki i pa apropiye me i devret zet sa salte dan landrwa ki apropiye.

Mr Speaker, avan Mosyon in vini, mwan mon rapel mon ti pe swiv sa program Dyalog an Direk, ki mon'n tann Onorab Loizeau koz lo la ki ti fer, kot zot in montre bokou lensidan kot bann salte partou. E ti montre Mr Belle ki ti pe montre li pe pase lo lans Au Cap si mon pa tronpe, kot i ti pe montre ou restan bann salte e menm koz lo malpropte ki dimoun i fer letan zot vin lo lans.

So ozordi, letan nou'n ariv 2024, nou pa kapab en pti Sesel touristik parey nou, kontinyen



annan sa bann kalite nwizans, nou pa kapab Mr Speaker.

Me par kont lo *SBC 2* - *SBC 2* mon rapel mon ti pe get en program sete Chantal Ghislain sa letan ki ti zournalis pe fer sa program. Pe montre, montre program lanvironnman zisteman, selman ti pe montre dan lavil *Victoria*, kot *Moncherie Take Away* en pti pe partou kot Barrel.

E dan sa program letan pe *interview* bann dimoun, se bann zanfan lekol ki ti ganny blanmen, non bann zanfan i zet zot bwat *juice* partou, zot pake *twisties* partou.

Be ozordi 2024 se pa bann zanfan ki sali nou lanvironnman, se bann adilt, gran fanm ek zonn, ki'n al lekol ki pe *drive*, ki annan *license* ki konpran, ki analiz byen se zot ki pe sali lanvironnman ozordi dan nou pei. Parske letan Onorab Desheila Bastienne i dir ek ou bann kontrakter i vini i park gro *pickup* i zet zot salte, se pa en zanfan ki dray *pickup*, se en adilt.

Beau Belle dan larantre Gran Kaz, nou annan nou en zoli platform avek 12 bin la, me nou osi nou annan plizyer bann kontrakter ki vin zet zot salte la.

Annan zour ou vwar plizyer bann bwat, bann bwat

kartron ki bann boutikye i servi, apre zot veye dan lannwit zot pran zot zet la.

Be ozordi ler nou pe koze, tou bann biznes zot sipoze annan en Kontra avek en lakonpanyen prive ki vin anmas zot salte tel ler. I annan i vin 4 er bomaten, i annan i vin 3 er. E sa ou peye dapre ou Kontra pou ou kapab ganny *license* pou *run* sa biznes.

Be i ava enportan pou lazans salte ozordi tyeke, balanse gete lekol bann biznes, ki zot vremen annan en dimoun ki tir zot salte, pou ki bann salte pa *end up* dan bann landrwa ki pa apropiye, parey Onorab Loizeau e Onorab Desheila e lezot Manm in koz lo la Mr Speaker.

Mon krwar lenportans ozordi se asire ki kit nou pei ozordi ek zistans kot nou'n arive, nou en pei touristik, i enportan ki nou tou nou pran nou responsabilite. Nou bezwen pran nou responsabilite.

Parske mon get letan Seselwa pe vwayaze Mr Speaker, toultan i fer sir in sanze parey nou dir *suit to kill*, i lo *airport*, son valiz i konnen i devret annan enn gro i devret annan enn ptipti, son paspor dan son lanmen son *boarding pass*. I pa mank nanryen li

Seselwa ler i pe vwayaze - non. Me par kont si i pou vin en apwentman i bliy son kart idantite, si i pou vin kot lekoi i bliye anmenn tel keksoz pou son zanfan, son salte i kapab zet partou, be ler i pe vwayaze tiktak lo *airport spot on* e i annord pou li vwayaze.

Be menm latitid ki nou pran pou nou fer kalite aksyon nou bezwen pran li osi pou nou pei. Sirtou letan i konsern lanvironnman. Parske parey Onorab Loizeau in dir i konmans dan lakour. E mon asire dan lakour ozordi nou tou ler nou fini manze a tab, swa en landrwa kot nou pe manze, nou pa pran nou lasyet manze nou zet lanmenm nou. Nou pa pran sa ki reste dan nou lasyet nou grate nou zet ater. Non.

Be letan nou'n aste en bwat *take away* nou pa'n ganny posibilite pou nou zet dan bin, be nou kapab mars ek li en zistans, ziska kot nou ariv kot sa bin pou nou zete.

Ler nou al bor lanmer, nou'n fer nou piknik nou donn nou bal e ozordi bor lanmer pou ale lo lans ou bezwen al lavey, parske ou bezwen rezerve landrwa pou ou gannyen. Parske Seselwa i servi bout lans pou li detann son lekor. E mwan mon kontan sa mon.

Dan Dimans dan Sanmdi ler ou fer letour lo bann bout lans dan nor partou dan sid, ou vwar Seselwa in etal li byen lo lans e mwan mon *happy*. Parske mazorite nou bann Seselwa zot viv dan bann blok flat, landrwa i ptipti, i sere.

Alor sel sans pou son zanfan, i anmenn li lo en bout lans. E sa pou mon i en laglwar Mr Speaker. Parske ozordi dan nou pei zot kapab servi nou landrwa *free*.

E sa i en fason defoule, me an menm tan letan zot fer sa nou pe demann zot, parske mazorite bann dimoun ki vin lo sa bann bout lans, zot pa reste dan sa distrik zot, be zot vin servi sa bann landrwa.

Alor letan zot in vini, silvouple si ou'n kapab pran ou zanfan met li dan *pickup* ou pa'n bliy ou zanfan lo lans, akoz in vin avek ou, be ler ou ale ou salte ki ou'n anmennen, li osi anmar li dan en sak plastik met li dan sanmenm sa *pickup* obor ou zanfan ou, mari, ou fanm ki ou'n vin avek, retourn avek kot lakaz parey ou pe retourn ek zot kot lakaz.

Oubyen an desandan ou kapab met li dan en bin. Pou ki demen letan en lot dimoun i vin servi sa bout lans i prop, i annord.

Parske nou annan nou sa latitud ozordi kot i annan dimoun ki netwaye, alor nou bezwen sali. So si nou ale lo sa latitud nou pa pou ariv vitman. E mon kontan letan monn tande dan Lasanble poudir anba vye ladministrasyon avan ti annan en kantite program, en kantite ledikasyon ki'n annan an relasyon avek salte, solman mon *happy* avek sa parske mwan mon kontan letan en ladministrasyon i montre lentere dan netway son pei e edik son dimoun.

E mon anvi dir Mr Speaker pou dir tou sa bann ledikasyon i ankor la. Napa nanryen ki'n ganny arete anba nouvo ladministrasyon. E Onorab Loizeau in fer en pwen kler li. 30 an pase ler li i ti travay *SBC* zot ti ankor pe endik dimoun lo lapropte, e 30 an pase se en lot ladministrasyon ki ti la. E 30 pli tar en nouvo ladministrasyon e nou ankor pe koz lo salte.

So sa i montre poudir napa nanryen pou fer avek *long service allowance*, i napa nanryen pou fer avek larzan, i napa naryen pou fer ek saler, me i annan pou fer *mindset* dimoun.

Fodre nou ki sanz nou mantalite Gouvernman vini, gouvernman ale, fer program,

mwan ki bezwen sanz mon mantalite pou mon konnen ki mannyer pou aprann viv, ou aprann konport ou, ki ou fer avek ou salte se tou senp.

Se sa ki Mosyon Onorab Desheila Bastienne pe demande, etandonnen lenportans en lanvironnman zoli ki nou annan e Bel Ombre i en lanvironnman ki manifik lo zoli, prop e sen dan lekonomi e byennet nou pei e nou nasyon, Lasanble i fer en lapel avek tou Seselwa e tou Seselwa pou vin pli responsab e aret zot salte dan landrwa ki i pa apropiye, e demann Gouvernman pou ranforsi Lalwa kont zet salte.

I annan en kantite Lalwa Mr Speaker, an relasyon avek zet salte zis nou bezwen fer li morde parey nou dir konman bann Manm Lasanble dan Lasanble Nasyonal.

E alor mon ti ava kontan montre sipor pou sa Mosyon parske mwan dan mon distrik nou en distrik touristik, mon pa oule ki dimoun i vin zet salte kot mwan e mon pa oule ki mon dimoun i sorti Bel Ombre zot al kit zot salte en pe partou, pou montre lezot distrik pou dir nou nou pa konn viv.

Be nou nou konn viv Bel Ombre, parske pou sa rezon Mr Speaker nou'n entrodwir bann nouvo fasilite bin Bel Ombre,

zis Bel Ombre ki annan sa. Zoli *bin site* ki nou'n penn li ver ki *friendly* avek lanvironnman, nou'n met diferan kouler bin ladan pou nou kapab *differentiate* nou salte. Nou'n fer sa anba Bel Ombre, La Passe e nou'n fer enn anler Le Niole. Nou annan bann *bin site* ozordi ki nou'n fer *Cameroon* obor lekol Beau Vallon kot nou'n kouver nou *bin site*.

Parske nou pe montre dimoun poudir *bin site* osi i annan son lenportans. Se pou sa rezon nou, nou kontinyen fer bann keksoz nouvo pou nou distrik menm anba en novo ladministrasyon, nou kontinyen fer sa travay me se *mindset* dimoun ki bezwen sanze.

Fodre *mindset* dimoun nou bezwen viv byen, konport nou e fer sir ki nou kit nou pei annord prop parey Mosyon Onorab Desheila Bastienne pe demann ou.

Mr Speaker, mon ti ava kontan montre sipor pou sa Mosyon. E mon ti ava kontan ki lezot Manm osi nou fer parey, parske apre tou Sesel i nou pei e se nou ki bezwen protez li e prezerv li. Mersi bokou Mr Speaker.

### **MR DEPUTY SPEAKER**

Mersi Onorab Arissol. Mersi pou rapel mon mannyer nou ti netway savat lontan, vre nou ti fer koumsa. Onorab Adelaide *you are next*.

### **HON FRANCOIS ADELAIDE**

*Thank you* Mr Speaker. Bonn apre midi tou dimoun a lekout espesyalman bann dimoun Baie Lazare.

Mr Speaker, mon pou kontiny kot Onorab Arissol in kite lo sa Mosyon par Onorab Desheila, pou ki nou kit nou pei prop e zoli.

Mr Speaker, i *remind* mwan ou parol semenn pase ki ou ti dir ki ler i annan bann Mosyon, bann Prozedlwa ki pou anmenn plis responsabilite pou nou pep, kot nou pou kapab fer plis dibyen nou pei, nou pa pran sa lapros politik. Me nou pran sa lapros patriyotik, pou nou kapab fer en keksoz ki pou amelyor standar nou pei.

Mr Speaker, mwan osi mon rapel lontan nou paran, nou granparan i dir ou ler ou dir ou en Seselwa, i annan en vertir, en kriter ki ou bezwen annan lapropte.

E sa i ti kalifye ou pou ou vin en Seselwa. Pa vedir mon pe dir ou ki zot ti bezwen sinyen me ler en dimoun i gete ou prop, ou responsab, ou annan

lapropte, bann dimoun ti dir sa en kriter pouli vin en Seselwa.

E mon ankor krwar ladan. E mon krwar en Seselwa i devret pe portre sa zafer lapropte, responsabilite, kourtwazi dan son bann demars ki i fer Mr Speaker.

Mr Speaker, mwan osi mon distrik i enn ki en distrik ki vreman touristik e dayer mon pe gete poudir konmela tou *businessmen* ki tou dimoun konmela in fer lotel Baie Lazare ouswa dan zanmirant, i pa vedir ki lezot distrik napa sa lapropte parey nou annan. Be nou annan en *charme* dan Baie Lazare ki i atrakte dimoun. E lapropte i enn parmi bann keksoz ki mon krwar ki atrakte bann investiser, pou zot vin *settle* dan Baie Lazare.

E nou osi nou bezwen pran kont ki nou lanvironnman, i bezwen reste enn ki pou kontinyen akey dimoun e fer plis dimoun vin dan nou distrik pou kapab fer biznes e kot nou distrik i ava vreman pe devlope.

E parey tou dimoun pe pas dan sid, Baie Lazare i en distrik ki pe vreman devlope. E tou dernyerman nou ti dan en vizit avek Minis Radegonde semenn pase, kot nou ti al vizit bann letablisman touristik. E enn en topik ki ti monte e dan

*SBC* i ti evidan e menm lo rezo sosyal osi i ti en keksoz ki ti evidan, se i annan en *bin site* Anse La Mouche ki depi en pe letan, nou pe ganny en problemm avek pou ki dimoun i kapab respekte sa landrwa servi li byen zet zot salte, an menm tan annan responsabilite pou kit sa landrwa prop e zoli.

Mr Speaker, kantmenm nou pe dir ki popilasyon i devret zwe en rol enportan, mon osi krwar ki bann biznes, bann biznes prive nenport ki biznes osi zot bezwen kapab zwe zot rol osi, akoz ler mon pe get sa *bin site* Anse La Mouche i en *bin site* ki byensir i annan enn de bann lakour prive ki servi - me ler ou get bann salte bann keksoz ki zot *drop* laba, parey mon bann koleg i dir ou, laplipar ou gete se bann *déchets* ki annan biznes, bann gro, gro kartron mon pans pa si toulezour zabitan Anse La Mouche i annan ase larzan, bann zabitan prive pou aste 5 *fridge*, sepa konbyen masin lave. Be sa i devret - i - mon krwar i pe sorti kot bann landrwa ki pe fer biznes.

E parey Onorab Arissol in dir, *enforcement* mon krwar i en keksoz ki i tonm anba *purview* LWMA e mon pou demande ki tou bann responsab kot LWMA i *at least* met sa konman enn

zot - i met enn konman zot pa konman en kriter me konman en fason obzerve, pou zot pas en kou kot sa bann biznes e gete si sa bann biznes zot annan zot *log book* ki I mandatwar anba Lalwa biznes ki ou annan, ler ou pe fer biznes Sesel.

E mwan mon pou al en pe pli lwen, petet dan Departman Touris mwan dapre mon konpran, i dir ou si ou annan 4 e plis lasanm ou bezwen annan ou sa kontra.

Mwan mon pe *believe* me si ou pe fer biznes, kantmenm ou annan en lasanm, ou bezwen kapab montre ki kote ou pe zet ou salte. I pa vedir mon pe segriget *from* - biznes tou biznes me mon krwar i en keksoz ki enportan. E si nou tou nou pran nou responsabilite, mon krwar nou kapab fer en keksoz pou nou distrik.

Mr Speaker, mon'n pran en pti pe letan lo la, aköz sa i en topik ki so, e nou konman Lotorite Distrik, nou pa oule ganny vwar poudir nou, nou pa pe fer nanryen e ki sa topik pe sot nou.

Mr Speaker, ankor bann lezot keksoz ki nou'n fer avek Minister Lanvironnman, nou pe menm sirtou la pou Anse La Mouche, pou nou kapab sey *deal* ek sa problenm - nou pe

menm al lo en lapros *one home one bin*.

Ki nou'n konmans koze en pe letan lo sa pratik. Kot tou bann lakour la dan Anse La Mouche, ki nou pou kapab *at least* asiste zot avek en bin, e nou, nou ava prosedir lo ki mannyer nou pou kapab pase pou anmas sa bann bin, en fason ki sa *bin site* la i ava get en pe pli prop. E *once* ki sa i get en pe annord, byensir limaz Baie Lazare pou sanze, *be it* lo nivo medya, aköz bokou nou ganny bokou bann move piblisite avek sa bann akt koumsa.

Mr Speaker, Mosyon Onorab Desheila i pe koz lo ki mannyer nou pou gard nou lanvironnman zoli e prop. Ki mannyer nou pou fer nou pep vin pli responsab. Kot nou pou bezwen edik nou pep pou aret zet salte an bonnavini. Apre nou'n demande ki Lalwa i ganny ranforsi.

Mr Speaker, ki mannyer nou pou fer sir ki Lalwa i kapab ganny ranforsi, pou ki Seselwa i pran son responsabilite?

Petet si ozordi si ti annan en *panel* devan mwan, mon ti pou kapab demann zot konbyen dimoun ki'n ganny pourswiv ki'n kas Lalwa Lanvironnman? Kot zot in zet salte?

Petet la mon napa sa lenformasyon, me selman i ava en keksoz ki mon pou bezwen *enquiry about* kot pou mwan demande pou mwan gete, eski sa Lalwa i pe mars *comme il faut*?

E petet mon pe kapab annan en move konsep lo la, mon pe koz en keksoz ki mon pa tro konnen. Me solman mwan mon asire ki sa Lalwa pa pe mord ase, e se sa ki pe fer - Seselwa pa tou Seselwa en - serten Seselwa kontinyen vin pli neglizan e zet salte an bonnavini.

Mr Speaker, ki mannyer petet nou kapab ede pou rezourd en pe sa problem Mr Speaker? Lontan ler ou ti ale ou ti aste swa en televizyon, swa en *washing machine*, swa okenn en lekipman elektronik, ou ti annan son garanti e ler ti annan en problemm avek, ou ti kapab anmenn kot sa lakonpanyen, ouswa zot ti kapab donn ou en landrwa kot ou kapab anmenn sa bann lekipman pou al ganny repara.

Me ozordi avek sa lekipman elektronik ki pe vini Sesel, ou lontan ou ti ava servi li 2 an 3 an avan ler i konmans ganny problemm. Konmela menm 6 mwan sa bann keksoz i konmans ganny problemm. E byensir ou napa ni pyes, ou

napa ni landrwa pou anmennen pou aranze. Finalman ou pou bezwen pran sa bann zafer, al zet li kot bin.

E ki souvandfwa konmela zot ankonbre bann landrwa kot bann bin e sa ki fer ki ler en dimoun i vwar en landrwa i konmans vin en pe dezord, zot kontribye zot anmenn plis, e ki fer nou vwar plis vermin, nou vwar sa bann salte i tarde ganny tire obor semen.

E sa i kree en *eyesore* e byensir ler ou gete i pa donn en bon zimaz pou distrik. Petet en sizesyon ki mon ti ava demann ek bann Lotorite, fer sir ki bann dimoun ler i pe fer vini bann keksoz, i bann keksoz ki lo standar. Ki pou dire, akoz Kreol i travay, i travay dir pou li ganny en larzan pou li kapab aste en lekipman elektronik. Sirtou ler ou pe koz parey konmela en *flat screen*, ou pe koz en *washing machine* ki la ozordi in ariv R7 mil, ou pe koz en *fridge* ki R8 mil an montan.

So i bann keksoz ki Seselwa pe met larzan. E nou bezwen fer sir ki nou pe ganny bann keksoz ki de kalite. I pa zis de kalite e ki i ava annan pyes, ki ler i a kase, en dimoun i a kapab anmenn aranze e i ava servi li pli lontan e sa i ava ede ler nou pe koz pri lavi. Sa osi i ede dan fer desann pri lavi.

Si ou pe aste en televizyon tou le 6 mwan, me petet ou ava kapab aste en televizyon tou le 3 an, e sa i ava fer ki ou ava annan plis larzan pou fer bann lezot depans avek.

Mr Speaker, mon ti anmenn en Mosyon isi dan Lasanble Nasyonal, pou ki Gouvernman e bann sekter prive petet nou ede dan met bann kamera sirveyans en pe partou dan distrik.

Eski sa osi pa ti ava en fason lo ki mannyer nou ti a kapab ede vey nou pei e dekouraz sa bann move pratik zet salte. I annan pei Mr Speaker ou pa kapab zis ale al zet en salte koumsa. Ou ganny atrape lo *camera*, ou ganny *fine*, ou ganny sarze e ou pou bezwen peye.

Me isi i ankor bann keksoz ki sitan fasil, en dimoun i kapab pase avek son bouret salte, sirtou bann lakonpanyen konstriksyon zet dan bin, bann biznes ki annan bokou bann komodite, e zot pran zot bann salte zot pran zot pase dan *pickup* zet nenport ki landrwa. E si nou ti annan sa bann kamera sirveyans, byensir sa ti ava en *deterrent* e dimoun ti ava fer sir zot zet zot salte dan bann landrwa ki apropiye.

Mr Speaker, ozordi nou bezwen mazine poudir bokou

pei pe al lo *circular economy* e ki nou osi nou pa devret mank sa loportinite, kot nou resikle, nou reservi nou modifye bann keksoz ki zis ti pou al zet dan lanvironnman.

Me mon krwar ki petet mon pa pe tro demann Gouvernman, tou bann parti prenan ki ti ava kapab petet met larzan - met larzan dan sa domenn, pou ki nou ankouraz plis Seselwa pou servi bann keksoz resikle, reservi modifye pou ki nou refer zot ganny lavi ankor dan plas pran tou sa bann zafer zete.

E la Mr Speaker, permet mwan pou mwan felisit en zenn fanmir en zenn koup Baie Lazare Mr Davis Monthy avek son madanm ki Sanmdi pase i ti fer en seremoni kot lekol Baie Lazare e kot zot ti zot *NGO* i apel *Green Generation Seychelles*, kot zot osi pe ede pou ki mwens salte i ariv dan lanvironnman. E si zot pas kot legliz kot lekol Baie Lazare zot pou vwar i annan en *dolphine* ki'n ganny fer, kot bann zanfan i kapab anmas bann *pet*, bann boutey met ladan e ki sa bann zafer pa fannen partou dan lanvironnman.

E zot in osi fer en fabrik en *whale shark* ki zot in pran zot met kot Lasosyasyon Peser Baie Lazare, kot ankor enn fwa kot i



annan bann *pet* obor *bus stop* ouswa menm lo *bus stop* ou pran ou met dan sa *dolphine* e apre en dimoun i pase i anmase i tire e sa prosesis i kontinyen.

Sa tousala i bann keksoz ki bann zenn, petet nou ti devret ankouraz zot en pe pou fer plis sa bann keksoz koumsa. E ki larzan osi i devret en keksoz ki devret aksesib avek bann dimoun ki pe fer sa bann tel linisyativ.

Konmela Mr Speaker, pou ou ganny ou en *Grant* dan sa *Environmental Trust Fund* i en keksoz ki preski enposib, i difisil pou ou kapab akse en larzan, pou ou kapab fer bann proze pou ou ki konsern lanvironnman protez lanvironnman.

E petet sa ti en domenn osi kot plis latet ti devret ganny mete ki mannyer pou fer sa *fund* vin en pe pli fasil, kot dimoun pa ti ava ezite me petet zot ti ava ankouraze pou zot al tap dan sa *fund*, pou zot kapab ganny larzan pou zot fer zot bann proze.

Mr Speaker, mon konnen mon pe pran en pe letan me selman mon annan enn de topik, me solman mon pa pou tro tarde, mon ava pran en lot pti keksoz ankor, ki mon krwar i ede si Gouvernman e lezot bann *partner* kle nou ede pou

fer pou *tackle* i kapab amelyor en bon pe bann zafer salte Mr Speaker.

Monn tann koz lo kontrakter, e Baie Lazare nou pe ganny en pe problemn *in regards* bann zafer tir bin. Nou pe ganny en pe problemn, e sa parler i fer ki bokou salte i ganny fannen partou e sa i fer ki dimoun i annan bann move konsep lo lafason ki distrik i travay. E petet zot krwar nou pa pe fer ase.

Mr Speaker, mwan mon krwar ki Departman *LWMA* i bezwen serye ler i donn kontra, sirtou bann dimoun ki tir salte dan bann distrik. Nou pa pe dir pa donn personn Kontra. Non i normal pou nou donn dimoun kontra pou tir salte. Me selman nou pa kapab pran plis ki nou kapab fer.

E mon konnen poudir kontra pe al ganny revize e sa i en keksoz ki mon konman *MNA* Baie Lazare ki souvandfwa mon ganny sa bann konplent sorti kot diferan dimoun *in regards* ki bin pa pe ganny tire e salte pe fannen partou e sa pe donn move limaz nou distrik. Mon pou bezwen entervenir e fer sir ki nou donn dimoun ki pe tir salte bann kontra ki zot kapab fer.

Nou tou nou kontan ki dimoun i ganny larzan. Nou tou

nou kontan ki dimoun i amelyor zot lavi, me nou tou nou ti ava kontan ki Seselwa i ganny valer pou son larzan ki i pe depanse.

Mr Speaker, parey mon dir avek Onorab, sa Mosyon i enn ki vreman, vreman enportan. E mon pa pou kapab mank sa lokazyon pou mon fer mon pti *speech* parey ki mon'n fer. E mon pou garanti ou ki mon pou donn ou sa sipor, akoz mon krwar sa i en Mosyon ki *beyond politics*.

I en Mosyon ki nou devret Lasanble ozordi pe anvoy en mesaz direk avek Lepep Seselwa, pou ki dezormen in ler pou nou pran nou responsabilite e kit nou pei prop kit li pli prop ki ti ete avan e fer sir ki ler nou kit sa *monde*, nou kit enn ki pli meyer ki nou zanfan i ava erite e zot osi zot ava pran sa leritaz e zot ava as avek fitir zenerasyon ki pe vini.

Onorab, garanti mwan mon pou ou pou ganny mon sipor e ou pa pou zis ganny mon sipor, mon pou osi ede dan sa prosesis parey mon pe dir ou dan distrik avek *LWMA*, avek tou bann lezot lazans, ki pou petet pou ede pou nou kapab fer sa rev ki nou annan vin en realite, mon donn mon komikman ki mon pou en militan, ki pou osi kontinyen debourye pou kit pou ki nou

kapab kit Baie Lazare prop. Nou kapab kit nou pei prop e nou kit li pli meyer pou nou bann fitir zenerasyon.

Avek sa de mo Mr Speaker, mon ava remersi ou e mon ava remersi Lasanble pou zot. Mersi.

### **MR DEPUTY SPEAKER**

Mersi Onorab Adelaide. Prosenman lo lalis se Onorab Wavel Woodcock.

### **HON WAVEL WOODCOCK**

Mersi Mr Speaker. Bonn apre midi tou dimoun a lekout, espesyalman zabitan Grand Anse Praslin.

Mr Speaker, permet mwan pou mon swet Mrs Esterilia Lemiel bonn aniverser. Ozordi i ganny li 101 an i pli vye zabitan dan nou distrik Grand Anse Praslin.

Mr Speaker, nou lanvironnman, labote nou pei ki atrakte touris dan nou pei. E nou lanvironnman labote nou pei, parey nou dir i nou ganny pen. E i enportan ki nou gard nou pei prop e zoli. Problem Mr Speaker, se ler i annan serten nou bann dimoun ki malerezman pa pe pran zot responsabilite, ouswa zot pa pe pran o serye sa nesesite pou gard nou pei prop.

Ler i annan salte dan nou pei e ler i annan bann landrwa kot nou pe ki serten dimoun pe zet salte, e kliyan i pase, touris i pase, i pa portre en bon zimaz pou nou pei ki gat en pe sa zoli zimaz nou pei,

E konman en nasyon i osi enportan pou nou, nou kontan ler nou pase nou vwar ki nou en pei ki prop. Akoz ler nou pe zet salte partou i annan plizyer bann *rodent* i pa bon osi non selman pou nou lanvironnman me osi i pa bon pou lasante piblik osi.

Mr Speaker, mon bezwen fer resorti poudir i pa zis responsabilite Gouvernman pou gard nou pei. Wi, i annan bann antite ki annan sa responsabilite, pou lo kote zesyon salte, lo kote netway nou distrik atraver bann kontrakter ki bann Manm in koz lo la, ki ganny peye pou netway bann diferan rezyon, bann diferan *lot* dan nou distrik e an menm tan bann antite Lanvironnman *LWMA* ki tir salte ki ede pou gard nou pei prop.

Me si tou dimoun ti pe pran son responsabilite Mr Speaker, pou gard lapropte dan nou pei, i ti pou ed sa bann antite, i ti pou ed sa bann antite Mr Speaker pou fer zot bann louvraz bokou, bokou pli fasil.

Mr Speaker, parey enn de entervenans avan mon dan zot entervansyon, zot in koz en pti pe lo bann kanpany dan lepase. Mon rapel menm mwan dan mon lanfans avan ler ki *RTS* ti vin *SBC* - dan bann letan *RTS* Mr Speaker, ti annan bokou bann kanpany lo televizyon, pou gard nou lanvironnman prop e zoli, zet nou salte dan bin pa zet nou salte *anywhere*. Ler nou al lo lans fodre nou anmas nou salte. Menm bann program ki'n kontinyen anmezir ki nou'n grandi ozordi mon vin en adilt e mon annan mon prop zafan.

Mr Speaker, i enportan ki konman en pei nou kontinyen avek sa bann *campaign*. Deza i annan bokou bann *campaign*, i annan bokou bann advert ki souvandfwa nou vwar lo televizyon kekfw nou bezwen *increase* lentansite ki nou met sa bann sa ki nou apel bann *TV spots*.

Me ozordi i annan bann lezot zouti ki nou kapab servi. I annan bann lezot keksoz ki nou kapab servi, pou nou ede donn plis vizibilite e ankouraz tou dimoun, tou Seselwa zafan adilt, trwazyenm-az pou zwe en rol dan gard nou pei prop.

Ozordi nou kapab servi bann *Facebook reel*. Ozordi rezo sosyal i ase popiler. Nou

annan *whatsapp* ki ozordi ou kapab fer en *video* bomaten ou anvoy kot detrwa dimoun en pti moman in *viral*, i pe sirkil partou dan pei.

E sa i bann *avenue* ki nou kapab servi ozordi pou nou ede promot, promot e sansibiliz e edik nou pep lo lenportans pou gard nou pei prop, lo lenportans pou nou zet salte kot nou sipoze pe zet salte.

E zisteman avan sa Mosyon in vini, mon'n fer li mon devwar pou mon koz avek serten zofisyé kot *LWMA*, kot i konsern zesyon salte lo nivo mon distrik e lo nivo zil, lo nivo Praslin sirtou. Akoz i annan en *body*.

Annefe se *LWMA* ki annan sa responsabilite pou zesyon salte antye lo Praslin, lo Praslin Baie Sainte Anne, Grand Anse e zot annan bann kontrakter ki fer sa bann louvraz dan distrik.

Me sa ki in dir mon se ki nou bezwen kontinyen avek ranforsi nou sistenm ledikasyon, plis bann lesan ki koz lo sa size lapropte, gard nou pei prop lizyenn tousala.

E zisteman Mr Speaker, mon pou bezwen dir poudir lo Praslin, nou annan bann *NGOs* nou parey *TRASS* i enn, ki angaze dan bokou bann aktivite. Resaman pa tro, tro bokou letan pase zot in fer bann

aktivite, netwayaz lo Curieuse e plizyer landrwa Baie Sainte Anne, Anse La Blague.

E nou osi annan bann lekol Mr Speaker, ki pran netwayaz, ki pran lapropte, ki pran konservasyon ek prezervasyon nou lanvironnman vreman serye.

Zisteman le 7 Zilyet detrwa semenn pase Mr Speaker, ti annan en aktivite, ki mon ti la, mon ti *attend* sa aktivite ki ti organize par lekol Baie Sainte Anne an kolaborasyon avek Minister Lanvironnman e osi bann lezot lazans dan Gouvernman Lanvironnman, *LWMA* ek bann lezot lazans e menm plizyer lorganizasyon dan sekter prive an partenarya avek bann lekol lo Praslin.

Sa bann lekol, lekol prive, lekol Grand Anse Praslin primer, tou bann lekol lo Praslin ti angaze ladan kot en lamars ti ganny fer ki ti sorti Ile Eve ziska, ziska Cap Samy e mon ti la ansanm e Minis Lanvironnman ti la, Onorab Porice ti la, kot nou ti annan bann plakar ki nou ti pe *display*, nou ti pe marse, nou ti pe ankouraz bann zenn Mr Speaker, mwan mon plakar ti mark "*Keep It Clean - Keep It Green*" lo la.

E nou ti annan bann zanfan, bann adilt, bann diferan lazans ; nou tou nou ti zwenn ansanm pou nou ede dan promouvwar lapropte lo nou zil. E bann zenn ti vreman apresye sa, bann *head teacher* ti la, plizyer bann ansenyan ti la - i en keksoz ki ti byen ganny resevwar - ti ganny apresye i en fason pou nou ankouraze e edik nou bann nou dimoun, nou bann zenn, sirtou nou bann zanfan.

En lot fason ki mon krwar Mr Speaker, ou konnen ennler nou sey azir dan en fason ki tro popilis, kot nou pa oule adres bann size pertinan, ouswa bann size ki nou santi poudir be si mon fer sa i pou petet fer dimoun pa siport mwan, akoz si bann desizyon ki *hard*, bann desizyon ki difisil Mr Speaker.

Me selman mwan mon obzervasyon ki mon'n fer dan bann pei ki mon'n vizite e zisteman monn kapab koz lo *Singapore* konman en legzanp tipik, ki petet nou kapab swiv ler nou pe koz lo ranforsi Lalwa - sa Mosyon pe demande pou ranforsi Lalwa kot i konsern zet salte an bonnavini.

*Singapore* Mr Speaker, i annan bann *finer* pou *littering*. Si ou zet salte an bonnavini i annan bann zofisye ki dan bann diferan *spot* ki veye e si ou

ganny atrape pe zet salte *littering* Mr Speaker, ou ganny *fine*.

I annan en *fine* ki ou gannyen. Bann *first offenders* zot ganny *fine* Mr Speaker 1,000 *Singapore Dollar*. Sa i en *deterrent* pou anpes dimoun zet salte bonnavini. Si ou ganny tyonbo en fwa ou ganny *fine* 1,000 Dolar *Singapore*.

E si ou ganny tyonbo dezyenm fwa Mr Speaker, ouswa ou en *repeated offender* Mr Speaker, ou ganny *fine* 2,000 Dolar *Singaporean Dollar*. E an plis ki sa dan zot Lalwa i fer provizyon *for what is called Corrective Work Order. CWO*.

Akoz si ou ganny tyonbo a plis ki de repriz, en repriz a de repriz ou ganny tyonbo pe zet salte dan landrwa piblik, ou ganny anba sa *Collective Work Order* ou ganny oblize pou al netway en landrwa piblik, swa en *park somewhere* ki ganny idantifye, kot ou ale ou ganny oblize ou ganny forse, pou netwaye konman en penalti Mr Speaker.

Mwan mon krwar i enportan pou nou ranforsi Lalwa. Se sa. Akoz nou pa kapab les dimoun an bonnavini pe zis zet salte pa pe pran zot responsabilite. Mwan a plizyer repriz Mr Speaker, dan mon loto par devan mon en dimoun

pe dray konman i fini bwar son boutey delo i zis balans par lafnet.

*I mean* i annan bokou ledikasyon ki'n ganny partou lo televizyon, parey mon'n dir lo rezo sosyal osi i annan, me selman nou kapab servi li plis, me selman *still* i annan dimoun Mr Speaker ki pa pe pran zot responsabilite. E i enportan ki sa bann *deterrent* pou anpes dimoun fer sa bann keksoz.

E mon dakor avek sa ki Onorab Arissol in koz lo la boner. Annefe Onorab Audrey Vidot boner ler i ti pe fer son lentervansyon, i dir ar dimoun pe zet salte akoz zot pa pe ganny pey serten *allowance*.

Konmsi fodre ou pe ganny *allowance* pou ou pa pran ou responsabilite? Akoz mon pa pe ganny *allowance*, mon pou tir salte dan mon lakwizin mon pou zet dan mon lasanm Mr Speaker, ouswa mon pou balans par lafnet?

Mr Speaker i enportan ki nou konman imen nou pran nou responsabilite. Pou sofgard nou lanvironnman e gard nou pei prop eski nou bezwen dimoun vin *deal* avek nou, vin fors nou, vin bat nou pou nou, konmsi nou pa konnen poudir sa i nou responsabilite? Nou pa konnen poudir, poudir salte i en keksoz

ki pa bon pou nou lanvironnman, ki pa bon pou nou Lasante? Kot i bezwen annan en fason apropiye pou *dispose* bann keksoz ki nou servi ki nou pa bezwen - nou salte?

Mr Speaker, lo nivo distrik i enportan; si ou dan ou distrik ou, ou'n ganny elekte en term de term ou vwar poudir i annan problemm zesyon salte dan ou distrik, Mr Speaker, i ou responsabilite konman en *leader* swa *DA*, or zofisyè Gouvernman pou idantifye bann *hotspot* dan ou distrik ki annan sa bann problemm.

Mr Speaker, sa ki nou'n fer lo kote Praslin - annefe Onorab Porice mon menm, nou'n annan *meeting* - nou'n annan plizyer diskisyon avek *CEO LWMA*, kot mwan - nou personnelman mwan mon'n apros li monn koz avek li - *in fact* lo sa Mosyon parey mon'n dir ou monn koz avek sa dimoun ki ansarz *LWMA* Praslin, pou demann son lopinyon.

Ler i annan bann *issue*, bann *hotspot* dan distrik Mr Speaker, i annan dimoun i anvoy ou mesaz, i *call* Onorab i annan tel problemm tel *bin site* i annan problemm. I mank bin, pa ase. Ou konnen ki nou fer Mr Speaker? Mon ti dan en

konversasyon avek Minis Lasante mon annan en konversasyon avek *LWMA* - ou konnen ki pe arive la lo Praslin? Dan plizyer kwen *as we speak now* i annan bann *bin site* ki ganny kree. Anse Kerlan, Amitie, Grand Anse, *Ex Teachers*, nou pe azout plis *bin site* akoz vre anmezir popilasyon i grandi ou pe espekte ki dimoun pe zet plis salte.

Alor i ou responsabilite konman Manm Lasanble Nasyonal *or* konman en sa *DA* sa distrik, pou li idantifye bann konsern dan son distrik e met sa bann konsern pli devan.

Kekfwa pa tou keksoz ki ariv konman ou met en ka devan, ouswa ou fer en propozisyon en sizesyon ki ariv deswit. Me selman i enportan kot ou lev sa telefonn, ou *call* sa lotel konsernen ou dir, gete ou konnen i annan serten landrwa dan nou distrik, ki demann nouvo *bin site*.

Ouswa zisteman i annan en madanm fek koz avek mwan la par deryer kot lekol primer e i konnen lekel li, nou fek koze la i dir anvi ki sa Mosyon e la Onorab i annan en *issue* i annan bann dimoun dan sa zanmirant ki pe zet salte la. Mon dir be *ok* napa problemm mon donn li limero sa zofisye ki

ansarz *LWMA* Praslin e mon menm mon'n pran li konman mon devwar monn *call* sa zofisye e mon'n dir li poudir i annan sa problemm dan sa reyon. I dir mwan be dan sa reyon la nou napa en kontrakter dan sa reyon, en keksoz ki nou bezwen get ladan.

E pa zis sa, i annan plizyer landrwa ankor lo Praslin ki nou santi parey Cherimont, Cherimont Mr Speaker *DA*, mwan menm, bann zofisye, bann zabitan distrik ler in konplent poudir akoz Cherimont i annan en *trail* ki ou pase pou ou ariv Anse Lazio e bokou dimoun i malere Mr Speaker.

E sa ennlere se nou Seselwa menm ki fer. Pa tro etranze en. Nou desann nou *park* nou loto ler nou fini bwar nou labyer, ouswa nou fini manz nou *take away* nou pran nou balans dan lapay.

E a 2 repriz Mr Speaker, Praslin nou'n vin ansanm bann zofisye *Local Government* avek led *LWMA*, avek led bann brigad dan nou distrik Mr Speaker, nou'n al netway Cherimont. Nou'n al tir salte. Pa se tou ki nou fer Mr Speaker. Ou konnen koman en kominote, nou bezwen pran responsabilite nou osi.

Nou bezwen ede fer bann pti louvraz volonter - nou vin ansanm. E zisteman Mr Speaker, mon pou remersye, mon pou remersye enn Mervin Esther, ki ansarz LWMA Praslin ek son bann zofisye, ki toultan sak fwa ou *call* li i annan en *issue* deswit zot vini zot ede. Mon pou remersi mon DA Chantal Laure. Mon pou remersye tou bann zofisye dan distrik Mr Speaker e nou bann brigad, e bann volonter Mr Speaker.

Zisteman zis pou mansyonn detrwa bann volonter ki'n toultan la pou vin donn en koudmen Mr Speaker, mon mazin Roland Anacoura, mon mazin Jackson, mon mazin Perry, mon mazin Stephen Etheve, mon mazin ek Roberto, si i annan parey bann *hotspot* bann landrwa, ti annan sa *issue Redeem Centre* obor stad kot dimoun ti pe zet salte, Mr Etheve in vini in donn en koudmen ek son *excavator* nou'n grate nou fer sa landrwa prop.

E lezot landrwa ki nou idantifye i sal, sa bann dimoun Mr Speaker, zot in fer sa bann keksoz *free of charge*. Zot pa'n sarz R1 pou ed nou netway sa bann landrwa, zot in vini, zot in ed nou pou nou netway bann

landrwa ki nou santi i bann *hotspot* dan nou distrik.

E pa fini Mr Speaker, la konman nou pe koze la, mon avek DA e detrwa zofisye LWMA avek en lot antite Gouvernman, nou'n idantifye 2 landrwa ankot kot byento nou pe al organize nou pe al netwaye. e i annan enn de pti sirpriz ki nou'n organize pou sa bann landrwa Mr Speaker, kot i nou responsabilite. I pa zis responsabilite LWMA i pa zis responsabilite MNA, i pa zis responsabilite DA me i responsabilite sak sitwayen Mr Speaker.

Lot fwa ti annan en *issue* konplent zafer klinik, Mr Speaker, nou'n vin ansanm nou dir *ok* i annan problem, annou vin ansanm, annou vin ansanm DA, MNA, *liaison officer*, bann *nurse*, brigad e tou bann lezot zofisye dan distrik nou ti vini nou ti organize nou ti ale nou ti netway nou klinik. I pa fer dezyenm fwa nou fer sa Mr Speaker.

Ou pa kapab zis asiz se ou, ouswa ou *ok* ou pa reste dan sa distrik, ou reste dan en lot distrik me selman *still* ou distrik i pou ou. Ou kapab kordin ek ou bann zofisye - dir annou en zour Roche Caiman i sal Mr Speaker, mon vwar poudir i annan detrwa landrwa



ki demann netwaye, mwan konman sa *MNA* mon pa kapab lev mon telefonn *call* mon *DA*? Met detrwa zofisye, *call* mon brigad dir, bannla annou al tel landrwa annou al netwaye, annou al okipe.

Konmsi i nou bezwen pran responsabilite, ou pa kapab zis blanm Gouvernman. I ou distrik ou konman *DA*, ou konman sa *MNA* i osi ou responsabilite. Wi, nou rol prensipal se pou pas Lalwa, se pou debat pou nou zabitan dan Lasanble, me selman i annan bann pti keksoz ki nou kapab fer pou ede, sak pti keksoz ki ou fer i zwe en gran rol. Akoz ler ou pe *lead by example* lezot dimoun i swiv ou.

Sanmen sa rezon ki ou vwar distrik Grand Anse Praslin, mon bezwen dir tou bann *MNA* ki vin Grand Anse Praslin, i dir zot be Grand Anse i en distrik vreman prop.

Mr Speaker e mon remersye bann kontrakter dan nou distrik ki pran zot travay vreman serye. Wi, i annan enn de pti defayans. Me selman lamazorite bann kontrakter dan nou distrik ki netway lans, ki netway semen, zot vreman serye avek zot louvraz e mon felisit zot Mr Speaker.

Mon felisit nou brigad, mon felisit nou zabitan, me pou

bann ki pa pe fer li, mon krwar i sa letan la pou nou reflexir en pe e aret zet salte partou. Annou servi bann bin la nou pe met plis *bin site* partou. Kontrer mon fer en lapel avek tou zabitan Grand Anse Praslin, si i annan bann lezot landrwa ki zot santi nou merit met en *bin site*, les *DA* ouswa mon menm konnen nou a gete.

Me problemm Mr Speaker, ki nou'n fer fas avek dan distrik, ler pou met *bin site* pa tou dimoun ki kontan pou met en *bin site* lo zot later oubyen obor zot lakour. Mon'n ganny problemm detrwa fwa kot dimoun i *call* mon i dir Onorab fodre ou vin tir sa *bin site* lo mon later, ouswa obor mwan akoz i *disturb* mwan - i pa kontan en *bin site*. Napa en dimoun ki kontan en *bin site* obor son lakour.

Me selman mon apresye, mon remersye bann dimoun ki'n donn nou permisyon pou ofer *bin site* dan enn de landrwa la, parey mon'n dir i annan detrwa ki an konstrikasyon an se moman la.

Mr Speaker, parey mon'n dir i annan en gran lenportans pou nou gard nou pei prop, pou nou tou konman bann sitwayen Seselwa, pou nou zwen en rol pou gard nou pei prop, pou gard nou lanvironnman prop; pa

selman pou nou byennet, me osi pou nou lekonomi akoz parey mon'n dir se nou lanvironnman ki atrakte viziter e osi pou donn legzanp nou zanfan pou demen.

Avek sa de mo Mr Speaker mon dir ou mersi.

### **MR DEPUTY SPEAKER**

Mersi Onorab Woodcock. Prosenman lo lalis se Onorab Georges.

### **HON BERNARD GEORGES**

Mersi Mr Speaker. Bonn apre midi Mr Speaker. E tou bann Manm Onorab e tou dimoun ki pe swiv nou.

Mr Speaker, depi bomaten, mon pe ekout bann lentervansyon lo Mosyon Onorab Desheila Bastienne e parey nou tou nou'n remarke, sa mo ki'n ganny eksprimen pli souvan se sa mo "responsabilite."

E mon kontan ki sa mo in ganny servi dan bann repons e dan diskour *mover* Mosyon li menm ek bann lezot ki'n koz lo sa Mosyon. Akoz se fondamantalman responsabilite ki a la baz, non selman sa Mosyon ki devan nou ozordi, me filozofi sa 2 parti politik ki reprezante isi dan sa Lasanble Nasyonal.

E nou'n vwar sa tre byen dan lafason ki bann diskour in partaz zot lo sa mo responsabilite. Vwar Mr Speaker i annan de responsabilite e entervenans ki'n koz avan mwan Onorab Woodcock in dir sa tre byen. I annan responsabilite Gouvernman lo en kote pou fer son bout.

Me i annan osi responsabilite endividyel, responsabilite sak sitwayen pou fer son bout. E divizyon, divizyon filozofik ant parti minoriter ek parti ki o pouvwar, set en divizyon lo responsabilite. E nou'n vwar sa ozordi dan en fason ekstrememan kler.

Anmezir ki lo nou kote nou'n souliny responsabilite endividyel ki a la baz filozofi *LDS* kot enn nou bann gran prensip, se ankouraz sak endividi isi Sesel pou pran son responsabilite.

E nou'n vwar sa atraver tou program, program sorti lo *welfare* al travay; nou'n vwar sa lo laz pansyon, nou'n vwar sa lo trezyenm mwan kot nou met responsabilite lo sa en endividi pou li ganny sa ki i bezwen. E non pa esper Leta anmennen donn li.

Lo lot kote nou'n tande dan sa detrwa dernyen lannen

ki zot pou zot responsabilite se en responsabilite Gouvernman. Zot pa koz lo responsabilite endividyel zot. Akoz sa i pa dan zot filozofi. Dan zot filozofi Parti US se Gouvernman donn keksoz, zis donn dimoun e pa rod an retournen sans responsabilite dan endividyel. Se pou sa rezon ki nou pei in ariv dan letan ki in arive.

Pou zot fer desann laz pansyon, malgre ki Fon Pansyon pou faid pa fer nanryen, fer desann laz pansyon.

Pou zot trezyenm mwan, trezyenm mwan donn tou dimoun trezyenm mwan. Pa enport si ou travay si ou pa travay donn zot trezyenm mwan. Donn tou dimoun *long service*.

E ozordi Mr Speaker nou'n vwar sa dan sa diskour ki Onorab Vidot in lir bomaten, dan sa Lasanble nou vwar sa tre byen. Akoz li in al lo en lartik lo Konstitisyon e sa lartik 38.

E in lir lartik 38 ki dir ki Gouvernman i annan en responsabilite annan en devwar pou protez lanvironnman. Sa ki i pa dir nou se ankontre parti, i annan lartik 40 nou Konstitisyon ki li i met en responsabilite lo sak sitwayen Sesel. Lartik 40 i dir ki sak

sitwayen Sesel i annan 40 (a)" en devwar pou protez, prezerv e amelyor lanvironnman."

Se la kot nou vwar divizyon Mr Speaker. Taler en dimoun in kriye lo zot kote ki sa i annan pou fer ek sa Mosyon? La la ki i annan pou fer avek sa Mosyon.

Sa ki nou'n vwar la ozordi sete egzakteman, sa diferans ant zot avek nou. Kot nou, nou vwar ki i annan en lobligasyon Gouvernman me i osi i annan en lobligasyon endividyel zot, zot vwar zis en lobligasyon Gouvernman.

Tou keksoz se Gouvernman ki devret pe fer sa dimoun li i kapab fer sa ki i anvi se Gouvernman ki bezwen peye, se Gouvernman ki responsab, se Gouvernman ki devret netwaye, se Gouvernman ki bezwen fe tou keksoz. La la diferans Mr Speaker ki ozordi nou'n vwar atraver Mosyon ki Onorab Bastienne in anmennen, kot i pe enpoz kot i pe demann avek sak sitwayen silvouple pran ou responsabilite e diskour ki Onorab Vidot in lir ki dir Gouvernman ki annan tou responsabilite ki devret fer tou keksoz.

E nou vwar sa tre kler e tan ki nou annan sa kalite mantalite Mr Speaker nou pei pou reste en pei kot pou annan

problenm. Akoz si lo en keksoz osi fondamantal, osi non politik ki amelyor nou lanvironnman *improve* li, fer ki nou pa zet salte an bonnavini, e nou pini bann dimoun ki fer li. Nou pa kapab tonm dakor e nou bezwen annan en divizyon politik. Nou pei i dan problenm.

Erezman Mr Speaker erezman ki lamazorite Seselwa i konpran sa ki nou, nou pe demann zot fer lo nou kote latab. E i pou en semen ase long i pa pou en keksoz ki nou pou arive avek en baton mazik fer li demen bomaten. Me si nou enkilke sa responsabilite endividyel dan lespri sak sitwayen, parey nou lo sa kote latab nou fer sak fwa ki nou annan en loportinite, nou pou arive en zour la kot nou anvi ale.

Alor Mr Speaker, se sa tenm ki mon ti anvi pas enn de moman pou koz lo la apre midi. Lo en kote Gouvernman i annan en gran responsabilite akoz se li ki zer pei.

Gouvernman, ladministrasyon, i bezwen asire ki tou bann keksoz i an plas pou ki parey lartik 38 i demann li fer, i gard en lanvironnman sen. E sa nou vwar Mr Speaker ki in ganny mansyonnen ozordi sirtou bann keksoz ki Gouvernman i fer dan sa loptik.

Me lo lot kote, parey mon'n dir nou bezwen sak sitwayen a tou nivo depi kot son lakour parey Onorab Loizeau avek Onorab Sandy Arissol in fer nou konpran. Me osi dan son kominote, asire ki nou pran nou responsabilite e nou fer ki nou pei i prop e zoli.

E Mr Speaker, i tris pou dir nou annan Bondye in donn nou sa ki nou tou nou dakor lo sak kote latab ki nou été, pli zoli pei dan lemonn, sa i pa en size diskisyon, i en fe.

Me i nou responsabilite Bondye in donn nou en zoli keksoz i nou responsabilite pou nou protez e prezerv li parey lartik 40 ki *by the way* i dan nou *lobby* Lasanble, tou le bomaten le nou rantre nou vwar sa lartik 40 e nou devret pe siport li e fer sa ki i demann nou fer.

Si nou fer sa Mr Speaker - si nou pran nou konn nou responsabilite endividyel e nou azout sa avek bann responsabilite ki Gouvernman in pran, nou pou gard nou pei konman pli zoli pei dan lemonn. Mwan mon rapel bann letan kot ler nou ki ti al *Maurice* pou en pti vakans, nou ti al laba e nou ti retournen toultan nou ti dir zot be Sesel i prop konpare avek *Maurice*.

Mon pa anvi dir ki *Maurice* i sal akoz se nou bann kouzen, nou bann frer ek ser. Me nou ti kapab *proud* ki nou pei ti bokou pli prop ki nou pei vwazen.

E la mon fek sorti *Londres*, *L'Angleterre* semenn pase e mon'n ase tris pou vwar ki *Londres* i sal. I pa prop parey nou ti ava kontan; i annan en kantite sak plastik partou obor semen. I pa en - *it's not a good look*, parey *Anglais* ti pou dir. E nou kapab *pride* nou lekor ki nou, nou ankor en pei prop.

Me si nou pa veye Mr Speaker, si nou pa veye tel parey bokou nou nou'n dir ozordi, e nou pou kontinyen avek sa bann move labitid, al zet materyo konstriksiyon lo Ile Aurore, parey si ou antre Ile Aurore dan nenport ki pti semen ki ou vwar ou pou war, i pou war i annan *dumping site* pou bann materyo konstriksiyon, nou tou nou konn sa.

Si nou pa gard nou bann lans prop lo en nivo endividi, nou pou en zour ariv en sityasyon kot dimoun pou vini e pou konpar nou avek bann lezot pei e pou dir zot *Maurice* i prop get mannyer Sesel i sal.

Alor Mr Speaker, sa lapel ki Onorab Bastienne pe anmennen ozordi, atraver son Mosyon ki mwan mon pou

siporte e a gran ker, se pou nou pran nou responsabilite endividyel e asire ki nou fer sa ki nou bezwen fer.

Me Mr Speaker, nou pa kapab zis met tou responsabilite lo nou. Nou bezwen osi regard responsabilite ki Gouvernman i annan akoz anba lartik 38 Gouvernman i annan en responsabilite.

E la mon pa pe koz lo bann salte ki ariv lo lans ki sorti *L'Indonesie* eksetera, sa sete en gro problem ki nou bann Zil Elwanye e menm nou bann Zil Pros i bezwen fer fas avek. Sa ki nou, nou devret pe regarde se ki mannyer nou kapab viv dan venteenyenm sek. Viv dan lannen 2024.

E la Mr Speaker, mon ti ava kontan fer enn de propozisyon. Mwan i a triste mwan bokou, ler mon al dan mon prop distrik ; mon pa pou koz lo distrik mon kanmarad - sa pa pou onnet. Mon ava koz lo mon prop distrik. I a triste mwan en kantite ler mon mont semen Les Mamelles e mon vwar ki mannyer i annan serten landrwa ki sal e ki pa pe ganny garde dan en fason apropiye.

Mon pa kapab aksepte ki lakour an deor en blok flat bann dimoun ki reste dan sa flat pa kapab gard li prop. In toultan

en problem pou mwan. Oubyen menm peron ki mont dan en flat, dimoun pa kapab pas en balye - olye zis pas en balye kit tou salte dan en kwen pou en lot dimoun vin anmase.

Mon pa kapab konpran ki mannyer bann zabitan zot menm, ki annan en serten *pride* dan zot lanvironnman, pa kapab en Sanmdi bomaten, oubyen enn fwa tou le mwan ou *whatever* group ansanm sorti e al netway zot lanvironnman.

Nou pa vwar sa ase. Mon pa konnen si i arive dan bann lezot distrik me mwan mon pe profite ozordi pou fer en lot lapel avek bann zabitan mon distrik, pou nou kapab arive fer sa. Akoz se nou ki reste dan sa distrik, alor si nou, nou kapab amelyor e anbelir nou distrik se nou menm nou ki pou benefisy e a lafen lazournen.

Me, me i annan osi lezot keksoz ki mon ti ava sizere ki Gouvernman i kapab fer. Mwan mon pa krwar Mr Speaker e sa i mon pwennvi personnel e mon konnen ki i annan serten lezot dimoun dan Gouvernman ki partaz mon lopinyon - mon pa krwar ki dan 2024 nou devret en pei ki annan *bin site*.

Akoz napa en *bin site* ki prop par son fason, par son litilite par son rezondet, i pa kapab prop. E ler en *bin site*

pa'n ganny netwaye, ler konminyon salte pa'n pase, nou tou nou konnen ki mannyer *bin site* i ete. Mon pa kapab aksepte ki dan lannen 2024, nou *still* bezwen annan tou sa bann *bin site* partou.

E problem se ki parey nou tou konnen, *bin site* pa la zis pou aksepte bann *household*, bann dese *household* ki sorti dan bann lakaz. Me matla - la lotrozour en *double bed* en *double bed* obor en *bin site* ti annan.

En karo palet - en ta palet ki'n ganny depoze obor *bin site*. E nou tou nou konnen *washing machine*, *cooker* bann vye *fridge*, tousala i ariv obor *bin site*, *it's not good look* Mr Speaker e nou en destinasyon touristik, annou pa per pou dir ki dan lannen 2024 *we can do better*.

E mwan mon ava propoze la ozordi, non selman konman *MNA Les Mamelles*, me osi konman dirizan *Zafer Gouvernman*, ki Gouvernman i devret regard dan meyer fason pou kolekte *rubbish*. Pou kolekte bann keksoz ki sorti dan bann *household*.

Dan sak distrik, mon pe propoze ki i annan en sistenm kot bin in ganny mete dan bann swa dan bann lakaz ki i en lakaz tousel, oubyen obor en

flat pou sa flat e ki i ganny *cleared* dan en fason sistematik.

*Maurice* i fer li, *L'Angleterre* i fer li, *L'Amerique* i fer li, tou bann lezot pei *Singapore* i fer li mon pa konpran aköz Sesel pa kapab annan menm sistenm. Kot nou pa pou annan sa bann bin.

Dezyenmman, mon pe propoze ki dan sak sou distrik i annan en landrwa premyerman kot *green waste* i kapab ganny mete, kot en dimoun ler in koup son pye dibwa, oubyen ler in fer en pe *trimming* dan son zarden i al met tousala dan en landrwa kot i annan *green waste* ki pou kapab ganny pran par Minister Lanvironnman oubyen *LWMA* pou al fer konpos avek.

E trwazyenmman i annan dan sak sou distrik en landrwa kot bann gro keksoz I kapab ganny mete *cooker*, *fridge*, eksetera bann dimoun ki pa kapab *afford* pou zot al lo pran en konminyon anmenn lo *dump site*.

Mon pa vwar ki mannyer sa pa kapab ganny fer e mon pe propoze ki Gouvernman, Minister Lanvironnman, *LWMA* i regard dan sa direksyon, pou fer ki nou pei pou reste pli prop pou nou e ki nou dimoun i ava annan sa responsabilite konnen, la mon ava met

*household waste*, la mon ava met *green waste* la mon ava met *hard waste*.

Sa mon krwar i ava al dan en bon direksyon, i ava kapab anmenn en serten soulazman pou sa problem ki Onorab Bastienne in souleve la ozordi.

An menm tan mon siport bann lapel ki'n ganny fer, pou ki annan en ledikasyon kontini lo lanvironnman lo gard lanvironnman prop. Ledikasyon kontini Mr Speaker i marse. Nou'n vwar ki in marse pou redwir *HIV AIDS* dan en serten fason, oubyen i pa'n in anpes *HIV AIDS* ogmante. Nou'n vwar ki lo size lanvironnman avek torti ek marswen eksetera, sa in marse bann klib lanvironnman dan lekol i tre performan.

Alor i pou kapab osi marse si sa ledikasyon i kontinyen e i reste konman en topik ledikasyon pou bann zanfan lekol. Aköz sa ki ou montre bann zenn zot ou ava fer demen ler zot vin adilt.

E finalman Mr Speaker, mon krwar ki i annan en pe plis keksoz ki nou kapab fer, lo nivo pini bann dimoun ki malgre tou sa bann keksoz zot pe kontinyen polye lanvironnman, aköz si ou pa pran ou responsabilite en lot dimoun i bezwen pran ou responsabilite

pou ou e i bezwen fer ou aksepte ou responsabilite.

Ti annan en lepok *Environment Police* mon pa vwar *Environment Police* ozordi a mwens ki mon tronpe. Me la en lide si i annan en *squad* ki pe regard zis bann lofans lanvironnman e ki zot konnen ki i annan bann *hotspot* parey Ile Aurore kot dimoun pou al zet salte, oubyen Perseverance parey Onorab Bastienne in dir nou, zot ava pran en ka avek. Ler ou ava vwar en *double* matla obor en *bin site*. Ou ava konnen i pa difisil pou konnen kote sa matla i sorti.

E osi mon aksepte - mon aksepte sa lespri ki enn bann pinisyon ki ou kapab entrodwir parey Onorab Woodcock in dir nou fer *Singapore*, se en zanr *Community Service Order*, kot sa dimoun ki li i kas Lalwa Lanvironnman, li menm li i pou bezwen donn en serten servis avek lanvironnman. Li menm li i pou bezwen al netway en landrwa pou li demen avan ki i zet son salte i ava mazin de fwa.

Alor Mr Speaker, mon pa anvri pran tro letan, letan pe fini nou apre midi. Les mon aret la an di-z-an avek Onorab Bastienne mersi Onorab ki ou'n donn nou sa loportinite pou reflexir lo en problem ki aktyel. E ki en problem ki reel

e ki en problem ki fasil pou rezourd si nou tou nou met nou lespri ansanm e Gouvernman i fer son bout me endividi osi i pran son responsabilite endividuel. Mersi Mr Speaker.

### **MR DEPUTY SPEAKER**

Mersi Onorab Georges. Depi bomaten i annan 11 Manm ki'n entervenir lo sa Mosyon. I annan ankor 5 Manm ki'n eksprim lentere pou koze e dezormen mon pa pe pran personn ankor. Akoz nou bezwen fini Lasanble a ler.

Donk letan nou retournen 4 er pou annan Onorab Spiro, Onorab Samynadin, Onorab Lemiel, Onorab Larue, Onorab William. Me mon pou donn zot sakenn 10 minit, so ki *right of reply* i ava avan 5 er. Alor koumsa balans zot letan byen pa les mon dir zot ou 10 minit in arive. So kalkil lo la.

E lefe ki mon annan mikro, rezyon santral kot mon sorti i annan bann *meeting* konsiltasyon Komisyon Eleksyon ki pe fer 4 er edmi dan *School Meal Centre* petet i ava *MNA* ki oule ale, ouswa bann dimoun ki pe ekoute ki oule ale. Sa i pou 4 er edmi kot *School Meal Centre*. Mersi.

**(BREAK)**



**MR DEPUTY SPEAKER**

*Welcome back* tou dimoun. E bonn apre midi pou bann ki'n zwenn nou. Nou pe kontiny deba lo Mosyon table par Manm Elekte pou Ile Perseverance Onorab Desheila Bastienne ki lir koumsa;

Etandonnen lenportans en lanvironnman zoli prop e sen, dan lekonomi e byennet nou pei e nou nasyon. Lasanble i fer lapel avek tou Seselwa pou vin pli responsab e aret zet salte dan landrwa ki pa apropiye e demann Gouvernman pou ranforsi Lalwa kont zet salte an bonnavini dan lanvironnman.

Parey mon ti dir bann Manm ki reste i annan en *time limit* lo nou entervansyon 10 minit. E Onorab Rachel Spiro i *next* lo lalis.

**HON RACHEL SPIRO**

Mersi Mr Speaker. Bonn apre midi Mr Speaker. Bonn apre midi tou koleg Onorab. Bonn apre midi tou dimoun ki a lekout. Mr Speaker, mon pa pou ezite pou mwan aport mon kontribisyon lo en Mosyon ki'n anmennen par Onorab Desheila Bastienne lo sa size salte. Sesel koman en pti pei, i renonmen pou sa labote e osi son lanvironnman. Kot in menm ganny dekrir koman sanpyon dan lanvironnman.

E pou nou kapab kontinyen reste sanpyon dan sa lanvironnman ki nou pe koze, nou bezwen kontinyen mentenir en serten standar. Nou sitwayen i ganny konsidere koman en pep ki mentenir lapropte. Tou bann entervenans avan mwan in dir sa. Nou'n toultan gard nou lakour, nou zalantour e nou kominote prop e menm anbelir li.

Nou tou nou kapab rapel sa bann fame konpetisyon Lanbelisman Lakour. E Seselwa in pran par ladan, zot ti pran plezir pou zot met zot bann *exhibit* devan e osi gannye pti rekonpans an retour. Tou sa, ki ti reste dan vwazinaz ti zwe son rol pou ede mentenir en kominote prop. Sa ki ti reste o bor larivyer, ti fer sir larivyer i ganny byen antretenir, netwaye e fer sir ki tou salte i ganny tire.

Sa ti ganny fer aköz nou ti konsyan ki nou larivyer ti nou sours delo. E osi byen ki bann lezot aktivite tel parey lave e lezot keksoz ki ti annan pou fer avek netwayaz. Alor, nou ti gard sa larivyer prop. E detanzantan sirtou san bann Sanmdi, bann zenn bann pti marmay ti kontan netway larivyer.

Dimoun pa ti ezite pou zwenn ansanm pou netway volonterman zot kominote e zot ti fer sa avek plezir. Mr Speaker,

pou asire ki pep ti respekte lord e mentenir nou lanvironnman prop, ti annan sa ki nou ti apel sanniter. Ler sanniter ti fer vizit kot bann lakour, zot ti komann en serten respe, e menm serten dimoun ti annan lafreyer pou sanniter.

Zot ti edik kominote lo lafason apropiye pou depoz zot salte e osi ranforsi Lalwa. E letan zot ti'n donn ou dele letan pou ou netway ou lakour, met prop e apre zot repase dimoun ti fer sir zot ti respekte. Alors, sa zafer *police* nou lanvironnman in toultan egziste, menm si a sa moman zot ti apel sanniter.

Zot ti asire ki nou lasante piblik a tou pri ti ganny ti ganny mentenir e evite ki bann maladi ti kontinyelman ganny propaze. A ki moman ki sa kiltir e fason fer in deteryore, i en kestasyon ki nou menm koman en pep nou bezwen esey rode. Onorab Loizeau dan son lentervansyon li n demande kot in al mal. Mr Speaker, kot in al mal? Bon kestasyon.

Repons i reste ek zot menm. Eski nou'n manke edik nou zenn zenerasyon lo sa bon fason fer ki ozordi salte in vin topik konversasyon dan sa Lasanble? Mon dir sa aköz sa ki nou pe war, se ki dimoun pe zet salte an bonnavini. Nou zenn zenerasyon, nepli pran kont

nou lanvironnman e nepli konsyan ki ler nou zet salte partou an retour i afekte nou lanvironnman e nou byennet koman en sosyete an zeneral.

Nou viv dan en pti pei ki plizanpli nou pe konsonm plis. E tou sa ki nou konsonmen nou pe enporte. E byensir Mr Speaker, tou sa bann keksoz ki nou enporte i vin dan lanbalaz ki swa *can*, ki swa *pet*, ki swa boutey an ver, ki swa plastik. E tousala, i rann lapel dan nou lanvironnman. Pei in depans bokou anba sa Gouvernman Parti Lepep, Parti US. Nou'n depans bokou dan met bin partou kote dan bann distrik.

Nou'n osi investir dan koleksyon salte, pey kontrakter pou netwayaz e osi nou bann lans e semen, netwayaz bin e larivyer tousala bann kontrakter pe fer ki nou war dimoun pe kontinyelman pe zet salte partou. Pou ki rezon? I annan sirman en ledikasyon ki bezwen ganny fer avek nou bann dimoun, parske tou sa depans ki pe ganny fer dan sa bann keksoz parey pey kontrakter i enportan.

Akoz pli ale Seselwa pe konsonm plis, e byensir nou pou annan plis salte. Annou get en kou sa bann kontrakter ki fer netwayaz. Ti annan en bon rezon aköz Gouvernman avan,

ti kre Lazans Salte, pou zer salte akoz volim salte ti pe definitivman ogmante. Sa lazans ti administre kontra netwayaz.

Me la ozordi, bann pti kontrakter pe ganny trangle. Longer semen i reste parey e larzan ki zot gannye in dimini. Zot nepli kapab kit menm kantite dimoun dan zot pti biznes. Mon pa konnen Mr Speaker, i sa akoz sa bann dimoun in vin *businessmen* ozordi nou anvi fer zot retourn parey zot ti ete avan ki i domaz.

Kot distrik Mr Speaker, ti annan dimoun ki ti ede dan netwayaz e gard lanvironnman distrik prop. Ozordi nou pa war sa menm kantite dimoun. Tousala ti kre lanplwa pou sa bann dimoun, e serten ki ti dan *methadone* Mr Speaker, ti ed zot kapab sorti dan sa problem *methadone*, akoz zot ti annan en lokipasyon. Ozordi i annan plis birokrasi pou ganny *tender*.

Prezan sa bann dimoun souvan zot dan largiman avek sa lazans. E finalman zot dekouraze e zot kite. Depans Mr Speaker, i osi al dan *spot* fer piblisite pou edik e donn konsey piblik lo bon fason pou depoz salte. Mon note Mr Speaker, ki dan *weekend* i annan en prezantater radyo ki anim Radyo *FM* i pa manke pou edik

dimoun ki al piknik lo ki fason zot pou depoz zot salte.

I menm fer zot konsyan poudir anmenn en *bin liner*, e letan ou ale met ou salte dan sa bann *bin liner* e zet dan bin pli pros ek ou. Saverdir Mr Speaker, ledikasyon pe atraver bann piblisite pe ganny fer. Nou annan 2 morso Lezislasyon ki ede kontrol lafason ki dimoun i depoz salte. Sa bann Lezislasyon i eksplik aksyon e konsekans bann aksyon ki nou konsider koman lofans e penalti aplikab dan sa bann morso Lalwa.

Enn i *Environment Protection Act* e lot i *Public Health Act*. Anba sak sa bann Lalwa Mr Speaker, par egzanp *Public Health Act* i fer provizyon pou bann *waste* endistriyel, ki mannyer zot ganny depoze. E bann *fine* aplikab anba la. E osi ki mannyer nou evite depoz bann salte ki riske en danze ankouraz propagasyon maladi.

*Environment Protection Act* li, i koz lo bann salte toulezour bann *municipal waste* parey nou dir bann *litters* ki nou fer, ki mannyer nou depoz zot, e osi bann lezot kalite salte lo bann penalti e lofans ki ale anba la.

Anba sak sa bann Lalwa, i osi annan bann *Enforcement Officer*, sa ki sipoze fer sir dimoun pe respekte sa bann

Lalwa. Si en lofans i ganny komet, zot bezwen aplik Lalwa pou dil avek sa lofans. Me malerezman nou annan zoli Lalwa, me *enforcement* tre minim. Akoz sa ki pe *enforce* Lalwa, bokou i vir ledò e lofans i kontinyen ganny komet. Bokou nou, nou war sa kot bann materyo konstriksyon pe tonbe lo semen, e bann dimoun pe vir akote fer konmsi zot pa war.

Akoz sa ki pe *enforcement*, *enforce* Lalwa bokou i vir ledò letan lofans pe ganny komet? I annan ki ganny menm peye pou zwe pa war kler, sa ki nou dir pran gous e zot pa enterese dan mentenir Lalwa. Nou pei in antre dan en sityasyon presipis e sagrinan. Kot nou pe depan lo sa ki annan Lalwa pou ede pran lanvironnman e lasante piblik an serye e ede pou konbat kont sa bann dimoun ki pe fer bann aksyon ilegal.

Me Mr Speaker, kantmenm mon bann koleg lo lot kote latab pe riye zot konnen ki sa zafer gous i egziste. Si sa ki ranforsi Lalwa i vin pli serye, mon asire piblik a ganny konfyans e bann sitwayen a ede dan sa lalit pou kontrol salte dan nou pei. Bann paran i bezwen ansanm avek bann edikater, zot osi zot bezwen edik nou bann zenn zenerasyon ki

pe leve lo lafason pou depoz salte.

Koumsa zot a grandi avek sa bann bon fason fer ki nou, nou ti grandi avek. Mosyon pe dir ki,

“Etandonnen lenportans en lanvironnman zoli, prop e sen dan lekonomi e byennet nou pei e nou nasyon, Lasanble i fer lapel ek tou Seselwa pou vin pli responsab e aret zet salte dan landrwa ki pa apropiye. E pe demann Gouvernman pou ranforsi Lalwa kont zet salte an bonnavini dan lanvironnman.”

Mr Speaker, si nou vremen serye dan pa zet salte partou. Nou bezwen vin en pe parey *Singapore*. Pli boner mon'n tann dan lentervansyon Onorab Woodcock koz lo *Singapore*, e komans met Lalwa an aplikasyon. Ler ou met Lalwa an aplikasyon e ou set legzanp, mon garanti ki lezot pa pou swiv. Nou bezwen osi konsey nou popilasyon pou apli sa 3 (R).

Savedir Redwir, Reservi e osi Resikle, akoz ler nou fer sa nou ede minimiz lakantite salte ki retourn dan lanvironnman. E la mon rekonnèt bann travay ki bann endividi e bann group pe fer, sirtou bann group non gouvènmantal ki pe seye dan sa lalit pou reservi bann keksoz

ki kapab ganny reservi. E evite ki zot ariv dan lanvironnman.

Gouvernman i bezwen kontinyen envestir dan bann nouvo fason zesyon salte. Sa i tre enportan, akoz si nou kontinyen zis met bin parey nou pe ganny en konpran dimoun pa pe aksepte ki bin i ganny mete lo zot propriyete, alors, Gouvernman i bezwen rod nouvo fason fer pou kapab ede dan zesyon salte.

Gouvernman ki'n la avan in fer tou sa ki in kapab, prezan nou bezwen rod nouvo mwayen, nouvo lenvestisman e osi bann nouvo fason fer. I annan Mr Speaker, e mon garanti ki si Gouvernman i serye i kapab war fason pou rode ki mannyer nou elimin salte pli byen. Mr Speaker, pli boner nou'n tann refer lo Lartik 40 e Lartik 38 ki pe koz lo responsabilite e osi lo drwa bann diferan groupman.

Mr Speaker, mon repran egalman mon konpran ki nou annan drwa anba lartik 38(1), i pe fer nou konpran, i pe edik nou ki i osi nou responsabilite koman sitwayen Sesel pou annan respe pou bann mezir ki ganny met dan Lalwa e met an pratik sa ki Leta i rekonnèt koman nou drwa dan nou Konstitisyon.

Savedir Mr Speaker, responsabilite i mars 2 kote.

Nou koman sitwayen nou bezwen fer sir ki nou annan en rol ki nou zwe, e Leta osi i annan son rol ki ou zwe. I annan 2 parti prenon dan fer sir ki zesyon salte e Lalwa i ganny aplike. Mr Speaker, avek sa 2 mo mon remerci ou.

### **MR DEPUTY SPEAKER**

Mersi Onorab Spiro. Onorab Kelly Samynadin, ou *next*.

### **HON KELLY SAMYNADIN**

Mersi Mr Speaker. Bonn apre midi Mr Speaker, tou mon bann koleg Onorab, zabitan Au Cap e tou dimoun a lekout. Mr Speaker, en sistenm zesyon salte ki efikas i vremen enportan, pou asir soustenabilite nou lanvironnman, ensi ki bann byennet nou kominote.

Pandan ki bann Polisi Gouvernman ek bann pratik endistriyel i zwe bann rol signifikan, partisipasyon bann sitwayen i egalman enportan. Mon santi li vremen esansyel pou mwan anmenn devan rol ki bann sitwayen i devret pe zwe an sa ki konsern zesyon salte, ensi ki bann rekomandasyon pou kapab kre en kominote pli responsab vizavi byennet nou lanvironnman.

Premyerman Mr Speaker, parey bann Manm avan mwan

in fer resorti, sansibilizasyon e ledikasyon i 2 laspe ki mars ansanm. Me ki osi vreman entegral dan sa demars pou etabli en lanvironnman ki zoli, prop e sen zis parey *wording* Mosyon in fer resorti. I enportan ki nou edik nou bann sitwayen lo ki bann diferan kalite salte ki nou prodwir koman en pei. Par egzanp ki swa i resiklaz, organik oubyen danzere.

E osi byen lo ki bann meyer fason pou dispoz zot. Ledikasyon i osi bezwen ganny donnen an sa ki konsern konsekans lanvironnmantal letan ki dispozisyon salte pa pe byen ganny zere. E sa i enkli polisyon, bann danze ki sa i kapab anmennen lo lasante piblik ensidswit.

Mr Speaker, sa i vreman enportan, aköz dan plizyer distrik sirtou dan distrik Au Cap nou rankontre lo en baz kotidyen bann ka kot dimoun i zet salte an mal apropo lo bann lans, kot bann *bin sites* e menm dan bann landrwa ilegal ki konpri osi bann propriyete Gouvernman ek prive.

Nou osi rankontre bann ka kot dimoun i vol bann bin lo bann *bin sites* ki montre ki wi i en fe ki nou bezwen aksepte ki sityasyon zesyon salte dan nou pei i enn ki ase enkyetan, e ki

nou devret edik e sansibiliz nou pep plis pou adopte bann pli bon pratik.

Dezyenmman Mr Speaker, i enportan ki nou popilasyon i konsyan, ki koman en pei nou bezwen redwir lakantite salte ki nou prodwir. Nou bezwen ankouraz nou sitwayen pou aste komodite ki esansyel, ensi ki prodwir ki napa tro bokou lanbalaz avek bi pou redwir lakantite salte ki ganny prodwir par *household*.

Enn bann form rediksyon salte se atraver promosyon resiklaz oubyen re itilizasyon. Mon konnen ki i annan plizyer lakour ki pe fer li. Me i annan nesesite pou plis dimoun fer li. Sirtou dan bann lakour, kot par egzanp bann salte ki biodegradab i kapab ganny servi pou fer *compose* oubyen bann lanbalaz, boutey ek lezot *containers* i kapab ganny servi pou fer lezot keksoz itil, dan plas ganny zete dan lanvironnman.

Bann lekol i devret ankouraz bann zanfan ek paran pou anmas bann keksoz ki kapab ganny resikle pou fer li sirtou pou bann laklas *arts & crafts, design & technology, agriculture ek fisheries*, kot bann zanfan i kapab vin avek bokou nide inovatif *through creative thinking*. Letan mon pe

koz lo lekol Mr Speaker, mon ti a rekomande ki pou nou adopte en kiltir pli responsab an sa ki konsern zesyon salte, Minister Ledikasyon i devret mazin ladopsyon sistenm en pe parey dan bann lekol an Zapon.

Akoz ki nou bezwen anploy kontrakter pou netway nou bann lekol? Akoz pa angaz bann etidyan ek bann ansennyan, pou netway zot lekol zot menm? An Zapon i annan en letan lo *time table* ki ganny *allocate* pou netwayaz lekol. Bann etidyan pa netway zis zot laklas, me osi bann *corridors*, bann twalet ek lezot fasilite ki zot menm zot servi.

Si nou oule en fitir zenerasyon ki konsyan lo benefis lapropte, nou bezwen komans avek sa ki pli zenn. Mr Speaker, lafason ki salte i ganny triye, i egalman enportan pou konsidere. E sa i en fason fer ki merit komans depi dan lakour. Mon santi ki ledikasyon i merit ganny fer lo sa nivo osi avek bi pou sitwayen konnen lekol kalite salte ki kapab ganny reservi bann ki organik eksetera. Avek bi pou kapab elve en pli bon kiltir soustenabilite depi kot sours.

Lo sa laliny en linisyativ ki Gouvernman i kapab entrodwir, se par letablisman bann sant resiklaz dan sant kominote

parey Onorab Georges in fer resorti pli boner, ki ava ganny byen mentenir aksesib avek tou dimoun, avek bi pou ed zabitan zer e dispoz pli byen zot salte.

Mr Speaker, en lot rekomandasyon se ki konpany *Clean Up The World* ki ganny fer tou-le-z-an i ganny fer dan en lot lanpler avek sa lespri soustenabilite antet.

Pou kwa pa lans dan bann *Recycling Awareness Programs* dan bann lekol, en si ki dan bann distrik pou edik bann etidyan ek zabitan, lo ki bann meyer fason pou manage zot bann salte espesyalman bann ki organik e resiklab. En legzanp tipik se ki mannyer pou *compose* zot salte. Pa tou dimoun ki annan sa fason fer lo sa size.

Petet atraver bann provizyon bann *composting kits* ek bann *training session* pou fasilite sa pratik. Sa i osi vin atraver lespri *advocacy* kot bann *environmentalist*, bann sosyete sivil ki annan proteksyon lanvironnman koman zot manda pou zot osi ede dan sa demars ledikasyon, sirtou avek bann ki ankor zenn, pou enkilke bann bon fason fer kot proteksyon lanvironnman i konsernen.

Mr Speaker, mon santi ki lespri volontarya parey Onorab

Woodcock in mansyonnen pli boner, i tre esansyel dan sa demars pou etabli bann bon fason fer, an sa ki konsern zesyon salte e zesyon lanvironnman. Bann sitwayen i devret vin pli proaktiv e zot devret osi pran lapartenans zot kominote.

Atraver Lotorite Distrik bann levennman netway i devret ganny organize, avek bi pou angaz zabitan, pou gard lanvironnman zot distrik pli prop ki posib. Sa i ava osi vin avek bi pou sansibiliz tou dimoun lo lenportans gard nou bann lespas piblik en si ki nou lakour pli prop.

E dan distrik Au Cap, sa i en linisyativ ki nou'n deza pran a plizyer repriz, an partenarya avek nou tim brigade e osi Lotorite Prizon, kot nou'n netway plizyer sit ki ti en pti pe sal dan distrik.

Mr Speaker, mon konnen ki LWMA in komans fer li kot bann *bin sites*, me mon santi ki plis slogan lo lenportans lapropte i devret ganny fer; sirtou kot bann lans vi ki se enn bann landrwa ki pli ganny frekante par popilasyon, espesyalman dan distrik Au Cap sirtou pandan *weekend* parey Onorab Bastienne e Onorab Arissol in fer resorti dan zot lentervansyon.

Mr Speaker, mon santi ki zabitan i merit travay pli pre avek bann lazans sirtou Lotorite Distrik, pou alert nou lo bann ka, parey *illegal dumping* e move zesyon bann *bin sites*. Sa i ava an retour ede pou deter sa bann move pratik ki vremen annwiyan pou lizye gete. E amelyor bann servis zesyon salte ki ganny ofer. Bann ki pe deza fer li mon felisit zot, e mon demann zot pou kontinyen fer li.

E pou osi ankouraz lezot pou raporte letan sa bann tel lofans in ganny komet. Avan mon terminen Mr Speaker, mon ti a kontan partaz en pti *anecdote* ouswa en pti kontribisyon fer par enn mon zabitan Mr Emile Lespoir, ki dir ki letan i ti travay dan Departman Lanvironnman anba direktris Mrs De St Jorre, i ti entrodwir en sistenm karnen. En pti liv pou tou travayer pou *fine* ouswa sarz bann ki ganny trouve dan nenport ki fason pe zet salte.

Premye dimoun ki enn mon koleg ti *fine* sete *General Manager* pou Lanvironnman li menm, sa lepok ki ti Mr Tyiant ouswa Mr Toryiant enn ant sa 2 non, Atroyiant. E Mr Emile Lespoir li i pe demande ki nou re entrodwir sa sistenm karnen



ankor, akoz i santi ki i ti tre efektiv a sa letan.

An konklizyon Mr Speaker, mon oule remerci Onorab Bastienne pou sa Mosyon ki in anmennen, akoz i ti enn ki ti tre enportan, ki tre enportan. Anvi ki plis sansibilizasyon i merit ganny fer pou popilasyon lo size zesyon salte e proteksyon lanvironnman. Bann sitwayen i enn bann akter kle kot zesyon salte i konsernen, akoz primordyalman salte i sorti dan lakour.

Atraver nou aksyon, nou devret pe kontribye anver en lanvironnman ek kominote ki pli sen. Atraver ledikasyon partisipasyon aktiv ek kolaborasyon dimoun i kapab fer bann lenpak signifikan. I esansyel pou rann nou bann sitwayen pli abil. Avek bann konesans ek zouti neserer ki zot bezwen pou zer zot salte avek plis responsabilite.

E pou adopte en kiltir kominoter ki prioritize soustenabilite ek zeran *environmental*. Nou lanvironnman i nou aki ki nou merit prezerve e sov garde, akoz se sa ki apel viziter pou debark lo nou *airport* e vin profit lo sa ki Sesel i annan pou ofer. Mon pou fini avek en pwen refleksyon tire dan sanson

Mersener tit, “Kot mon’n ne” - “paradi lo later, zis pa fer li vin en lanfer mon zoli Sesel kot mon’n ne”. Avek sa Mr Speaker, mon konfirm mon sipor pou sa Mosyon. Mersi.

### **MR DEPUTY SPEAKER**

Mersi Onorab Samynadin. Onorab Lemiel *you are next*.

### **HON SYLVANNE LEMIEL**

Mersi Mr Speaker. Bonn apre midi tou bann dimoun ki a lekout. Mr Speaker, mon krwar depi bomaten nou pe diskite lo en Mosyon ki’n anmennen par Onorab Bastienne. E in annan diferan lentervansyon, diferan pwennvi an sa ki konsern sa size lanvironnman Sesel, kot pe demann Seselwa pou vin pli responsab e aret zet salte dan lanvironnman. E sirtou bann landrwa ki pa apropiye, zet salte ki pa apropiye.

E i pe demann Gouvernman pou ranforsi en pe sa Lalwa ki kon zet salte an bonnavini dan lanvironnman. Mr Speaker, Sesel li menm parey bokou mon bann koleg Manm Onorab in dir, i ganny vwar koman sanpyon dan lanvironnman. E sa i date bokou lannen pase. Gouvernman avan ki’n la zot in sey tou sa ki zot kapab, zot in enzekte en kantite larzan dan

bann keksoz pou lanvironnman.

E sa i ti met nou koman pli o mon kapab dir lo kote lanvironnman, pou ki dir ki Sesel i en pei ki prop, Sesel i sanpyon dan lanvironnman akoz; Enn, nou prezerv nou bann pye dibwa, nou ti konsider Sesel koman prop. Me mon pe zis regarde tou dernyerman ki'n arive. Si nou pe vwar ki Onorab Bastienne in vin avek en tel Mosyon Mr Speaker, i vedir ki i annan en problem par la ki annan dan pei. Nou problem se salte.

I annan ki dir ou ozordi Sesel i pli sal. Eski i vre sa? So, se nou ki bezwen fer sa analiz, se nou ki bezwen regarde. Mwan mon pou war mon distrik. Mr Speaker, parfwa ou konnen i annan keksoz ki nou pa realize, nou koman bann endividi koman bann dimoun ki pe viv dan en pei, nou lanvironnman i devret reste sa keksoz priyorite pou nou.

Akoz i enportan ki nou respir en ler sen, en ler ki bon e en ler ki prop. E i enportan osi ki kot nou pe viv dan nou lanvironnman, i napa salte, i napa bann vermin e ki nou tou nou pe *enjoy* en lanvironnman ki prop e ki sen. So, letan mon pe regarde mon'n dir mon pou pran legzanp - par egzanp dan

mon distrik, nou osi dan Anse Royale nou sibir pa mal problem an sa ki konsern salte dan lanvironnman.

Sa ki mwan mon pe konstate ki mon pe vwar, ti petet bokou lezot dan zot distrik osi zot pe konstate, i annan bann propriyete prive, ki ganny kit abandonnen en pe partou gran, gran pye dibwa lo la ki sa nou ti koz lo la lot zour. Pye dibwa ki en menas pou lezot dimoun, i reste lo la. Sa bann dimoun pa la, e ki ou war lezot dimoun i fer?

Olye pran zot salte pey en *pickup* pou zot al zet lo *landfill*, sa bann dimoun i vini i *dump* zot salte lo propriyete prive sa bann dimoun ki pa pe pran responsabilite pou zot netway zot prop propriyete *or* zot pa isi. Sa i enn.

Dezyenmman ou pe ganny ou, mon bann koleg in nonmen bann kontrakter. I pa zis bann kontrakter, oubyen i pa zis bann kontrakter i bann lezot dimoun ki parfwa i pa ni menm sorti dan ou distrik ki vini ek zot bann *pickup* lakaz, ki zot in tir *plywood*, in tir vit, in tir *frame* avek.

I kapab li in fek anmase, bomaten ou vini sirtou sa enn ki Sweet Escott an alan kot lekol la ou war sa ta materyo konstriksyon, *frame louvers*,

*louver*s menm. Tou bann debri ki'n tire dan *maintenance* ki zot pou fer ek lakaz, ou vini ou vwar la o bor sa *bin site*. E i bann landrwa, bann *spot* ki ou a krwar zot swazir sa.

Anse Royale i annan la Sweet Escott kot lekol, i annan enn Sweet Escott kot en pe pli anndan. La ziska matla *you name it* tou kalite ou vwar la. Apre i annan *Fairyland*, ler zot monte la tou sa bann keksoz i ganny, mon krwar zot vey aswar ot vini zot vin *dump* tou zot bann restan keksoz ki zot pa pe anvi vin zet lo *landfill*. Zot vini zot profite, zot vin servi sa bann *areas* pou zot met zot salte.

Parfwa ou demande petet akoz dimoun i *behave* dan sa fason oubyen akoz sa pe ganny fer? I annan serten dimoun ki ou koz avek ki ou vwar zot, zot vin pran zot salte. Mwan mon reste Au Cap, Pointe Au Sel, ou vwar i annan en spot dan Pointe Au Sel ki ou war toultan gro, gro salte zot vini zot vin met la. E parfwa ou war *pickup*, bann dimoun pa reste la Pointe Au Sel.

I pa reste la dan Au Cap selman ou war sa *pickup* i la o bor sa *bin site*, i vini i vin zet salte la. So, petet parfwa ou demande, e mwan menm mwan mon'n deza demann serten dimoun ki petet zot profite.

Nou, nou'n dir Gouvernman ozordi i dir ler nou dir bann dimoun i annan *Clean Up the World*, pran zot salte pey en *pickup* i pou naryen kot *landfill*, ale al zete.

Me Mr Speaker, ozordi i annan dimoun osi ki pe dir ou menm si i koumsa. sanmenm sa zot vini, zot profite osi ler i dir ou *Clean Up the World* zot kontinyelman ranpli kot bin. I dir ou akoz zot pa kapab *afford* pou zot pey en *pickup*. Akoz sa osi ou bezwen gete kou transportasyon. Me ler ou regard avan ki mannyer keksoz ti ganny fer, se ki i annan bann *pickup* ki ti ganny met a dispozisyon bann dimoun.

E bann dimoun ti kapab met zot salte obor semen oubyen kot bin. E la bann *pickup* ti pase ti anmas sa bann salte. Parfwa li osi nou'n vwar son serten problem avek sa. Konnen kot salte i reste en kantite letan o bor semen, e i pa donn en zoli limaz. I pa donn en zoli limaz dan nou pei. Nou ganny bokou viziter, e pou nou menm nou Seselwa i pa zoli i pa donn en zoli zimaz.

Me selman letan ou pe regarde ozordi kou lavi osi i fer ki dimoun i santi li i pli fasil, i desann ek sa salte i met kot bin. E sirtou an sa ki konsern masin lave ki'n kase, en *fridge* ki'n

kase i santi li pli fasil pou li met kot bin. E ki laranzman i ganny fer ki i ganny anmase. Nou pa dir i pa pe ganny fer, i pa ganny anmase ozordi. I ganny anmase li, me selman petet son dele letan ki i reste la ki vin en *eyesore*, i vin en pe tro bokou letan ki sa salte i reste la.

So, ki nou pe regarde osi ozordi Mr Speaker, ki mon vwar. Nou pe dir edik Seselwa, annou edik nou bann zenn depi dan lekol. Mwan sa ki mon ti a kontan dir ozordi e ki mon vwar nou annan bann *Eco Warriors Groups* dan bann lekol, mon ti a kontan felisit zot. Akoz sa bann zanfan, mon krwar a en tre zennaz zot komans dan lekol primer. E mon krwar sa ti ganny komanse par Mrs Janette Larue ki mon felisit li, li osi pou sa bann linisyativ ki i ti pran pou anmenn sa bann groupman dan bann diferan lekol.

E ki bann lekol pe vreman preski tou lekol ozordi mon krwar i annan *Eco Warrior Group*. So, mwan mon ti a kontan ankouraz sa bann zenn, sa bann zenn zanfan pou kontinyen ede zot osi dan zot pti laz ki zot annan. Annou zanfan kontinyen sansibiliz kot zot lakour zot osi letan nou war paran pe zet en keksoz, nou'n konnen. Mon koleg Onorab

Spiro in koz lo redwir, reservi, resikle. Ki sa in toultan en lapel, ki ou'n tann bann dimoun dan lanvironnman pe met lanfaz lo la, olye toultan nou pe zete.

Annou vwar kwa ki nou kapab mannyer nou kapab fer avek pou reservi sa keksoz oubyen resikle sa keksoz, redwir met salte dan lanvironnman pou ki nou ava kapab petet war en bes lo kote salte. Akoz i pe dir ou poudir dan en lannen, i annan 90 tonn salte li menm ki ganny anmase par en pti popilasyon Sesel. 90 tonn salte ki pe ganny anmase tou le lannen.

E sa mon vwar ki i bokou, e mon pe mazine la sa ti dan bann lannen avan. Me la 2024 Mr Speaker, mon asire ki sa kantite tonaz petet in ogmante, akoz sa kantite *fridge, deep*, masin lave ki annan dimoun i dir ou i annan zis 6 mwan in aste, apre ou war in kase in ale in met kot bin. Swa dan sa 6 mwan in aranz 3 fwa, apre in bezwen zis pran al met kot bin.

Be sa tonaz salte li menm, in bezwen in mont plis ki sa. E osi letan nou pe regard bann group; Anse Royale nou'n benefisye nou, nou kapab dir. I annan bann diferan groupman, ki'n vin ek nou Anse Royale ki'n sey ede lo kote nou lanvironnman, ed nou netwaye,

netway lans ki dimoun i vini. Anse Royale i en lans ki parey nou'n tann Bel Ombre in nonm kot li, nou'n tann Au Cap in nonmen Praslin.

Mon krwar dan tou distrik i annan lans ki zoli. E dimoun i profite i vin egeye, i vin pas en bon letan lo sa bann lans dan distrik. E Anse Royale i enn parmi sa distrik kot nou ganny en kantite touris e menm lokal ki vini dan *weekend*. Me sa kantite salte, nou osi nou kapab dir ki bann dimoun li menm pa pran zot responsabilite pou zot pran zot salte pou zot retourn avek dan lakour oubyen servi bin a zot dispozisyon.

Akoz ler ou pe regarde mazorite sa bann lans, mazorite mon pe dir dan Anse Royale i annan en *bin site* swa obor. Swa i annan en bin lanmenm ater, ki donn ou pou zet salte ladan. I annan dimoun ki vin vann fri lo lans, zot vin vann zot keksoz lo lans.

Ou war zot kas koko *whatever* tousala zot pran zot kit lanmenm lo lans. E ler ou pe demande ki Lalwa i ganny ranforsi petet sa i lo kote lotorite, wi. Lalwa i la, zot, zot bezwen travay pou fer sir ki sa Lalwa i morde. E ki nou komans penaliz bann dimoun ki zot, zot

vwar *or* ki nou vwar i pe sali nou lanvironnman.

Mr Speaker, kot lanvironnman Komite COGA nou ti ale nou ti al vwar sa *shredder*. Ti dir i annan en *shredder* ki pou ede dan *shred* bann brans dibwa, pou resikle pou fer li vin ou kapab ganny *compost* atraver bann brans dibwa, e atraver bann larout ou ki pou'n *shred* ki bann lezot keksoz ki pou kapab ganny fer avek *whatever*. I ti pou koup metal, me ozordi nou tande *shredder* in kase e i ankor pe esper pyes pou aranze.

E petet la osi, nou ti demann Gouvernman pou investir pou regarde swa si nou bezwen nouvo *or* en pli *heavy duty shredder* pou rode pou kapab ed en pti pe, aranz en pti pe an sa ki konsern amelyor en pti pe an sa ki konsern bann *green waste* sirtou pou nou kapab reservi li dan nou zarden. E i kapab vin koman en fason zener larzan osi letan ki ou'n *shred* sa bann brans dibwa.

E ou kapab vann li koman *compost* apre...

### **MR DEPUTY SPEAKER**

Ou pe apros 15 minit.

### **HON SYLVANNE LEMIEL**

Mr Speaker, mon pe apros mon letan wi. Me mon annan en lot konsern letan Onorab in anmenn sa Mosyon lo salte dan lanvironnman. Mwan mon annan en konsern ki mon ti a kontan met devan, mon pou profite letan mon lo sa Mosyon. An sa ki konsern bann semen ki ganny netwaye dan distrik Mr Speaker. Sa osi i en konsern lo kote lanvironnman, kot nou vwar ki bokou semen sirtou dan mon distrik i annan bokou semen ki pa lo lalis netwaye.

E ki ou vwar toultan ou bezwen *request* serten *one-off*, e sa i pran en kantite letan. Parfwa i annan ki aprouve, e i annan pa ganny aprouve. Lo sa kote osi nou ti a demann Gouvernman pou petet war en pti pe pli vit posib an sa ki konsern tou sa bann semen ki'n ganny konstri dan distrik.

E ki tou sa bann semen, i kapab ganny netwaye e ki i ti a kapab fer nou lanvironnman vin en pti pe pli prop, e en pti pe pli zoli. So, avek sa 2 mo Mr Speaker, mon dir ou mersi.

### **MR DEPUTY SPEAKER**

Mersi Onorab Lemiel. Onorab Larue, ou ki prosennman lo lalis.

### **HON FLORY LARUE**

Bonn apre midi Mr Speaker. Mersi Mr Speaker. Mr Speaker, ozordi nou pe koz lo en problem nasyonal zeran salte dan nou pei. Annou komans avek kekfwa sir ki nou vwar sak fwa nou desann Victorya se lo *dump site*. Mon krwar tou dimoun i pas o bor, e i vwar kote tou nou bann salte ki sorti kot nou lakour i *end up*.

Sa bann salte i enkli tou salte, salte ki sorti dan bann *household* e salte komersyal ki sorti kot tou bann biznes. Alor, i pa en keksoz fasil pou zis dir i problem Gouvernman. I en problem nasyonal, e i en problem tou Seselwa ki zer salte, nou tou nou zer salte. An plis ki sa nou konnen ki nou anmenn 300 ekek mil touris par an.

E sa kantite tourizm i dan nou pei i fer ki nou bann lenfrastruktir i ganny bokou presyon. E nou bezwen aksepte ki bann lotel i zer bokou salte. So, i en konversasyon ki mon santi nou'n fer li an silo, e pa neserman an kolektivite tou bann *stakeholders* ki kapab annan en *stake* ouswa ki kapab aport solisyon pou sa problem.

Mon'n tann sa Mosyon ki Onorab Desheila in anmenn ganny politize. I vreman bizar letan nou vwar en keksoz ki

telman nou tou koman endividi nou zer salte. E nou vwar ki nou pe politiz li. I *sad* pou war lot kote pe sey politiz en problem ki zot menm zot in kit nou avek en kantite lenfrastruktir ki pa ed nou sityasyon lo kote zeran salte.

So, olye sey met lanmen ansanm pou sey regarde ki mannyer nou bouz devan, pou trouv en solisyon pou nou tou, nou war zot pe anvoy lapo bannann. Me mon krwar ki nou bezwen reget nou pwennvi lo sa Mosyon, e mon ti a demann zot pou siport Onorab Bastienne letan nou pou vot pou son Mosyon.

Mr Speaker, mon komans avek a *dumpsite* ki ti ganny ouver 2016/2017, e nou bezwen konnen ki nou *dumpsite* menm si ti annan serten sistenm teknik atase avek, bokou sa bann sistenm ti *fail*. E enn bann keksoz ki nou'n gannyen avek sa *dumpsite*, i sa desarz ki sorti ki apel *leachate* ki sorti kot sa *dumpsite* ki *seep* dan later. E souvan letan ou pe vini sorti aletranze, ou pou pas par avyon ou pou gete ou pou war ki i pe *seep* dan delo sale.

Sa i enn bann keksoz ki nou'n erite. E i en keksoz ki Gouvernman pou bezwen konsidere e rod en solisyon. Mr Speaker, Bidze i fer ki i difisil

pou nou ganny en solisyon imedyata. Letan nou pe koz lo ... i osi annan *gas methane* ki nou *dumpsite* i large dan latmosfer, ki osi en polyan. Me an mezir ki nou pe get sa 2 keksoz i *leachate e methane gas* ki pe ganny *release*, nou bezwen osi konsyan ki nou *dumpsite* in nepli annan plas. I limite son plas ki reste pou nou kapab met nou 90 mil tonn salte or plis ki nou zere dan sa pei.

So, anmezir ki nou fer bann diskisyon, nou bouz devan, annou mazine ki salte i ganny zere toulezour par nou tou. E nou bezwen travay ansanm pou met plis finansman dan sa sekter, pou nou kapab deal ek problem salte an zeneral.

Mr Speaker, letan nou pe koz lo *dumpsite*, nou bezwen regarde ki mannyer nou ranpli sa bann *dumpsite*. Dan nou bann bin ki sorti dan bann distrik, e bann kontra ki bann biznes komersyal i annan pou bann dimoun retir zot salte pou anmenn lo *dumpsite*. Apre nou ganny bann *green waste*.

La kot kekfwa nou bezwen annan sa konversasyon lo ki mannyer nou komans mazin *sort* nou salte. Nou'n koz lo ozordi Onorab Loizeau in dir nou 2024, nou pe vin koz lo *dustbin* e salte ki ganny mete

otour bin. Me letan nou dir nou travel, nou vwayaze nou tou nou'n vwar ki i annan en keksoz ki apel *sorting*. Nou'n vwar diferan kouler bin, ki met diferan kalite salte ladan, me selman nou, nou pa ankor kapab ariv sa staz.

Mr Speaker, i pa neserman ki Gouvernman pa tro enterese avek sa. Me letan ou war salte toulezour ki sorti dan nou lakour, koman en popilasyon bokou dimoun pa responsab avek zot salte ki zot zere dan zot lakour. Bokou pti biznes i ganny trouve dan kominote ki anba Lalwa i dir zot ki zot bezwen annan en kontra, bokou zot - en kontra avek en dimoun ki tir sale kot zot - bokou zot i *part of* zot *licensing procedure*, zot pa *adhere* avek sa *requirement*.

Zot dan nou kominote zot sa bann biznes, bann *take away*, bann magazen, bann ... kantite biznes i annan en *requirement* pou li annan sa kontra. Me selman lefe ki zot pa fer sa pa, i fer ki sa *communal bins*, sa bann bin ki o bor semen li i ganny ranpli avek *commercial waste*, akoz sa dimoun pa pe pran son responsabilite serye.

Letan nou pe koz lo pa pran responsabilite serye, prezan mon santi ki nou pe

blanm la kot Gouvernman i antre, nou pe blanm *LWMA* e nou pe blanm Minister Lanvironnman. Mr Speaker, sa Lazans *Land and Waste Management Agency*, i en Lazans ki annan li 79 *staff*. Zot annan zot 305 kontrakter ki netway bann *area* diferan *area* o tour pei.

Sa lazans Mr Speaker, i annan li 1 manda avek en seri responsabilite. Zot annan *quality assurance, advisory role, planning and coordination, drain maintenance, landscape enhancement, waste management, technical instructions, site designation, waste disposal instructions, contractors' engagements, regulatory oversites, fee collection, data maintenance, policy advisory*. Tousala i tonm anba zot.

Mr Speaker, i annan bokou pou zot fer sa 79 *staff*. I en lazans lo li menm. Lo kote bidzeter, sa lazans i vwar li pe ganny, Minister antye pou komanse i ganny li R539 milyon. R539 milyon 657 mil. E la dan sa Minister ou annan ou *The Ministry of Agriculture*, ou annan *Climate Change* e ou annan *Portfolio* Lanvironnman. Sa i en gro Minister.

*Landscape and Waste Management Agency* li i ganny



R287 milyon 775 mil. Ladan R197 milyon 786 mil i al zis pou *Waste Management Services*. So, Gouvernman pe fer son par li Mr Speaker. I annan larzan ki pe ganny mete dan sa sekter. Prezan nou pe koz lo zeran sa larzan e ki rezilta ki nou gannyen avek sa larzan. La kot Mr Speaker tou dimoun i bezwen met lanmen ansanm.

Nou bezwen rekonnet ki met lanmen ansanm i bezwen vin en problemm kominoter; depi *MNA*, *DA* e tou zabitan. E la kekfwa kot nou kapab demande si napa en laliny telefonn kot dimoun i kapab *call*. Me sirtou letan zot *call*, ki zot lenformasyon ki zot donner i reste konfidansyel e prive. Mon'n tann Onorab Lemiel dir ki in vwar en *pickup*.

Eski kekfwa letan in vwar sa *pickup* pe fer serten keksoz, in al pli devan pou rod son limero telefonn, son limero loto pou sey fer en kek konplent? Pou kapab gete si sa dimoun li i pe met salte komersyal dan sa bann bin. E sa ki i pe dir i vremen korek, se egzakteman sa ki pase. E nou pou pran legzanp kekfwa ki ti pase lo nouvel detrwa zour pase Anse La Mouche, kot nou vwar en *bin site* i vremen ranpli.

Mr Speaker, mon pou bezwen dir ki i annan en travay

ki'n ganny fer par *LWMA* akoz zot annan bann proze ki zot pe al met an plas la pou sey gete ki bann nouvo keksoz ki zot kapab mete. E Onorab Adelaide ti mansyonnen ki "*One Household One Bin*" i bann program ki *LWMA* pe sey met devan pou li kapab sey rod en solisyon pou sa bann problemm ki nou pe gannyen. Zot annan bann *pilot program* ki zot pou anmennen dan Au Cap, Anse La Mouche, e Perseverance.

Me zis dan sa pti rezyon la kot zot ti fer sa *news item*, i annan li 22 *small catering businesses*, 22 Mr Speaker zis dan sa plato la. Dan sa 22, 17 i anba 7 lasanm. Mr Speaker, Lalwa, Lalwa *Licensing* dan seksyon 8(c) i dir ki i neserer pou annan en sa i pou *Tourism Establishment*. I neserer ki ou annan en *License Refused Collector* ki'n ganny aprouve par *LWMA* pou vin tir ou salte.

Me selman sa Lalwa i aplik pou letablisman ki annan plis ki 7 lasanm. Savedir en letablisman ki mwens ki 7 lasanm li i pou servi sa *communal bin*. Be nou vwar ki dan sa rezyon la i byen pou *tourism*, e dan sa rezyon la nou annan nou 22 pti lotel. E dan sa 22, 17 i annan li mwens ki 7 lasanm. Savedir 17 biznes pe servi sa bann bin.

E ou pe koz ou preski 200 *beds* ki pe met ankor touris pe zer salte. E nou bezwen nou koman en Lasanble reget sa bout Lalwa. E kekfwa menm ler ki nou kapab komans en konversasyon, ant Minis Lanvironnman e Minister Tourizm e ansanm avek *Licensing* pou regarde si pa amann sa Lalwa nou kapab asiste *LWMA* kekfwa pou kapab *meet* bann target pou retir salte.

Mr Speaker, mon konnen mon letan in fini. Me selman mon santi ki nou pa kapab fer bann politik popilis avek sa Mosyon. E mon krwar i annan en kantite konversasyon ki nou a kapab kontinyen fer koman en Lasanble e koman en Gouvernman pou anmenn solisyon. Akoz nou pei nou'n dir ki tourizm i nou diber. E si i nou diber, nou bezwen fer sir ki nou protez nou lanvironnman. Mon ti a remersi ou Mr Speaker.

### **MR DEPUTY SPEAKER**

Mersi Onorab Larue. Dernyen Manm ki pou entervenir lo sa size se Onorab William, ou annan laparol.

### **HON WAVEN WILLIAM**

Mersi Mr Speaker. Bonn apre midi tou dimoun ki pe ekoute. Mr Speaker, an premier instant mon ti a kontan remersi Bondye

pou nou zoli pei. E pou sa pep Seselwa inik dan sa vilaz global. Mr Speaker, lo sa Mosyon ki mon santi in vin dan en moman vreman apropiye, akoz in annan diskisyon lo *SBC* par serten endividi lo kote zesyon salte.

E semenn pase nou ti annan en kestasyon 161 anmennen par Onorab Roucou, pe koz lo bin. E ozordi, Lasanble pe debat lo en Mosyon ki konsern sa menm size. I montre Mr Speaker, konsern e gravite sa probleman pa zis Sesel akoz ozordi nou pe koz lo Sesel. Me i en konsern sa volaz global an antye. Me koman Seselwa, koman sitwayen Seselwa nou bezwen nou osi fer nou bout.

Mr Speaker, letan nou regard ki'n arive avek devlopman in annan en ta transformasyon dan diferan kalite aktivite. Par egzanp kalite lakaz in sanze, e kalite lanbalaz manze letan nou pe koz valer azoute pou prezerv manze. In fer ki i annan en akimilasyon ouswa logmantasyon dan bann salte ki sorti kot lakour.

Mr Speaker, nou vwar osi ki vites devlopman baze lo kapasite en pei, pou kapab entervenir pou aport solisyon, sa i reste touzour en defi Mr Speaker letan dan en pei parey Sesel dan en pti leta zil kot ou

annan pe resours pou en nenport Gouvernman i pou reste en defi.

Me Mr Speaker, sa Mosyon pe koz lo responsabilite ki devret ganny pran par tou parti prenon, sitwayen koman Gouvernman.

E Mr Speaker, sa eleman responsabilite i en mo ki pez for. Mr Speaker, be bokou in ganny dir. Be mwan mon pou al en pti pe lo kote fer pep konsyan lo enn kalite materyo ki nou pe zet dan nou lanvironnman, ki annan en lenpak vreman lonterm. Mr Speaker, si nou pe pran sa komodite ki apel plastik Mr Speaker.

Mr Speaker, mon pe servi sa koman en legzanp akoz i annan en ta legzanp ki nou kapab donnen. Mr Speaker, depi ki materyo plastik in ganny fabrike zot dispozisyon dan lanvironnman, swa lo *dumping site*, dan lanmar, larivyer, lanmer, lakot e oter zot degradasyon e transformasyon dan nou lanvironnman zot in form parti nou *food chain* pou imen, zwazo, zannimo e lavi maritim.

Mr Speaker, atraver resers in ganny prove ki serten fri e legim zot annan serten nivo *microplastic*. Tel parey karot, leti, ponm parmi lezot kot tes in ganny fer. Mr Speaker, dapre

evalyasyon e resers i annan 16 mil kalite kemikal plastik ki'n ganny dekouver. E anviron 4200 parmi i vreman danzere pou lasante imen, e nou lanvironnman.

Resers in montre ki bann *textile* sentetik, lapousyer dan ler, larou loto, bann demarkasyon lo semen, lapentir kot maritim, bann prodwir seve e lapo e bann kapsil medikal parmi lezot, zot annan serten degre mikro plastik dan zot konpozisyon. Mr Speaker, *microplastic* i osi ganny trouve dan kosmetik, prodwir netwayaz, *turf* artifisyel e lasenn lapes.

Ozordi zot ganny vwar dan larivyer, later, manze, dite, dan lanez e zot pe aparet osi dan nyaz ki donn nou lapli. Mr Speaker, ki fer ozordi nou *DNA* i osi konteni serten latras mikro plastik Mr Speaker. Akoz nou pe konsonmen, e nou dan en serk visye. I pa drol akoz depi zonn in komans prodwir materyo baz plastik dan tou son form itilizasyon e transformasyon, plis ki 8 bilyon tonn in ganny prodwir Mr Speaker.

Me selman 10 pousan mondyalman, sa tonaz ki pe ganny resikle. Materyo plastik i kapab reste dan lanvironnman plis ki 100 an, avan i komans

detaryore dousman, dousman e entegre dan lanvironnman bann diferan form atraver sa ki nou konsonmen toulezour. Resers i osi dir ki i pa kler ki degre danzere i ete lo imen e lavi an zeneral.

Resers resan in montre ki serten kemikal dan plastik, zot kapab enterfer e kre prodiksyon tretman *stress* e sistenm defans imen. Resers in ganny fer ek delo lapli pou latras *microplastic*. In ganny dekouver ki materyo ki ganny servi dan bann tel prodwir parey *plastic film* ki nou kouver manze avek, sak plastik, bann boutey *comfort, detergent, Javel* dan serten dantifris, *lipstick, lip gloss, eye shadow* e lapoud, *mascara, nail varnish* eksetera Mr Speaker, i kontenir serten nivo *microplastic*.

Resers in osi ganny fer lo zot prezans dan nyaz. In dekouver ki atraver losean, sa bann pti partikil ouswa bout plastik in ganny transformen, zot in ganny anmennen dan divan. In ganny dir ki zot kapab annan en lefe lo bann nyaz, kot nyaz i kapab donn plis lapli e sanz patern letan mondyalman.

Zot kapab osi kontribye pou resofman later, aköz atraver zot deteryorasyon ankor par lasaler soley, *gas methane* i kapab ganny large an adisyon

Mr Speaker. So, Mr Speaker, mon'n pas lo la pou montre en pti pe kwa ki pe arive, ki petet pep pa konsyan lafason ki nou pe zer salte ouswa zet serten bann salte. E la Mr Speaker, mwan mon ti ava dekouraz bann dimoun pou anter zot bann salte si i pa biodegradab.

Akoz si parey nou pe anter bann plastik, son lefe lonterm Mr Speaker, mazine poudir ek gro lapli tou keksoz i desann i al dan lanmer. E Mr Speaker, sa ki enteresan san realize nou pa pe war li avek lizye. Sa lavi maritim osi pe ganny polye e nou pe manz li Mr Speaker.

E se pous a rezon mon pe dir ki nou dan en serk visye. Mr Speaker, mon krwar poudir nou bezwen kontinyelman vwar lapros, i enportan sa. Aköz dan en devlopman, nenport ki devlopman i enportan ki lapros i toultan ganny revwar. E mon krwar poudir solisyon Mr Speaker, i avek nou li. I avek nou dan kominote, me parfwa i demande ki nou asize ansanm pou sey koze.

Me pa vin ek bann lide zis pou enpoze, me pou ekout lezot lide pou nou met ansanm pou nou kapab ganny sa pli meyer solisyon. Alors, mon santi poudir sa lapros enklizif, konpreansiv i merit ganny swazir. Mr Speaker, me pa zis

en lapros enklizif, konpreansif, me i bezwen konsistan Mr Speaker.

Akoz bokou fwa nou komans en keksoz epi nou aret dan milye semen. E la dimoun i pran lavantaz aköz par egzanz nou pe koz *enforcement*, *enforcement* pa kontinyen.

E Mr Speaker, mon santi ki i neserer revwar metod ledikasyon dan en fason sektoryel dan sosyete Mr Speaker i enportan sa. E plasman bann bin i neserer ganny revwar dan distrik, osi kalite bin Mr Speaker. I annan landrwa bann *skiff* i demann ganny mete.

Mr Speaker, en lot keksoz ki ozordi pe vin en problemm lontan ou ti kapab met en pe dife bril en pe salte, an menm tan fimiz ou lanvironnman. E ozordi i normal aköz avek neglizans i annan dife si ou annan kontrol.

Me mon ti ava demande ki Departman *SFRSA* i vin en pti pe pli proaktiv vin dan distrik. Petet ed sa dimoun donn li mon kapab dir bann gidans ki fason pou li kapab bril serten keksoz, ki ava kapab redwir en pti pe lakantite salte ki al lo *dumping site*. E an menm tan pa ankouraz bann dimoun al zet bann salte *overboard*.

Mr Speaker, osi mon santi poudir koman bann pti Leta Zil, Sesel i bezwen dan sa lalyans Leta Zil kontinyen sa konversasyon pou met lanfaz Mr Speaker, lo kote *circular economy*. Mr Speaker, mon krwar poudir *WTO* osi, nou bezwen met serten demann kot bann ki pe manufacture. Ou annan bann enportater ki fer vini bann keksoz dan bann lanbalaz, i ganny vann avek konsonmater, i devret annan serten lagreman kot sa konsonmater letan in fini swa si dan 6 mwan sa *fridge* ouswa sa *TV* ouswa sa *deep* in ganny andomaze, kot sa bann keksoz i kapab ganny pran par sa dimoun ki'n vann ou.

E li i bezwen annan serten laranzman aletranze kot nou kapab fer retournen sa bann keksoz. Aköz si non Mr Speaker, nou pou kontinyen ale vini kot nou pe enport sitan bokou keksoz ki pa biodegradab, ki fer ki

(1)i pou annan en akimilasyon e nou pa konnen ki pou fer avek si nou pa ganny sipor e lasistans en *Cross Border Circular Economy* Lagreman.

E mon ti a demande ki nou eksplor sa size. Mr Speaker, sa eleman *policing* osi nou pa pe, petet i demann

revwar ankor en pe. Mr Speaker, nou konnen poudir nou annan pe resours imen. Be si ou pas dan en distrik, ler ou regarde ki kantite lazans ki pe *enforce* Lalwa, me nou pa kapab ed kanmarad pou *enforce*

Se pou sa rezon Mr Speaker, ki mwan mon'n demann avek Minis Lagrikiltir, Sanzman Klima avek Lenerzi renouvlab pou en miting dan distrik, pou nou kapab koze e vwar aköz mon santi poudir nou kapab rezourd serten sa bann problem. Me zis en kestyon nou zwenn ekoute, e servi en distrik koman en *pilot project* pou nou kapab met an mars enn de keksoz.

Aküz mon pa vwar li Mr Speaker vreman difisil, aköz si ou pran *PMC*. *PMC* i deza annan en lagreman lakaz avek son bann konsonmater. E dan sa lagreman lakaz, i annan serten bann kondisyon ki ganny mete vizavi pa zot devret pe fer. E ou annan en lot, ou annan sanniter ki annan pou li. Ou annan lapolis i annan pou li. Me si nou zwenn ansanm, e lo kote *enforcement* nou tou nou pe zwe menm rol Mr Speaker.

Petet i annan serten eksepsyon, me i annan serten ki nou kapab zwe en rol pou nou kapab donn sa *policing* vreman efektiv. Mr Speaker,

mon'n deza met devan en sizesyon ki netwayaz larivyè pa ganny fer zis dan plato. Aköz devlopman lakaz ozordi dan montanny e si bann zofisye pa pe mont dan montanny, e vre parfwa dimoun i neglizan pa pe pran zot responsabilite.

Be gro lapli salte pou desann i pou blok pon dan plato. Me si netwayaz pe ganny fer lo en *regular basis*, mon pa pe dir tou le mwan. Me dizon 3 fwa ouswa 2 fwa dan en lannen, me bann salte ti ava redwir ki desann dan plato. Mr Speaker, alor koman en Manm lo Komite Sekirite Alimanter avek Devlopman Soutenab, mon vwar ki sa Mosyon i vreman enportan.

E mon ti ava demande, ki Komite Sekirite Alimanter avek Devlopman Soutenab, letan sa Mosyon i pase nou ganny bann rekomandasyon e nou fer en kontinyasyon sa konversasyon avek Minister konsernen.

Mr Speaker, aköz sa i bezwen ganny fer aköz nou pa kapab divors nou avek nou lanvironnman, aköz se nou lanvironnman ki nou depan lo la.

E Mr Speaker, alor sa i mon demann ki i annan en swivi par Komite Sekirite Alimanter avek Devlopman Soutenab avek Minister

konsernen, pou nou fer sir ki enn;- nou annan serten revizyon. E petet annan bann nouvo lapros atraver bann sizesyon ki'n ganny mete pou nou kapab ed nou pei avans devan. Mersi.

### **MR DEPUTY SPEAKER**

Mersi Onorab William. Onorab William ti dernyen entervenans lo sa Mosyon ki nou'n komans koz lo la depi 9 er 39 bomaten. Alor, la in ler aprezan pou mwan donn dwa repons loter Mosyon Onorab Desheila Bastienne.

### **HON DESHIELA BASTIENNE**

Mersi Mr Speaker. Mr Speaker - avan tou mon pour remersye tou Manm Onorab ki'n reponn e donn zot sipor lo sa Mosyon, ki'n annan pour fer avek lanvironnman e kondisyon lapropte dan nou pei.

Mr Speaker, parey mon ti fer sorti lo komansman sa Mosyon, touris i kontan nou pei avek son zoli lanvironnman parey nou tou koman Seselwa nou osi nou kontan nou pei, enkli nou lanvironnman.

Wi Mr Speaker, se pour se la ozordi isi dan sa Lasanble nou pe enplor Lepep Seselwa pour vin pli konsyan e annou

pran nou responsabilite vizavi lapropte nou pei.

Mr Speaker, swivan bann kontribisyon parmi nou bann MNA isi dan Lasanble. Nou'n tann diferan konsern avek diferan lopinyon ki annan pou fer avek lapropte nou pei e pour nou kapab gard Sesel prop e zoli.

MNA Roucou avek MNA Andy Labonte, in koz bokou lo ledikasyon, plis dyalog lo responsabilite depoz salte e ki i devret vin en size kontinyel. Konsern lo bwat *take-away* e bann bwat *juice* vid, in osi ganny monte.

E ozordi ou a krwar i pe vin en dekorasyon dan lavil Victoria. Kot Seselwa i asize pour manze, letan zot in fini, zot kit – zot leve e zot kit sa bwat vid lanmenm ater.

*Enforcement* i sipoze ganny travay lo la e fodre annan plis lenvestigasyon pour met en *stop* avek bann tel aksyon iresponsab.

Onorab Philip Arissol in fer sorti ki zimaz nou zil pe ganny menase pare fleo salte. E in met lanfaz lo responsabilite sak endividi.

Onorab Romain in fer sorti ki nou pei i devret vin en sours lafyerte pou nou tou, i pa'n spesifye lekel in dir "nou tou."

Onorab Porice in fer sorti ki kontrakter ki pe ganny peye pour ranmas salte i enportan ki zot pran zot responsabilite, respekte zot Kontra e desarz zot travay a ler.

Onorab Loizeau in demande kote nou'n al mal? Spesyalman dan sa letan ki'n annan plis sansibilizasyon lo aret zet salte partou kote. Ki ozordi nou pe koz lo la, lo en tel Mosyon.

Wi. Kote ki nou'n al mal? Me kan a Onorab Audrey Vidot Mr Speaker, dan son kontribisyon i pa'n vin lo sa laspe pozitiv ki annan pour fer avek sa Mosyon, pour arive ed Lepep Seselwa pran zot responsabilite.

Aret zet salte partou. Sanz zot *mindset*. Fer li pli byen framezir lannen i sanze e nou rantre dan en lemondn pli modern. Mr Speaker Onorab Vidot, in plito pran en lot lanpler kot *long service allowance* in antre dan sa Mosyon.

Mon demande eski fodre Gouvernman i pey *long service allowance*, pour nou Seselwa pa zet salte dan nou lanvironnman? Fodre peye pour nou gard nou pei prop?

Ler mon ti nonm donn enn pti *allowance*, mon ti pe senpleman pe ankouraz lazans

konsernen pour donn enn pti *incentive* enn de zofisye, ki pare pour fer bann letour lo bann lans dan *weekend*, pour edik Lepep lo gard lans prop apre zot lafet, pran zot responsabilite.

Mr Speaker, Onorab Sandy Arissol de lot kote, ti releve lenportans sa Mosyon. E i ti komans par eksplik lapropte lekor, savwar viv, e responsabilite, parey nou'n toultan dir ki lapropte i komans dan lakour ek nou menm, pour li al dekoul dan lasosyete.

Onorab Adelaide in dir ansanm annou zwe nou rol pour met distrik anler e fer li vin pli akeyan. Onorab Woodcock in koz lo responsabilite ek determinasyon bann travay volonter, ki montre zot sipor e lanmour pour zot distrik lo zil.

E osi lapresyasyon anver bann dimoun ki pare pour donn en pti kwen, pour enstal en *bin site* ki pour deservi lakominote.

Mr Speaker, Onorab Georges in fer sorti ant nou responsabilite endividyel ek responsabilite Gouvernman.

Letan Gouvernman i asire ki tou keksoz i an plas, pour sofgard nou lanvironnman. I osi devwar sak endividi pour pran nou responsabilite, pour nou protez e prezerv nou lanvironnman pour nou arive



gard nou pei koman pli zoli pei dan lemond.

Mr Speaker, Onorab Spiro, ti fer kler ki Sesel in ganny renonmen koman sanpyon lanvironnman. E fodre ki i mentenir en standar lo o pli o nivo. E i osi apresye bann pti *spot* ki ganny pase lo Radyo *FM* ou dan *weekend*, pour ankouraz piblik pour pran zot responsabilite.

In osi fer sorti ki i enportan ki Seselwa i adopte sa trwa mo 'redwir, reservi, e resikle', pour ede tir salte dan lanvironnman.

Onorab Samynadin in osi met lanfaz lo sansibilizasyon ek ledikasyon, kot li osi enportan pour komans avek zanfan lekol zot menm.

Kot zot a demontre zot responsabilite par pran responsabilite netway zot prop lanvironnman kot zot lekol respektif.

Onorab Lemiel in fer sorti ki enportan pour gard nou lanvironnman sen. Akoz i enportan ki nou respir bann bon ler e ki i pa normal e akseptab pour dimoun zet salte partou kot zot arrive.

Onorab Larue in rekomannde ki nou tou nou travay ansanm pour kapab war en solisyon. Akoz sa problemn

salte i partou dan pei an antye e i pe afekte nou tou.

E Onorab William in met lanfaz lo danze materyo plastik. E parmi in fer sorti ki parmi bokou i vreman danzere pour nou lanvironnman e osi nou prop lasante.

Mr Speaker, Minis Joubert, Minis pour Lanvironnman dan sesyon demann kekyon Merkrede pase isi dan nou Lasanble, in osi enplor Seselwa pour vin pli sivilize e annan respe lo fason zet salte dan bin. E ansanm avek li nou pour osi salye bann sitwayen ki pran zot responsabilite e pa zet salte dan nenport landrwa.

In osi demande pour nou osi aret zet salte an deor nou lafnet transpor e aret komet bokou lezot aksyon irresponsab ki vin en gro problemn demen.

Mr Speaker, bon nouvel, se ki Minis Lanvironnman in menm ofer pour siport bann distrik ki bezwen bin en pe irzan. E la Mr Speaker, mwan mon pe al fer mon demann pour enn de bin ki neser a ler aktyel dan Ile Perseverance.

Parey Mr Georges in rekomannde ki in ler pour sistenm sak lakaz annan son prop bin; Onorab Georges in demande, in rekomannde ki in ler pour sistenm sak lakaz

annan son prop bin, pour annan plis lord, mwan personnelman mon vremen apresye ki tre byento sa proze pilot, kot en sistenm sak lakour, son prop bin, pe al komanse kot serten group lakaz dan Ile Perseverance.

Sa sistenm – sa travay pe al ganny fer par LWMA pour obzerve si sa sistenm pour fer byen. E si i marse, nou a kapab fer li vin en sistenm koleksyon salte permanan lo *housing estate* dan Perseverance.

E lo lapar Lotorite Distrik Perseverance 1 ek 2, mon pour dir mersi lazans kot LWMA pour pran sa linisyativ, pour komans sa proze dan Ile Perseverance an premye.

Mr Speaker an terminan, mon pour fer en pledwari avek nou pep, pour nou vin pli responsab, kontan nou pei, detas nou avek bann move labitid.

E pran nou lanvironnman pli enportan par lao tou. Annou azir pli responsab, kot personn pa ava war zot pe al pey en penalti, ki pa ni ti nesaser, si zis nou ti pran nou responsabilite.

Responsabilite pa atase avek en pri, i pa peye, me i senpleman savwar viv. Ler nou kit nou lans, annou pa kit salte deryer, annou kit nou lans prop.

Annou zis kit mark nou bann *footprint*, apre ki nou'n byen pase e nou'n byen rezouir nou lans avek lanmour ek respe.

Mr Speaker, avek sa de mo. Mon prezant sa Mosyon devan Lasanble pour laprouvasyon. Mersi.

**(APPLAUSE)**

### **MR DEPUTY SPEAKER**

Mersi Onorab Bastienne pour ou Drwa de Repons. Donk in ariv ler pour nou pran en vot lo Mosyon ki devan nou. E nou pe debat lo la depi bomaten 9 er 39.

Mon ava zis relir li avan ki nou pran vot. Mosyon i lir koumsa:-

“Etandonnen lenportans en lanvironnman zoli, prop e sen dan lekonomi e byennet nou pei e nou nasyon, Lasanble i fer en lapel avek tou Seselwa pou vin pli responsab e aret zet salte dan landrwa ki pa apropiye, e demann Gouvernman pou ranforsi Lalwa kont zet salte an-bonnavini dan lanvironnman.”

Mon ava demann tou bann Manm ki an faver pour endike silvouple? Mersi. Okenn Manm ki kont? Mersi.

Mersi Madanm Deputy. Mosyon ki mon fek li. Rezilta vot

i koumsa, i annan 20 Manm ki'n vot an faver, personn pa'n vot kont, i annan 7 Manm ki'n *abstain*.

Alor i vedit ki sa vot lo sa Mosyon, in pase.

**(APPLAUSE)**

**MR DEPUTY SPEAKER**

E i reste poudir parey Onorab William in propoze. Konmsi ki i annan en kontini, en kontinyite. Donk mon swete ki Onorab William ki Komite *Food Security* i pran ou konsey seryezman.

Mon pour demann Madanm Deputy Clerk pour fer en *First Reading*. Akoz baze lo travay *Bills Committee*, i annan de *Bill* ki nou sipoze pran semenn prosenn, ki nou'n zwenn bann *sponsors* yer.

Donk nou pour fer *First Reading* pour kapab ganny son 7 zour lo *Order Paper*.

**MADAM DEPUTY CLERK**

Mersi Mr Speaker.

*This Act may be cited as the Seychelles Civil Aviation Authority Act, 2024, and shall come into operation on such date as the Minister may appoint by notice published in the Gazette.*

*This Act may be cited as the Seychelles Airports Authority Act, 2024 and shall*

*come into operation on such date as the Minister may by notice published in the Gazette appoint.* Mersi Mr Speaker.

**MR DEPUTY SPEAKER**

Mersi Madanm Deputy Clerk. Nou pe apros lafen nou travay pour sa semenn. Me avan nou ale i annan en size ki mon bezwen *dispose of*, dan mon responsabilite koman Speaker pour sa semenn dan labsans Speaker Mancienne, ki pour rantre dan pei sa semenn e rebran son pozisyon semenn prosen.

Sa i konsern 2 *matter of privilege* ki ti leve sa semenn. Merkrede pase avan ki travay Lasanble ti terminen, 2 Manm *Caucus* Lopozisyon ti lev en *matter of privilege*' parey Lord 40 nou *Standing Orders* i prevwar.

Kontestasyon Onorab Sebastien Pillay avek Onorab Johan Loze ti lo prosedir etabli anba Lord 10. Letan en Manm i *alert Speaker*, ki napa en *quorum* dan Lasanble.

La mon le fer resorti ki anba sa Lord, en Manm i sipoze *alert Speaker*, e non pa obzekte ki napa en *quorum*.

Lopinyon sa 2 *MNAs* i se ki prosedir pa ti ganny swiv. Zot baz, sete fason ki prosedir

Lasanble ti deroule le 9 Zen 2020, letan Speaker sa letan ti sispann travay Lasanble, apre ki i ti'n ganny alerte ki ti napa *quorum*. Eski i vre ki prosedir pa ti ganny swiv Mardi semenn pase?

Annakor avek Lord 10(2), en vot pa ti neser akòz tou MNAs ti konnen ki ti annan selman 14 MNAs LDS ki ti dan pei e prezan dan Lasanble sa zour.

Eski ti annan okenn desizyon ki ti ganny pran atraver en vot avan ki Lasanble ti sispann travay sa zour? Larepons i non.

Eski Speaker ti dir kan ki Lasanble pou rezwenn pou kontinye son travay? Larepons i wi.

Eski Lasanble ti *adjourn* apre ki en Manm ti'n alert Speaker lo labsans en *quorum*? Larepons i wi.

Alor pour mwan prosedir anba Lord 10 ti annord. Ti napa naryen ki'n al kont nou Konstitisyon e nou *Standing Orders* sa zour.

An dot mo, privez Lasanble pa'n ganny afekte apard ki sa zour, Lasanble ti *fail* dan nou devwar piblik pour asize e konplet travay ki ti devan nou sa zour.

Sa ki sa 2 MNAs ki'n esey konpar lensidan le 9 Zen 2020

avek lensidan le 2 Zilyet 2024, in konvenableman oubliye dir Lasanble, i se ki konteks sa 2 lensidan ti konpletman diferan.

I visye pou esey pran en sityasyon e fer pas parey en lot zis pour ganny rezon. Le 9 Zen 2020, letan sa 18 MNA LDS ti sorti dan lasal, zot ti senpleman leve dan *Chamber* e ale.

Ti napa person ki ti'n lev okenn *matter of privilege* e dan ki Speaker ti ganny atake e maltrete - me zot ti senpleman ale. Speaker pa ti okouran akòz zot ti'n ale e ki ti zot lentansyon.

Alor i normal ki i ti ordonn bann MNAs pou reste lo *precinct* e dir ki en miting ABC pou fer pli boner pou kapab determinen ki pou arive avek kontinyasyon travay Lasanble pour sa lazournen.

Sa ki ti diferan le 2 Zilyet 2024, i se ki Onorab Pillay ti kategorikman dir atraver en *matter of privilege* ki, e mon site.

“Lo kote latab – nou kote latab pa pe kontinyen pran par dan sa sesyon. Nou pe proteste. Akòz nou santi ki nou drwa e mon privez konman *Leader* Lopozisyon pa pe ganny respekte”.

Alor lentansyon *Caucus US* ti kler. Ki zot ti'n deside pa kontinyen travay e par konsekans asire ki travay Lasanble an antye i oblize

sispann. Akoz ti napa ase *MNAs* dan *Chamber* ler zot ti pou'n ale.

Onorab Pillay e osi Onorab Loze in fer alizyon ki ti annan en deba apre ki Speaker, ti'n ganny alerte ki napa en *quorum*. Sa i fo.

2 *MNAs*, ti demann laparol. Enn ti kestyonn prosedir ler i annan en *walkout*, spesifikman avek anbigite *Standing Orders* lo size '*quorum*'.

Enn lot ti lev en *matter of privilege*, konmkwa ki son privez koman en Manm ki'n raport travay sa zour in ganny afekte.

Lord 10 *Standing Orders* pa eksplisitman dir ki okenn *point of order* ouswa *matter of privilege*, pa kapab ganny *entertain* ler labsans *quorum* in ganny sinyale.

Pou kontinyen, mon oule adres plizyer pwen ki Onorab Pillay ti koz lo la kontrerman avek sa ki lord 40(3) i permet li fer.

Onorab ti dir ki privez *US* ti ganny afekte par mon komanter ki zot *walkout* ti politik e malisyé. Mon mentenir sa komanter.

Letan konman ou sorti dan Lasanble, ou taye e al *call* medya pou donn *interview* lo sa sityasyon, ou pe azir kont

lentere Lasanble Nasyonal e trenn son prosedir dan lakour lopinyon piblik.

E la, mon oule enform Lasanble Nasyonal ki Lasal Nouvel *SBC* e osi *Today in Seychelles*, ti kontakte mwan pou donn mon reaksyon lo *interview* Onorab Pillay.

Me mon ti kategorikman refize an di-z-an ki sa zafer i konsern Lasanble Nasyonal e ava ganny *deal* avek dan *Chamber*.

Letan ki Dirizan en parti politik i tay dan en *studio* e fer en *video*. E osi anvoy en Kominike Lapres kot *SBC*, lo en lensidan dan Lasanble Nasyonal ki pa konsern li, pour mwan sa i pe politiz sa size.

Letan ki en group *MNAs* ki konnen ki zot prezans i neserer dan Lasanble Nasyonal, pou asir en *quorum*, me ki zot refize onor zot responsabilite parey nou Kod Kondwit dan *Schedule* 1,3(2) i egzize, pour mwan sa pa egzampler.

Letan ki en dirizan Lasanble ti annan plis ki 24 erdtan apre ki son kestyonn pa ti'n ganny aksepte, i ti annan en lot fason pou apros son reaksyon.

Par egzamp ler i ti vin vwar mwan Mardi bomaten e demann permisyon pou lev en *matter of privilege*. E mon ti

akord li privilez kontrerman avek Lord 25, i ti'n kapab *être* brav, onnet e dir mwan son lentansyon konmkwa i pe *walkout*. I malere i pa'n fer li.

Dan tou landrwa travay, souvandfwa sa ki ansarz, komansan par en *Supervisor* ziska Sef an tou, i kapab pran en desizyon ki travayer pa kontan.

Eski nou pran nou sak e nou dir nou pe al se nou? Se sa legzanp ki nou pe donn sa 10,716 travayer Servis Piblik, sa 8,413 travayer dan lantrepriz Leta e sa 35,803 travayer Sekter Prive?

Zis mazine si nou vwar en travayer Sekretarya Lasanble Nasyonal pe sorti dan baro avek son sak, aköz i pa kontan en direktiv ki Madanm Clerk in donneren - ki nou koman en Manm Lasanble nou pou panse lo sa travayer?

Alor sa i rezon ki yer, mon'n ekrir Madanm Deputy Clerk formelman e sit bann rezon pour koup saler sa 6 Manm.

**(APPLAUSE)**

**MR DEPUTY SPEAKER**

Setadir sa 6 *MNA US* ki ti *walkout* Mardi pase dan Lasanble. E par konsekans absant travay san permisyon

*Speaker* ki ganny adrese par Lord 9 *Standing Orders*. E osi Lalwa ki Gouvern Saler bann Manm Lasanble Nasyonal.

Me mon'n al osi lwen pou konsider e aplik en *ruling* par ansyen Speaker Dr Patrick Herminie, lo sa menm 2 baz. Letan i ti koup saler bann Manm *Seychelles National Party (SNP)* an Zen 2011.

Sa i vedir ki saler Onorab Vidot, Onorab Gill, Onorab Pillay, Onorab Cosgrow, Onorab Spiro e Onorab Loze pou koupe par R1000 pour sa mwan.

**(APPLAUSE)**

**MR DEPUTY SPEAKER**

Mon dernyen pwen pou adres konteni *matter of privilege* ki leve dan Lasanble. Lemoman in arive pou revwar Lord 40 e met li anliny avek sa ki presize dan Lord 39.

Letan en Manm i bezwen fer en lesplikasyon personnel. Setadir en Manm i bezwen konsilte avek Speaker pou asire ki sa ki ganny dir i apropiye.

Depi semenn pase ziska la bomaten a 3 repriz Onorab Pillay in fer bann latak mal plase, lo fason mon pe desarz mon responsabilite konman Speaker dan labsans Speaker Mancienne.

In akiz mwan ki mon pa endepandan, ki mon *bias*, ki mon *impute improper motives* vizavi son *Caucus*, ki mon pran bann desizyon partizan. E ki mon pe azir konman Sekreter Zeneral Parti *LDS* olye ki Speaker.

Tou sa bann remark in en vyolasyon Lord 59 nou *Standing Orders*, me mon pa pou pas ankor en segonn lo la pour reponn sa Onorab.

Me mon a senpleman konsey li, konman en dirizan dan nou Lasanble pour la prosenn fwa, mezir son parol, akoz i pa en bon legzanp ki i pe donnen.

E i montre i annan en problemn personnel avek mon eleksyon, mon repete 'mon eleksyon', dan tou le de pozisyon ki mon'n ganny konfyen ladan par mon parti, e bann koleg *MNAs*. E mon remersye zot pou zot konfyans e konfidans dan mon abilite.

**(APPLAUSE)**

**MR DEPUTY SPEAKER**

Alor lo sa not, mon reasir Lasanble ki kontestasyon konmkwa prosedir Lasanble pa ti annord, pa zistifye. E par konsekans privez Lasanble Nasyonal, oubyen sa ki pour Onorab Pillay e Onorab Loze

pa'n ganny afekte dan okenn fason.

Par kont, mon kapab al pli lwen, pou dir ki privez tou Manm Lasanble ki ti dan *Chamber* sa Mardi pour travay, in ganny afekte par en aksyon inisye e dirize par Onorab Pillay e siporte par larestan *Caucus United Seychelles*.

Lo sa not osi mon oule dir ki napa okenn deklarasyon ki'n fer, ki pou ganny *expunge* lo *verbatim* Lasanble. Me i pou reste konman en rikord pou permet sa ki vini apre konpran fason ki Lasanble i dwatet ou pa devret travay.

Mersi pour zot latansyon. Mon remersi zot, pour zot partisipasyon dan travay Lasanble ozordi. Nou pour *adjourn* la e nou pour rebran travay Mardi 9 er bomaten.

**(ADJOURNMENT)**